

BIBL. NAZ.
Vitt. Emanuele III

166
E
39

3





D E
CONSOLATIONE
AD EPISCOPOS



DE
CONSOLATIONE
AD EPISCOPOS

SUB

Analogia Episcopatus, & Martyrii

AUCTORE

VEN. FR. JOSEPHO A S. MARIA

DE SEBASTIANIS

Ex Ordine Carmelit. Discalc. olim Episcopo Hyerapolitano, deinde Bisinianensi; ac demum Tifernate:

OPUS

*Nedum Episcopis, sed etiam omnibus Prelatis, tam
Sæcularibus, quàm Regularibus utile
iterum in lucem aditum,*

AC PROFUNDA VENERATIONE DICATUM

Illmo, ac Rmo Dño, Dño Colmo

PETRO FRANCISCO
LAFITAU

Episcopo Sistaricen., ac Christianissimi Regis Con-
siliario, ejusque, ac totius Regni Negotiis
apud Sanctam Sedem Præposito.



ROMÆ, ex Typographia Rocchi Bernabò. MDCCXX.

SUPERIORUM LICENTIA.



1914

COLORED PEOPLE
OF THE
UNITED STATES

me me
Ill. ac Rev. Præful.



E triumphantis Carmeli latebris, in militantis iterum Ecclesiæ faciem redivivus exurgit Ven. Fr. Joseph à S. Maria de Sebastianis, ut Catholicos Antistites roboret ad martyrium. Quemadmodum ingens fuit suæ charitatis ingenium Ecclesiasticæ olim Prælaturæ cerumnas detegere, ut Episcopatum martyrium
asse-

*assereret; & Coepiscopos suos, regimi-
nis curis cruentatos martyres aut
nuncuparet, aut faceret; Ità decuit,
ne tot Ecclesiæ militantis Heroibus
deperiret solatium, ipsos evocare con-
solatoris Cineres, ut iterum sub Prælo
gementes, gementium Prælatorum la-
chrymas pio conatu detergerent. Ut
itaque merito excipiaturs plausu, ac
uberiores consolationis fructus exhibeat,
patiaris. oportet ILLUSTRISIME, AC
REVERENDISIME PRAESUL, ut sub tuis
auspiciis, obsoletum jamdudum vetu-
state opus reviviscat. Quæ e nim de
sacro cætu Ven. Soc. Jesu ad sacras Te
Sistaricenses Insulas assumpsere; Quæ-
ve ad Christianissimi Regis Solium,
sive, ut à Consiliis adstares, sive ut in
Urbe apud S. Sedem Apostolicam il-
lius, ac totius Regni negotiorum Præ-
posituram gereres, de religiosa solitu-
dine vel invitum evexere; Insigne hoc
meri-*

*meritum, hæc in rebus agendis eximia
Prudentia, commendabilis hic labor,
Pietatis studium, Zeli ardor, Vigi-
lantie disciplina, ac heroicæ prorsus
honestatis decus (ut cætera, jussus,
omittam, quibus altius tuam provo-
cassent modestiam): Hæc inquam om-
nia, ut Te in novâ præinserti operis
editione Patronum expostularem sua-
sere. Habebunt itaque in eo Catholici
Antistites in pressuris solatium, ac in
Te undequaque opportunum imitatio-
nis exemplar. Ipse, compassionis, ac
piæ directionis reperies meritum; ac
ego ambitæ toties servitutis gloriam
nanciscar; cujus honorem ut consequar,
summa veneratione censerè volo.*

D. T. Ill.^{mz}, ac R.^{mz}

*Indignus, ac Obsequentiss. Servus,
Fr. Eustachius à S. Maria Carmelit. Discalceat.*

Im-

Imprimatur.

Si videbitur Reverendis. P. Magistro Sac. Palatii
Apostolici.

I. de Angelis Archiepisc. Urb. Viceg.

EX commissione Rm̃i P. Dominici Mariæ Puteobonelli Magistri Sac. Palatii Apostolici legi Opus inscriptum: *De Consolatione ad Episcopos sub Analogia Episcopatus, & Martyrii: Auctore Fr. Joseph à Sancta Maria de Sebastianis ex Ordine Carmelitarum Episcopo Tifernate: atque eximiam Illustrissimi, ac Reverendissimi Præfulis sapientiam, pietatem, prudentiam, & eruditionem admiratus sum: neque solum utilissimum, sed maximè necessarium existimo omnibus illis, quos Spiritus Sanctus posuit Episcopos, & Pastores regere Ecclesiam Dei; ut possint se ipsos consolari in tot laboribus, persecutionibus, afflictionibus, & angustiis, quas secum affert regimen Ecclesiarum, præsertim calamitosiis his temporibus, in quibus, qui ritè munere suo fungi volunt, & si gladius persecutoris eos non auferat, palmam tamen Martyrii non amittunt.*

*Ludovicus Marraccius à Congregatione Clericorum Regularium
Matris Dei, SS. D. N. Innocentii XI. à Confessionibus.*

Imprimatur.

Fr. Dominicus Maria Puteobonellus Sacri Palatii
Apostolici Magister, Ordinis Prædicatorum.

B R E-

BREVIS ENARRATIO IN VITAM AUTHORIS.



EN. Fr. Joseph à S. Maria de Sebastianis , in sæculo Hieronymus ; piis , honestisque Parentibus ortus est Caprarolæ apud Ciminus , triginta circiter ab Urbe milliariis , die 21. Februarii 1623. Ejus pueritia non omninò caruit futuræ pietatis indiciis . Etenim cum aliquandò unà cum Patre Carolo ad campum exisset , dormientis pueri collum eximie magnitudinis anguis adeò circumdedit , ut jam ejus vita deploraretur . At B. Virgo à Caroli precibus invitata , ab illis vinculis puerum liberavit , serpens enim spontè recessit . Adolescentior factus ; Viterbium primùm , postea Romam , studiorum causâ missus , apud Collegium Societatis Jesu , multùm humanis litteris , ac Christianâ pietate profecit . Vocatus deindè ad Sac. Genitricis Dei Vexillum , inter Carmelitas Discalceatos humillimè postulavit annumerari . Sed bis , ad experimentum vocationis rejectus , tertio demùm , ut Superioribus Ordinis , suæ constantiæ normam exhiberet , capitis comas ex-templò recidit ; Quo

b

facto

BREVIS ENARRATIO

facto commotus Prior ad sacrum admisit habitum, quem die 3. Martii 1640. ætatis suæ decimoseptimo, magnâ cum spiritus alacritate suscepit. Inter filios Virginis cooptatus, mirum, quantum in religiosis profecit virtutibus; quadere, emissâ vix solemni professione anno 1640., eo petente, missus est in Germaniam à P. Præposito Generali, & longè à domesticis suis, (quos loco inimicorum spiritualis profectus habebat.) Deo, ac consuetis religionis studiis liberiùs vacaret. Collocatus itaque in Conventu Græcii, Philosophiæ, ac Theologiæ operam dedit. Sed non adhuc consuetum studiorum cursum impleverat, cùm à Superioribus Ordinis missus fuit in Hungariam expediendi gratiâ quoddam Congregationis negotium, quod feliciter implevit.

Sed defuncto jam Carolo ejus germano fratre, non nisi coactus obedientiâ, reversus est ad Provinciam Romanam, & Prælectoris Philosophiæ officio decoratus, Caprarolæ, deindè Interamnæ collocatus est, & deniquè Romam accersitus anno 1654., ut Sac. Theologiam legeret, suum ibi munus, nulli secundus gessit.

Obortâ interim quâdam schismaticâ seditione apud Serram Malabarium, ob nefariam Archidiaconi Thomæ de Campo intrusionem in Archiepisco-

IN VITAM A U T H O R I S.

piscopatu Angamalenſi, Alexander Septimus, qui in locum ſa.me.Innoc.X. nuper ſucceſſerat, Fratrem Joſephum Commiſſarium Apoſtolicum designavit ad Indias Orientales anno 1656., ut Schiſmaticorum, & Hæreticorum audaciam compeſceret. Eò itaque cum pervenerit, opus injunctum ſummâ vigilantîâ, ac religionis Zelo peregit; adeo ut plures, ac plures Eccleſias, quæ jampridem ab unitate deſecerant, etſi adverſantibus ſæculi Principibus, ad Romanæ Eccleſiæ obedientiam reduxerit. Romam reverſus, placuit Summo Pontifici, ut iterum ad Malabarium Serram remearet; quamobrèm eum creavit Episcopum, & licèt ob duplex, quod emiſerat votum humilitatis, (alterum commune; & ſolemne, alterum proprium, & ſimplex) toto conatu reluſtaret, juſſus tamèn eſt privatim in Cappellâ Pontificiâ, diſpenſante Pontifice conſuetos ritus, in Episcopum Hierapolitanum conſecrari, die 14. Decembris 1659.

Hoc caracthere, quâ par eſt reverentiâ inſignitus, iterùm peragravit ad Indos, ibique cẽptum opus, Domino ſpecialitèr favente, mirâ ſedulitate perfecit; Eccleſias omnes illius numeroſæ Chriſtianitatis ad Eccleſiæ unitatem reduxit; Intruſum, Pſeudo-episcopum, ejusque fautores, & aſſeclas anathemate condemnavit. At quia à Batavis, Ca-

BREVIS ENARRATIO

tholici nominis hostibus, Cochino olim potitis, à Malabarium Serra expulsus est, creditam sibi Provinciam diutiùs administrare non valuit; sed illi Vicarium, & Præsidentem reliquit Alexandrum de Campo, quem Apostolicâ, qua fultus erat, auctoritate, Episcopum Megarenssem consecravit.

Hac de re loquens Cursus Salmanticensis moralis tract. 8. cap. 4. num. 8., & agitans eam questionem, an Præsentia trium Episcoporum in consecratione Episcopi sit de essentia hujus ordinationis, & partem negativam defendens subdidit, ibi -- *Et quamvis aliqui, hæc, aut similia in dubium vocare, aut negare non vereantur: nihilominus plus quam certum nobis est, novissimè id factum fuisse sub Alexandro Septimo 1663. 31. Januarii; siquidem Illustrissimus D. Josephus à S. Maria ex Ordine nostrorum Carmelitarum Discalceatorum, Episcopus quondam Hierapolitanus, Et modò Calabriae Eccl. Delegatus 1660. in Regna Malabrica Indiarum Orientalium, ut maximam Cleri, Et Christianitatis Serranæ partem ad Ecclesiæ Catholicæ unionem reduceret, tandem laboribus emensis innumeris, auctoritate Apostolicâ deposito, Et excommunicato Intruso schismatico Episcopo: se solo, assistentibus dumtaxat duobus Presbyteris Lusitanis, sed tam Christianorum, quàm Schismaticorum multitudine infi-*

IN VITAM A UTHORIS.

inſnitâ , in Civitate Carturti conſecravit in Epiſcopum de Megarâ Parochum quemdâ D. Alexandrum de Campo : ſicque ope , gratiâ , & facundiâ admirabili Illuſtriſſimi D. Joſepbi , & aliquorum ex noſtris, virtute, & doctrinâ præſtantium, quamplurima hominum millia ad Eccleſiæ Romanæ gremium glorioſè reduc̃ta fuerunt, &c.

Serrâ itaque exul, Goam ſe contulit Ven. Epiſcopus , ubi per plures meſes permanens , multa operatus eſt in Fidei Catholicæ propagationem , S. Romanæ Sedis obſequium , & proximorum ſalutem ; ſed & indè ob Statiſtarum , ac Politicorum ſuſpiciones dimiſſus , per Regionem Perſidis , Romanam iterùm ſe contulit. Benignè ab Alexandro VII. exceptus , parvo interjecto temporis intervallo , iterùm ab eodem designatus , & miſſus eſt anno 1666. Viſitator Apoſtolicus Inſularum Maris Ægei, ac Jonii ; cui muneri , æquali ſemper vigilantia , paſtorali fortitudine , ac zelo per annum incubuit , & ſequenti demùm , qui fuit rep. ſal. 1667. , Sede vacante per obitum memorati Pontificis, Romanam repetiit .

Clemens IX. cui apprimè charus fuit, eum Eccleſiæ Biſinianenſi in Calabria præfecit, ſuaſitque, ut Eccleſiæ redditibus ſe ſubſtentans, Romæ maneret . At ille vix Eccleſiæ poſſeſſionem (ſatis reluctans)
nactus

BREVIS ENARRATIO

naetus, maluit se sponsę conjungere, & statim, Romā discessit. Laudabili prorsus vigilantia commissam Diæcesim, quę ob decrepitam Prædecessoris ætatem, se ipsam corruperat, reformavit; Clerum, ac Populum humilitate simul, ac paterno zelo aded sibi adstrinxit, ut numquam jucundiores, quam sub tanto Præsule, sibimetipsis viderentur. Pauperum, præsertim Viduarum, Pupillorum, ac Virginum inopiam semper levavit; Paterque proindè omnium jure merito dictus, à divitum extorsionibus Apostolicā fortitudine protexit. Episcopalem mensam redditibus auxit, & longè plus auxisset, nisi post quinquennium, (defuncto jam samē. Clemente IX. ejusque in locum successo Papa Clemente X.) ad eximendum ejus Zelum à periculis, quę ei imminebant, translatus fuisset (semper tamen invictus) ad Ecclesiam Typhernaten. in Umbriā anno 1672.

Hujus ergo Cathedralis curam suscipiens die 15. Octobris sub auspiciis Seraphicę Virginis Matris suę Theresiæ; istam quoque Diæcesim non sinè maximis labore, & incommodis reformavit. Plures contrā ipsum, sive à Capitulo Cathedralis, sive à Magistratibus obortas lites, heroicā sustinuit constantiā, ac feliciter superavit. Haud semel, ne justitię leges violarentur, ob executorum penuriam, curso-

IN VITAM AUTHORIS.

cursoris munus gerere non dubitavit. Gregem suum evangelicæ doctrinæ pabulo frequenter reficiebat, solemnibus præsertim diebus. Singulis quibusque annis, edictis, epistolis, ac monitionibus tepidos roborabat, servabat calidos, ac frigidos fovèbat. Pluries Diæcesanam Synodum convocavit; bis, aut ter, earum decreta imprimi fecit. Pauperum, ac orphanorum patrimonia Locis piis addicta, totâ integritate custodiri jussit, ne quid minimum in eorum damnum periret. Potentium violentiis fortitè restitit; Clerum sædulò dilexit, ac Populum: sæpè nosocomia, ac infirmorum domos invisit, ac in agone constitutis præstò aderat. Templorum munditiem, ac reverentiam rigidè exegit. Plura ædificia sacra, vel instauravit, vel à fundamentis extruxit, plerumque propriis sumptibus, adeout prodigium videretur, quomodò depauperata nimis Episcopalis mensa, tot eleemosynarum, ac expensarum incommodis, nedùm non succumberet, sed contrà magis in dies redditibus augeretur. Nulli proindè Pauperum denegavit eleemosynam, quinimmò, & in notabili quantitate pecunias in eorum infumebat levamen.

Institit sæpiùs, quantùm potuit, apud Summos Pontifices pro licentiâ redeundi ad Claustrum, & præsertim ad Sac. Montis Virginei Eræmum, ma-

BREVIS ENARRATIO

malens ibi latitare, quàm super candelabrum positus omnibus præluce. Numquam voti compos effectus, suæ, ac meæ Religionis quantum sibi fas erat, observantiis studuit conformari. Quamvis ægrâ semper, ac infirmâ valetudine, à carnibus abstinuit, vilibus, & quibus nos vescimur, cibis contentus. Quotidiano jejunio, ciliciis, ac catenulis, nedum laneâ tunicâ, carnem continuò domuit, etsi cutis, elephantiasis crustulis cruentaretur. Singulis penè noctibus, flagellis corpus affligebat. Ad matutinas horas, mediâ nocte surgebat, quas recitabat genuflexus: & has humanitatis afflictiones nunquam intermisit, nisi à Confessario, & Medico iussus. Plures scripsit libros, inter quos hunc de Consolatione ad Episcopos, quem sa.me. Innocentio XI. sacravit. Fertur, istum Pontificem dixisse P. Ludovico Maraccio Ord. Cler. Regul. Theat. olim suo Confessario, de Ven. Episcopo -- *Habemus sanctum Episcopum; utinam omnes Episcopi essent ejusmodi* Anno denique rep. sal. 1687. cum scripsisset librum cui titulus *Philotele*, elephantiasi convalescens, vigiliâ morbosa correptus est; qua per annum circiter, & dimidium diu vexatus; mirum, quantâ patientia, & equanimitate toleravit ejusdem morbi molestias. Postquam irreparabilem novit morbi acerbitatem, Sacramentis Ecclesiæ voluit roborari.

Dum

IN VITAM AUTHORIS.

Dum Sacram Eucharistiam per viaticum sumpsit, advocari fecit Capitulum Cathedralis, Clerum, ac Magistratum, pro horâ certâ. Genuflexus in sua Cappella veniam ab omnibus illis petiit, preces imploravit; & actu inaudito humilitatis, omnia, quæ forsan dixerit, aut fecerit contra proximorum famam, alacriter retractavit; non sine uberibus circumstantium lacrymis, qui ad tantum humilitatis argumentum obstupuerunt. Ex indulto s. m. e. Innocentii XI. testatus est de certa portione ad favorem nostri Seminarii S. Pancratii, & specialiter in subsidium Missionis Malabarum; & omnia, quæ habuit consignavit duobus Canonicis Cathedralis, quos ab onere redditionis rationis per speciale chyrographum absolvit; seque veluti mendicum ab iis aliis postulavit, ut dicere veriùs posset *nudus egressus sum* &c. Mandavitque, ut ejus Cadaver, vel in sepulchro publici Hospitalis tamquam pauper tumularetur, vel ad portam Cathedralis, ut ab introeuntibus, & exeuntibus conculcetur. Concinnatâ ad hoc opportunâ epigraphæ sepulchrali in hunc modum.

Folium

De Reformati Carmeli Sylva

Per orbem à vento raptum

Oviumque pabulo ubique noxium,

Et sub hoc tandem lapide clausum.

pedes hominum conculcate.

c

Per

BREVIS ENARRATIO

Per semestre ante obitum quasi præmonitus demortis die, dicere solebat, se (ut sperabat) de hac vitâ migraturum, aut in die festo B.M.V. de Monte Carmelo die 16. Julii, aut 15. Octobris in festo S. Matris nostræ Theresiæ. Quatuor antè ejus obitum mensibus, scrupulis, ac tentationibus adeò molestis oppressus est, ut in continuo, gemere videretur martyrio, quibus scrupulis dum unâ die præ ceteris, hoc est octava Augusti 1689., vehementiùs angeretur, rogavit domesticos, ut paulisper ab ejus Camera recederent, ipseque prolixius oravit, meruitque eâ in oratione de sui æterna salute certiorari; unde revocatos domesticos, de promisso admonuit, & unâ cum illis hymnum *Te Deum* devotè recitavit: & ex tunc recesserunt scrupuli, & tentationes.

Dæmon quoque ejus patientiam provocavit; dum sub specie sui Confessarii, fortasse, ut ad desperandum induceret Ven. infirmum exagitavit. Sed & jam propè mortem ipsius voluit constantiam veluti coronare S.N. Mater Theresia, cujus visione fruebatur; abscondendo nempè se ab illo, non sinè maximo incremento doloris. Die demum 14. Octobris 1689. urgentibus febribus, repertus est à Medicis omninò viribus destitutus, adeoque iterata sunt Ecclesiæ Sacramenta. Ille autem jam propè transi-

IN VITAM AUTHORIS.

transitum accersiri fecit suum Vicarium Generalem, illumque monuit, ne, tempore viduitatis Ecclesiæ Cathedralis tepercerent Monialium fervores, & quod illicò revocaret ad residentiam quosdam Parochos absentes, ne eorum oves perirent. Die tandem 15. Octobris in festo S. M. Theresiæ hora 21., sicuti speravit, ac prædixit, defunctus est. Post mortem plura de fama sanctitatis illius dicta sunt, & plures ejus intercessionem implorantes exaudiri meruerunt.

Hæc omnia prolixiori longè calamo descripsimus in Hyſtoria, quam typis mandavimus anno elapſo 1719. sub auspiciis SS. D.N. Clementis PP. XI., quem Deus diu servet incolumem.,

Protestatio Authoris.

Cum sa. me. Urbanus Papa Octavus die 12. Martii 1625. in Sac. Cong. Sac. Rit., & Universalis Inquisitionis Decretum ediderit, idemque confirmaverit die 5. Junii 1634. quo inhibuit imprimi Libros Hominum, qui Sanctitate, seu Martyrii fama celebres è vita migraverunt, gesta, miracula, vel revelationes, seu quæcumque beneficia tamquam eorum intercessionibus à Deo accepta continentes, sine recognitione, atque approbatione Ordinarii, & quæ hæcenus sine ea impressa sunt, nullo modo vult censi approbata. Idem autem Sanctissimus die 5. Junii 1631. ita explicaverit, ut nimirum non admittantur elogia Sancti, vel Beati absolute, & quæ cadunt super Personam, bene tamen ea, quæ cadunt super mores, & opinionem; cum protestatione in principio, quod iis nulla adsit auctoritas ab Ecclesia Romana, sed fides sit tantum pe-

nes auctorem . Huic Decreto, ejusque confirmationi, & declarationi observantia, & reverentia, quâ par est insistendo positeor, me haud alio sensu quicquid in hoc Libro refero, accipere, aut accipi ab ullo velle, quam quo eâ solent, quæ humanâ dumtaxat autoritate, non autem Divina Catholicæ Romanæ Ecclesiæ nituntur, iis tantummodo exceptis, quos eadem S. Sedes Sanctorum, Beatorum, aut Martyrum fastis adscripsit.

Fr. Eustachius à S. Maria Carmelita Discalceatus.

Reimprimatur,

Si videbitur Reverendissimo Patri Magistro
Sacri Palatii Apostolici.

T. Episcopus Heracleæ Vicesg.

Reimprimatur,

Fr. Gregorius Selleri Sac. Apostolici Palatii
Magister Ordinis Prædicatorum.

IN-

I N D E X

CAPITULORUM;

Quæ in hoc Opere continentur.


Cap. 1.	<i>Quod Episcopatus martyrium suo modo sit .</i>	
		pag. 3
Cap. 2.	<i>Quod excedat corporis pœnas anima tormentum .</i>	7.
Cap. 3.	<i>Quod Episcopatus omnium genera martyriorum suo modo complectatur .</i>	10
Cap. 4.	<i>De eodem Argumento .</i>	14
Cap. 5.	<i>De eodem itidem Argumento .</i>	16
Cap. 6.	<i>Quibus de causis Episcopi torqueantur .</i>	19
Cap. 7.	<i>De iniqua Episcoporum diffamatione .</i>	22
Cap. 8.	<i>De Accusatione .</i>	26
Cap. 9.	<i>De eodem Argumento .</i>	30
Cap. 10.	<i>De Litibus .</i>	36
Cap. 11.	<i>Brevis Apologia pro Episcopis non ritè con-</i> <i>ventis .</i>	41
Cap. 12.	<i>De Carceratione .</i>	46
Cap. 13.	<i>De Bonorum proscriptione , seu expoliatione .</i> <i>pag.</i>	48
Cap. 14.	<i>De Relegatione , & exilio .</i>	52
Cap. 15.	<i>De Damnatis ad opus .</i>	55
Cap. 16.	<i>De damnatis ad aliud opus , nempe ad eru-</i> <i>endos , & secandos lapides .</i>	58
	Cap.	

Cap. 17. <i>De damnatis ad metalla .</i>	60
Cap. 18. <i>De damnatis ad præcipitia .</i>	63
Cap. 19. <i>De damnatis ad naufragia .</i>	66
Cap. 20. <i>De fame , & siti .</i>	69
Cap. 21. <i>De Veneno .</i>	71
Cap. 22. <i>De damnatis ad bestias .</i>	73
Cap. 23. <i>De damnatis ad ignem .</i>	75
Cap. 24. <i>De damnatis ad gladium .</i>	81
Cap. 25. <i>De damnatis ad Crucem .</i>	84
Cap. 26. <i>De martyrii causa in specie , & primum de fide .</i>	90
Cap. 27. <i>De secunda causa martyrii ; scilicet de Ecclesia .</i>	94
Cap. 28. <i>De tertia causa martyrii ; nimirum de Justitia .</i>	98
Cap. 29. <i>De quarta martyrii causa , hoc est de salute animarum .</i>	101
Cap. 30. <i>De Tyrannis in Episcoporum martyrio , & primum de Demone .</i>	105
Cap. 31. <i>De Hominibus malis .</i>	109
Cap. 32. <i>De propria Synderesi .</i>	115
Cap. 33. <i>De Agonotheta Deo .</i>	119
Cap. 34. <i>Ad ambientes Episcopatum Parænesis .</i>	125
Cap. 35. <i>Ad eosdem .</i>	130
Cap. 36. <i>Ad electos in Episcopos .</i>	135
Cap. 37. <i>Ad Episcopos actu curam Animarum habentes .</i>	137
Cap. 38. <i>Ad Episcopos Titulares .</i>	140
Cap. 39. <i>Ad Populum Parænesis .</i>	141
Cap. 40. <i>Ad Principes , & Magistratus Parænesis .</i>	144
Cap. 41. <i>Ad Clerum Parænesis .</i>	146
Cap.	

Cap. 42.	<i>Ad S. Sedis Apostolicæ qualescumque Ministros Paraneſis .</i>	151
Cap. 43.	<i>Ad Eminentissimos S. R. Ecclesiæ Cardinales pia Episcoporum Vota .</i>	155
Cap. 44.	<i>Ad Sanctissimum Romanorum Pontificem Epi- scoporum Episcopum humilis supplicatio .</i>	159
	<i>pag.</i>	
	<i>Episcoporum ad Deum Oratio .</i>	163







OPERIS LEMMA.



EMERARIUM fortè videbitur ;
quod Ego , minimus Episcoporum ,
& qui non sum dignus vocari Episco-
pus ; solari audeam Dominos Coepi-
scopos meos ; qui , vel nullâ pressî
adversitate, solatio non indigent ; vel
summâ virtute præditi, adversitatem

non sentiunt : & , si sentiunt , egregiâ fortitudinis , &
magnæ consolationis argumenta, & exempla , infracti ,
& imperterriti exhibent . Verùm , temeritatis suspicio
evanescet ; si animi mei propositum hac in re innotue-
rit : quod utique aliud non est , quam parare futuris
Episcopis , turbulentissimæ , (ne dicam , miserrimæ) ,
Dignitatis afflictionibus non dum expositis ; patientiæ ,
mansuetudinis , & longanimitatis præsidia , in hoc ipso
ad eosdem de Consolatione libello . Accedit etiam ,
quod in hoc opere me potissimum solari voluerim , vel

A

pres-

pressuris imparem, vel extremè defatigatum: Sciebam enim, optimum discendi genus esse, docere; Pharmacumque præstantissimum fieri ab eo, qui, non tam alijs, quam sibi, illud miscet, & præparat.

Ut ergò ad rem propiùs accedam; hoc mihi primùm demonstrandum videtur: Episcopos, nempè, in eo statu reperiri, ubi solatio summopere indigeant; ne gratis, vel otiosè satagam, eos consolari, quos adversitas nulla conturbat. Id autem perfectè monstrabo; si elarè ostendero, Episcoporum ipsum quodammodo esse Martyrium; quinimò, & omnium Martyriorum genera in se per quamdam similitudinem continere. Ità enim, tam congruè me de Consolatione ad Episcopos scripsisse constabit; quam aptè alios id ad Martyres effecisse perspicuum est. Hanc ergo Analogiam antea firmabo, firmatamque subindè prosequar; præbiturus ubique idoneum poenæ solarium.



DE CONSOLATIONE AD EPISCOPOS SUB ANALOGIA EPISCOPATUS. ET MARTIRII.

AUCTORE

VEN. FR. JOSEPHO A SANCTA MARIA
DE SEBASTIANIS,

Ex Ordine Carmelitarum Discalceatorum, olim
Episcopo Hydruntino; deinde Bisuntinensi;
nunc verò Tifernate, seu Civitatis Castell.

O P U S

Non tantum Episcopis, sed etiam quibuscumque aliis
Prælati, tam Sæcularibus, quam Regularibus,
curam Animarum habentibus, Utile.

CAPUT I.

Quod Episcopatus Martyrium suo modo sit.



Græcis Latini mutuuntur Martyrii
nomen, quod testimonium signifi-
cat: & apud nos pro eo usurpatur,
quo quis pro Christi fide tuendâ san-
guinem, vitamque profundit. Adeò
verò necessarium est pro hujusmodi
tutione, seu confessione, mortem oppetere; ut absque
illa verum Martyrium esse non possit; nisi quis divi-

A 2

nitus

4 DE CONSOLATIONE

nitus (juxtà multorum sententiam) ab ea liberetur ; inflicto jam mortali vulnere , vel illatâ per fidei hostes eâ vi , ex qua naturaliter mors sequi deberet . Non tamen opus est ad Martyrii coronam , ut quis directè in odium fidei supernaturalis occidatur ; sed sufficit (juxtà commune Theologorum placitum) quod id patiatur pro quacumque virtute tuendâ ; vel pro quocumque peccato vitando , propter Christum ; cum totum hoc ad ejusdem fidei protestationem pertineat ; quæ bonum imperat ; vel consulit ; & malum vetat : nec minus confitentur fidem illius monita factò exequentes ; quam ejus documenta disertè docentes .

Licet autem ad verum , & rigorosum Martyrii genus mors corporis (ut dictum est) omninò pertineat ; non tamen à ratione spiritualis , & metaphorici Martyrii excludi debent illæ pœnæ , quæ absque corporis nece mentem , animumque dirissimè lancinant . *Hic namque gladius Beatissimæ Virginis Animam pertransivit : & non modò Martyrem ; sed , & Martyrum Reginam effecit . Hinc est etiam , quod Mater Ecclesia in Divi Martini Festo proclamat : O Sanctissima Anima , quam , etsi gladius Persecutoris non abstulit ; palmam tamen Martyrii non amisit .* Utrum verò metaphorico nostro martyrio debeatur specialis illa corona , quæ aureola dicitur , & corporali martyrio tribuitur : certum est ei non deberi : sed in dubium revocari non potest , quin ei essentialis gloriæ gradus non mediocris correspondeat . Hoc unum firmissimè tenendum est : utrumque Martyrium suo modo ab eisdem virtutibus nasci ; à charitate , scilicet , imperante ; & à fortitudine quodammodo eliciente ; cum utrobique oporteat , & durissima pati ;
quod

quod sine aliqua fortitudine fieri non potest : & propter Dei, proximique amorem ea pati; quod absque charitate, nec esse, nec meritum habet. Hinc est, quod in Evangelio dicitur : *Majorem charitatem nemo habet, quam, ut animam suam ponat quis pro amicis suis*: Qui autem hoc dixit, hoc etiam asseruit : *Bonus Pastor animam suam dat pro ovibus suis*. Utrumque idem est, & animam ponere, & dare; sed majus est, eam ponere, & dare pro ovibus; quam pro amicis: non enim qui amici, oves necessario existunt; sed oves esse non possunt, nisi amici habeantur: & plus est dare, ac ponere animam pro amicis, & ovibus; quam pro amicis non ovibus; cum alterum sit Justitiæ opus, & charitatis; alterum verò tantummodò charitatis.

En ergo animarum Pastores, optimi Præsules, quam verum est, Episcopatum esse Martyrium; exigente Pastoralis munere, ut detur pro ovibus anima; & si non semper cum morte corporis; semper tamen cum mortificatione spiritus; quæ sit per curas, afflictiones, & mentis angustias! Ideò Paulus Apostolus audacter ad Timotheum scribit: *Fidelis sermo; Si quis Episcopatum desiderat, bonum opus desiderat*. Hoc enim sic explicat Divus Thomas:^{a 2. 2. q. 185. ar. 1.} *Si quis Episcopatum desiderat, bonum opus; hoc est, Martyrium desiderat*. Equidem cenfeo, id ipsum intellexisse Apostolum; interpretationemque Doctoris Angelici, non tam allegoricam esse, quam literalem, de vero, & corporali Martyrio: eo namque tempore Apostolus id scripsit Timotheo, quo idem erat, Episcopum, & hostiam consecrari: Persecutores enim Ecclesiæ Dei, qui Christi Fidem penitus extinguere moliebantur; satis intelligebant, Pastoribus
de

6 DE CONSOLATIONE

de medio sublatis, oves facilè interituras: Ideoque, illos diligentissimè conquirebant, inventosque sævissimè trucidabant: qui verò in eorum locum sufficiebantur, optimè notant, se statim perquirendos ad necem: ideoque, si quis eo tempore Episcopatum desiderabat, bonum opus, hoc est, Martyrium desiderabat; & nimis citò consequebatur. ^{b In Io: cap. 10. Comentar. l. 9.} *Tunc enim respersa sunt ovilia sanguine Pastorum; maduerunt campi cadibus Pastorum; cruentata sunt pascua vulnerebus Pastorum; Sacrata est terra corporibus Pastorum; ditatum est Cælum animabus, quas Pastores pro ovibus suis posuerunt.* Cessavit postmodum Tyrannorū immanitas; sed non idè cessavit Episcoporum Martyrium; qui sine ferro, & sanguine tantò crudeliùs Martyres fiunt; quanto diutiùs, profundiusque torquentur. *Nil crus sentit in nervo* (inquit Tertullianus) *cum Animus in Cælo est.* At, animus, curis, anxietatibus, zeloque impetitus, dirè vexatur; licet crus, & nervi, totumque corpus in deliciis esse videantur. Corporis vita est ab anima; non item animæ à corpore; quod propterea lædi potest; at dolere non potest sine anima. Extrà corpus angitur anima peccatis obnoxia, diriusque torquetur pœna damni, quam sensus: ideoque planè fatendum; Spiritale Martyrium per quam longissimè corporis cruciatus excedere; ut statim videbimus. Qui ergo Episcopatum desiderat, seriò perpendat, quid ipse desideret. Videt infulas, famulos, currus, thronum, palatia; audit plausus, titulos, encomia, laudes. Hæc planè circumstant, ambiunt, decorant, alliciunt; sed forinsecus tantum: Intus verò ingens Martyrium; imò veriùs, omne Martyrium latet, & lacerat animæ
visce-

viscera . Sit bonus Episcopus, sive malus ; Martyr existit . Bonum , Pastorales curæ , solitudinesque contorquent ; Malum , conscientia stimuli feriunt . Illum Dæmones , mundusque jugiter persequuntur . Hunc autem ultor Deus perpetim , minaciterque flagellat . Alter Christi Martyr est ; alter verò Antichristi .

Ad vos , optimi Præsules jam infulati , nunc meus sermo convertitur ; & cum vos spirituales Martyres demonstraverim ; pro vestra gloria , & consolatione dirum Martyrii genus in vos expleri probabo ; ut spiritualium nobilissimorum Martyrum Triumphale præmium ibi speretis , quo commissas oves tanto labore , per invia , & aspera , per feras , per fures , per ingenita pericula ducitis ; easque præceditis , intus in animo dirissimè cæsi
Dolorem vulnerum mitiget spes Corona .

CAPUT II.

Quod excedat Corporis pœnas Anima Tormentum .

DIxi quidem , Spiritale Martyrium per quam longissimè nudos corporis cruciatus excedere ; sed non satis probavi : quod faciliè mox demonstrabo . *Martyrem facit, non pœna; sed causa* (inquit Augustinus) Noscere autem causas , est animæ ; non corporis munus . Mulctatur grassator pœnâ Martyris , sed non idèò Martyr existit ; cum desit causa Martyrii . Necatur in somno Fidelis , paratus mori pro Christo ; & id à Tyranno patitur in odium fidei ; & licet Martyrii pœnam dormiendo non sentiat ; eum tamen causâ Martyrem facit : adeoque certissimum est ; Martyrium plus animam ,

8 DE CONSOLATIONE

nam, quam corpus afficere; illamque magis dilaniare, quam istud. Denique, tormenta omnia, quibus Neronēs, Decii, Diocletiani, aliaque Crudelitatis monstra Martyres affecerunt; Belluas quoque torquere possunt; sed non tamen efficere Martyres; ex defectu rationis, quæ causas poenarum noscat, & velit. Plus ergo mentem, quam membra Martyrium fauciat; nec ullus negabit, passiones animi crudelius scire, quam corporis. Rex Martyrium Christus, Dei Filius, uno, eodemque tempore dum oraret in Horto, cuncta simul tormenta sustinuit; quæ pertulit subindè divisa: tantòque acrius ibi passus in animo est, ut factus in agonia, sanguine undequaque manarit.

Nec tantum dixerim, spirituale Martyrium excedere materiale purum intensiōe, & extensiōe poenarum; quas licet contrarias, simul non raro patitur (ut infra dicitur) sed etiam duratiōe. Martyrium etenim tunc est, cum vita per vim aufertur; nec potest quis esse verè Martyr antequam moriatur, ut cum Angelico Doctore Cajetanus affirmat; & clarè patet ex ipsa definitione Martyrii, *quod est maximum Fidei testimonium per ejus rei profusionem, quæ summè diligitur; quæ data, nihil sit ultra, quod dari queat*: donec autem quis vivit, dici non potest, amplius non habere, quod ponat pro Religione tuenda; cum adhuc vita supersit, quam pro ea dare tenetur. Quod adeo verum est; ut difficillè Theologi explicent, quando Martyrium meritum habeat; cum non antea existat, quàm vita Martyrem privet, cumque de via eum ponat in termino, ubi non est amplius merendi locus; videtur prius promereri, quàm sit. Reàlis ergo Martirii duratio, si non momentanea, ut plurimum

AD EPISCOPOS 9

mum brevissima est : spiritualis verò ad annos protrahitur , & tamdiù torquet , & vexat Episcopos , quamdiù ipsorum vita perdurat , & solâ morte finitur ; ut in Divis Athanasio , Martino , Ambrosio , Chrysostomo , Carolo , & ferè in omnibus aliis magnis Præsulibus accidit . Æquè igitur verum est ; & Episcopum esse Martyrem , & ejus Martyrium Episcopatum metiri , unâque ad mortem usque durare . Hoc itaque spirituale Martyrium , quo semper Episcopi afficiuntur , corporale Martyrium , cæteris paribus , tam duratione , quam intensiōe longissimè superat . *Majus est vivere cum castitate* (inquit Tertullianus) *quam mori pro castitate* ; Quòd si pro sola fortassis diuturnitate certaminis hoc dicere licuit Tertulliano ; liceat etiam hoc mihi dicere : *Majus est cæteris paribus diù cum mentis Martyrio vivere ; quam cum Martyrio corporis citò mori* . Duo tamen sunt , quæ divexatos Episcopos maximè solari poterunt . Alterum est ; *quod hoc habet boni assidua calamitas : quos sæpè vexat , novissimè indurat* . Alterum verò , futuræ gloriæ majus præmium , saltem extensivè ; quod utique , spirituali , diuturniorique Martyrio jure debetur .



IO DE CONSOLATIONE

CAPUT III.

*Quod Episcopatus omnium genera Martyriorum
suo modo complectatur.*

E Gregius Pater Vincentius Contenson, Ordinis
Prædicatorum, in sua Theologia mentis, &
cordis, ità de Episcopis loquitur. ^a *Martyres sunt Epi-*
^a *diser.*
^{3. c. 2.} *scopi, qui Ecclesiæ, cujus sponsi sunt, amore flagrantes, & forma gregis facti, vitam suam, juxta Tridentini, & Conc. Carthaginensis IV. decreta, componentes, modesta suppellectili, & mensa, ac frugali vita contenti: humilitatis, misericordiæ, eleemosynarum, cæterarumque virtutum, quæ sunt veluti quoddam perpetuum prædicandi genus, insignibus, suo se Divino muneri ità conformes ostendunt, eâque vivendi disciplinâ fulgent; quæ meritò omnium in se oculos convertat. Martyres sunt Sacri Antistites, qui nullis illecebris emolliuntur, nullis Curia favoribus inflectuntur, nullis adversis perturbantur, nullis extolluntur secundis, & quasi vento quodam nullâ variarum rerum mutatione circumferuntur. Martyres sunt, si pro veritate sibi concredita tutanda, nullos defugiunt labores, nullos timent persequentium furores. Nam, ut bene dixit Augustinus, Martyr testis interpretatur: Quicumque ergo pro veritate testimonium dederit, quidquid pro testimonio veritatis pertulerit, totum ei Dominus pro Martyrio computabit.*

En, quot Martyria Episcopus, si suas partes adimpleat, uno, eodemque tempore perfert! Desunt modo Ecclesiæ persecutores; non tamen desunt Episcoporum tortores, quorum nequitia, & feritate carceribus man-
cipan-

cipantur, spoliantur bonis, aguntur in exilium, infamiae notis uruntur, damnantur ad metalla, ad naufragia, ad bestias, ad præcipitia, ad crucem, ad ignem, ad gladium, adque cæteras pœnas, quibus olim antiqui Martyres afficiebantur; ita ut nullum fuerit genus tormenti, quo eorum corpora vexabantur, quod Episcoporum animas spiritualiter dirè non torqueat. Nec unum tantum, aut alterum tormenti genus Episcopi uno tempore sustinent, sed quandoque plura, & non rarò ferè omnia, simul patiuntur. Hoc Divo Paulo Apostolo, Episcoporum nobilissimo exemplari, ante martyrium corporis in animo sæpissimè contigit, coactus aliquando exclamare: *Foris pugna, intus timores: quis me liberabit de corpore mortis hujus?* Quibus, quantisque pœnis credimus ejus animam fuisse dilaniatam, quando fassus est, se tot, tantisque angustiis arctari, *ut videret eum etiam vivere?* Si hoc non semel accidit Apostolorum fortissimo, qui anxie cupiebat dissolvi, & esse cum Christo: quid cæteris Apostolis non rarò contigisse putamus? Eja, Illustrissimi Præsules, locum Apostolorum tenemus, eorum quoque sortem subire opus est. Hanc ipsi hæreditatem nobis reliquerunt, si respuimus, hæredes non erimus. Planè indignum, Apostolorum officium habere nos velle, & recusare martyrium. Ipsorum passiones, pastoralis muneris sunt documenta: boni Pastoris debitum est, pro ovibus animam dare: qui non dat, non est bonus Pastor. Non sufficit, velle dare, non satis est hoc animi præparatione complere: dare opus est, vel per sanguinis effusionem, vel per animæ passionem, quandiù alterutrum abest; Pastor bonus non est, qui, ut semper bonus existat, semper animam dare tenetur, hoc pacto

12 DE CONSOLATIONE

saltem , ut numquam animam suam sinat ovium intensissimâ curâ oblivisci , qua peramanter urgeatur simul , & torqueatur . Quam benè Divus Carolus Borromæus Episcoporum speculum , Episcopum illum , & literis , & nuncio , & coram , acriter reprehendit ; qui se quietissimè degere in sua Diœcesi , & nulla perturbatione sollicitari jactabat , indignissimum putans , eum quam maximis curis non angi , cui de animabus Christi sanguine redemptis , custodiâ sibi concreditâ , iudicium planè durissimum imminet . Quid , si una tantum illarum , quid si plures ejus culpâ dispereant ? Certè , prò auri , gemmarumque deposito valdè sollicitus esset : quid nî ergo pro animarum thesauro longè plus anxietur , quem non satis est à furibus custodire , sed , & quam maximè excolere , quinimò , & augere , opus est ! Episcopatus , non perfunctoriè , non segnitè est pertractandus , sed totâ prorsus animi intentione gerendus . Sanctus Malachias , electus in Hiberniæ Primatem , dum consecrandus ad Ecclesiam raperetur : *Ad mortem me ducitis* (ait) *sed obedio spe martyrii* : putans , Episcopatum sibi fore martyrium , nec absque martyrio ullatenus geri posse . Hac de causa magnus Basilii ab eloquentissimo Nazianzeno dictus fuit : ^b *Citra sanguinem Martyr* .

^b in orat. de laudib. Pauli .

Quidam Colonienfis Archiepiscopus , & Sacri Elector imperii , cum quadam die venatum iret , magnâ equitum , famulorum , canumque stipatus catervâ , in argutum senem offendit , eumque agricolam , qui , cum genuflexus , stiæ innixus , ab eo benedici expectaret , quasi mirabundus caput movebat . Interrogavit eum Præsul , cur sic obstupesceret ? Cui Rusticus : *Miror* (inquit) *nostrarum Episcopum animarum tanto apparatus,*

tu, relictis ovibus, feras venari! Erras fili (subjunxit ille) non modò Episcopus ego sum, sed etiam, & Princeps, & magnus Princeps Imperii. Hanc ergo venationem, non ut Episcopus, sed ut Princeps indixi. Optimè quidem (subjunxit Agricola) sed veniam da, & Rustico, & curioso, dubiumque mihi solvere ne dedigneris. Dic audacter (respondit Antistes) & ille: Si Archiepiscopus (ait) Coloniensis in Infernum ex Dei Judicio tradatur; quonam ibit Princeps Imperii? Tunc amarè subrisit, Præsul, & Princeps, admotisque calcaribus equo, suo abscessu planè docuit, eò iturum Principem, quò iret Episcopus; fallacesque hujusmodi præcisiones in Ecclesiæ Prælati minimè valere; vel saltem in eis prævalere debitum Præsulatus, cuicumque gradui; seu muneri longè minori. Non oportet martirii pœnas, aut fugere, aut profanis occupationibus delinire. Videte, quid umquam fecerint boni Episcopi, quos imitari summopere decet, non alios intueamini, quos fortè vanitas, aut levitas dementavit: haud enim movere nos debet, quod ab aliquibus perperam fit, sed quod ab omnibus jure, meritoque faciendum est. Quid præstitit Christus, Episcoporum, Præsulumque omnium Pastor, & Prothor-typon? Non deerant in ipso plurium, maximarumque dignitatum jura, & tituli; semper tamen Crucem ferendo, martyrium pertulit; & nos quoque illud quotidie perferre docuit, & jussit. Hoc profectò magnum solatium est, Dei Filium, & præcepisse, & pertulisse martyrium.

14 DE CONSOLATIONE

CAPUT IV.

De eodem Argumento.

TOt sunt mala , & tam magna , quæ Præsulum animas circumdant , obsident , premunt , flagellant , exulcerant , dilacerant , & perfodiunt , ut aliquantò prolixius de illis in genere agendum sit ; ne mole , aut numero , primo aspectu minora videantur , quàm utique existant . Non enim oportet , Medicum , aut Chirurgum infirmi curam aggredientem , morborum , & ulcerum quidquam latere , vel ignorare symptomata : ne pharmaca , & cataplasmata , & alia remedia minus idonea , corporibus , membrisque affectis adhibeant . Quinimò , & sicuti in bello tyronibus , & in mari primò navigatoris , opus est , prævidere incommoda , ærumnas , pericula , & cætera mala , quæ in armis , & in aquis reperiuntur , nè , reperta , ignaros , aut deterreant , aut obruant (ut fieri sepissimè vidi) : sic etiam quidquid poenarum sub Infulis latet , futuris , novisque Episcopis aperiendum est ; ne postea non prævisum , aut sævius feriat , aut penitus necet .

Non modò sacri , sed prophani etiam Magistratus rem communem , & publicam gerunt ; ideoque infinitis , & incessantibus malis expositi sunt : inquit enim Cicero prò Sexto Roscio ; quod *prò communibus commodis adeunda sunt inimiciæ ; subeunda sunt tempestates ; & cum audacibus improbis , etiam potentibus , est dimicandum .*

*a Epist.
148. di.
40. cap.
ant. om.*

Hoc sentit Ethnicus de magistratu , & præfectura sæculari : quid ergo Christianus judicare debet de præfulatu
sa-

sacro, & planè Divino? Respondeat Augustinus: ^a *Nihil est (inquit) in hac vita difficilius, laboriosius, & periculosius Episcopi officio, si sedulò ac fideliter exerceatur. Nusquam ergo in rebus humanis reperiri possunt implicationes difficultates, duriores labores, & immaniora pericula, quàm in Episcopatu rectè administrando. His malis factò agmine impetebatur Ambrosius, quando scripsit ad Sororem.* ^b *Si Imperator peteret à me, quod* ^{b Epist. 35.} *meum esset, fundum meum, argentum meum, jus meum: me nunquam, refragaturum respondi. Verùm, quæ Divina sunt, Imperatoriæ Majestati nequaquam esse subiecta. Si patrimonium petitis; incendite: si corpus, libenter occurrám: si vultis in vincula trahere, trahite: si vultis in mortem rapere, rapite. Non ego me vallabo circumfusione populorum, non Altaria tenebo, vitam obsecrans; sed pro Altaribus gratiùs immolabor. En quot angustiiis coarctabatur Ambrosius; quot periculis, quot malis uno, eodemque tempore subiciebatur! His majora torquebant Chrysostomum, quando in homilia de sua expulsióne, ità fortiter, & imperterritus ad populum declamavit. Multi quidem fluctus, & undæ immanes, sed submergi non vereor. Quidquid terroris habet Mundus, contemno. Quidquid delectabile habet, rideo. Divitias non cupio, paupertatem non horreo, mortem non timeo. Etiam si fluctus insurgant, etiam si totum Pelagus adversum me conturbetur, etiam si Principum furor inuadat: omnia mihi arena, & arenis fragiliora: nemo enim nos à vobis poterit divellere: quos enim Christus conjunxit, homo non separabit. Ego quidem à vobis nec morte divellar: ego millies pro vobis immolari paratus sum. Nec gratia mihi in hoc est; sed debitum reddo: Bonus enim Pastor Animam suam*
dat

16 DE CONSOLATIONE

dat pro ovibus suis ; Unum in tot , tantisque malis solatium , & sibi , & nobis exhibet verè magnus Antistes ; invincibilis animi fortitudinem ; eamq; ab amore Christi , & ovium Christi productam . Ait namque Petrus Chrysologus : Nihil durum , nihil amarum , nihil grave , nihil lathale veretur amor verus . Quod ferrum , quæ vulnera , quæ pœna , quæ mortes amorem prævalent superare perfectum ? Amor est impenetrabilis lorica , respuit jacula , excutit gladium , periculis insultat , mortem irridet . Denique , si amor est , vincit omnia . Nil dulcius , nil animosius ad Episcoporum solatium dici poterat !

CAPUT V.

De eodem itidem Argumento .

Quisquam fortè putabit , transisse tempora illa Episcopis adeò calamitosa , quæ ipsorum animas ob Principum tyrannidem tam dirè torquebant : verùm apertissimè fallitur . Desierit Principum , non tamen umquam deerit , aut potentum , aut sceleratorum , aut Dæmonum sæva tyrannis ; & (quod longè toleratu difficilius) ea cessante , non rarò potentissima Dei manus Episcoporum corda miris modis invisibiliter aggravat , subtilissimeque transfigit (ut suo loco dicemus) . Nulla temporum , rerum , personarum , ipsorumque Episcoporum conditio , eos ab adversitatibus , ab afflictionibus , à periculis ; uno verbo , à martyrio eximit . Serio perpendite ; quæ , quantaque mala pertulerit : quis ? Carolus Borromæus , genere Princeps , dignitate Cardinalis , doctrinâ insignis , vir-
tute

tute Sanctos. Quo tempore? postremo sæculo; absolut o Tridentino Concilio, Episcopis tam proficuo; sub Pontificibus verè optimis, Regibusque piissimis. Ubi? Mediolani; hoc est, in Urbe nobilissima, catholica; ipsorumque Borromæorum parente. A quibus? à concivibus, à nobilibus, à plebeis; ab Ecclesiasticis, sæcularibus, & regularibus. Quæ? irrisiones, bonorum sequestrationes, contumelias, militum obsidionem; calumnias, & has gravissimas; armorum deniquè ictus, ipsosque mortales; nisi clypeo invisibili tectus fuisset.

Si etiàm liceret hujus nostri sæculi; quinimò, & nostrorum quoquè dierum exempla in medium proferre; quot Episcopos, opibus, fortuna, meritis, planè sublimes, hic attrexerem dirissimè divexatos? Vivunt adhuc Eminentissimi Cardinales Episcopi, qui hoc de se ipsis mihi apertissimè fassi sunt. Vivunt alii, qui piissimam commiseratione, de pertinaci malorum hominum in Episcopos, odio, ira, perfidia, sycophantia mecum plurima digesserunt. Romæ id nupèr accidit; quò, visitaturus Apostolorum limina, accessi: ubi præterea multos Episcoporum audiui, talia de suis Episcopatibus mæstissimè deplorare; ut ea mihi horrorem incuterent. Equidè fateor, me nunquàm apud Turcas, aut Syros, aut Phœnices, aut Assyrios, aut Arabes, aut Chaldæos, aut Persas, aut Indos; vel etiàm apud Hæreticos, aut Schismaticos, aut Ethnicos, non dico majora; sed nec æqualia passum fuisse: vel si quid pati contigit, modica pecunia redemi: præterquàm quod passionem omnem quasi exstinguebat clara, & certa cognitio, quod ea mihi fierent ab hostibus Fidei; à quibus propterea vexari, & apud Deum, & apud homines gloriosissimum

18 DE CONSOLATIONE

est, rat verò, similia pati à fidelibus, à subditis, à filiis, eisque, ut plurimum, beneficio affectis, atque dilectis; & hoc inter Catholicos: planè durissimum.

Verum est, quosdam Episcopos reperiri, qui in labore cæterorum non sunt, & cum illis non flagellantur; incuriosè ludentes, aut dormientes in cùra: d^{a dicta}
^{p. 143.} quibus loquitur Augustinus, dicens: ^a *Nihil est in hac vita faciliùs jucundiùs, & optabiliùs Episcopali munere; si perfunctoriè, & adulatoriè res agatur: sed nihil est apud Deum miserabiliùs, & execrabiliùs, si ita agatur.* Episcopis, qui hoc modo se gerunt, differtur martyrium, non aufertur: eis namquè pro temporali manet æternum (Si tamèn temporali aliquandò carent) ^{b lib. 4. dist. 13. ep. 8.} *men nos Pastoris* (ait Gregorius) *non ad quietem, sed ad laborem suscepisse cognoscite. Sicut igitur laborantes, & circà animarum salutem sollicitos, hoc nomen ante Deum, eternam ducit ad gloriam: ita desides, & torpentes urget ad pœnam.* De illis ipse hic tantummodò loquor, qui verè Episcopi sunt; utque tales, animas suas semper dant pro ovibus suis; quarum causa modò unum, modò alterum, modò plura, & quandoquè ferè omnia subeunt martyria: sed alternantibus pœnis, nunc levioribus, nunc gravioribus; nunquàm tamèn omninò cessantibus: ita fit, ut ad ipsorum solatium de nonnullis Episcopis dici possit, quod Chrysostomus de Jobo ait: ^{c hom. 1. in c. 12. ad Corinth.} *Martyres innumeros Job unus aequat.* Non tarus, inquam, Episcopus æquat: Sed hoc etiàm expressè fateatur idem Chrysostomus: ^{d to. 4. in epist. ad Roman.} *Bonus Pastor, & talis qualem Christus vult, innumeris componi Martyribus; Martyr siquidèm semel pro Christo moritur; hic autèm illius propter gregem suum.*

CAPUT VI.

Quibus de Causis Episcopi torqueantur.

Dictum est, quod Martyrem facit, non poena, sed causa: hæc autem est veræ fidei testificatio; sub qua ea omnia comprehenduntur, quæ ipsamet fides, aut imperat, aut vetat, aut consulit; ita ut, mori pro adimplendo, vel pro non transgrediendo præcepto, seu etiâ Divino consilio: Martyrium sit. Ideo enim inter Martyres computantur, qui vitam pro Virginitate, pro Ecclesiæ defensione, pro Iustitia, proquæ aliis virtutibus perdidere. Magnum profectò solatium Episcoporum esse debet, quod vix ulla sit virtus, pro qua eos non oporteat sæpius, & plurima pati. Pro fide, ut Inquisitores: pro castitate, ut Virginum custodes: pro coercitione malorum, ut Iudices: pro Ecclesiæ Immunitate, ut Sacrorum Præfetti: pro verbi Dei prædicatione, ut Pastores: & generalitèr pro Pietate, ac Religione; ut Medici, ut Magistri, ut Parentes (uno verbo) ut Episcopi. Si enim (ut dicit Chrysostomus de Adventu Domini) *Martyrium exercitatio pietatis est*; huiusmodi exercitatione vix umquàm carent Episcopi, qui summa pietate pollere debeant, aliisque pietatis normam præbere. Multæ igitur sunt causæ poenarum in Episcopis, & ipsæ tam graves; ut eis non sufficiat propria bonitas; sed etiâ subditos bonos facere debent; eradicando vitia, plantando virtutès, & eas excolendo. Hoc autem quàm difficile sit, quàm laboriosum, quot periculis plenum; illi fateantur, qui unam domum, unum gym-

nasium, unum monasterium, unam familiam, unam urbem, unumque populum, absquē ingenti solitudine, & sinē magnis curis, & anxietatibus regere, & in officio continere vix possunt. Episcopus autē, & populos, & urbes, & familias, & monasteria, & gymnasia, & domos; quinimō, & viros, & mulieres singulas, ejus curæ subjectas, unus coercere, unus erudire, unus salvarē debet.

Constat ergō, Episcopatum Martyrium esse, poenarum mole, numero, intensione, duratione gravissimum. Sub eo gemunt Episcopi; licet foris quieti, & gaudentes appareant. Eos appellat Augustinus: *² Felicitèr infelices.* Sunt namquē Mitrati famuli, non unius quidē, sed tot Dominorum, quot ministrare debent alimenta salutis. Misere gloriosi, exteriùs lucent, intusquē cremantur. *Affidua calamitas non omninō illos, ut alios, indurat*: nam adeō in Episcopis varia est, adeoque diversos torquet affectus, ut non sinat obducere callum in animo semper cicatricoso. Putant aliqui, Divum Franciscum Saleisium tale numquā sensisse Martyrium, sed planē falluntur: mutasse namquē bilem in lapidem, magna prorsus vis tormentorum fuit; quibus novus Chemicus potuit ignem, flammæque fellis, non modō compescere, sed obdurare. Apathiam Stoicam, & zelus, & charitas, & justitia, procū ab Episcopis arcent. *Non sentire mala, non est hominis* (inquit Seneca) *non ferre, non est viri.* Sentiant ergō Episcopi, ut homines, spirituale martyrium: sed; ut viri ex officio perfecti, fortiter ferunt: magnum enim solatium, & cum solatio vires eis dant invincibiles, Divinorum Oraculorum promissa. Ea sunt: *Momentaneum hoc, & leve tribulationis nostræ æternum*
glo-

gloriæ pondus operatur in Cælis: non sunt condignæ passiones huius temporis ad futuram gloriam, quæ revelabitur in nobis: omne gaudium existimate, cum in varias tentationes incideritis; scientes, quod probatio fidei vestræ patientiam operatur; patientia autem opus perfectum habet: beatus vir, qui suffert tentationem; quoniam cum probatus fuerit, accipiet coronam vitæ, quam repromisit Deus diligentibus se: & alia plura, Episcopis præcipuè dicta, quibus cuiusque Præsulis animus ad quodcumque martyrium impelli, & erigi debet.

Societas etiã tot Episcoporum, qui nos præcesserunt, & qui modò vivunt, magnum exhibent in afflictione nostra solatium; cum vix unus reperiri possit, quem ingentia mala in Episcopatu non torserint, aut torqueant. Equidẽm fateor: quotiẽs, positus in magnis angustiis, opprimi videor; si ad aliorum Episcoporum certamina oculos figo, & respiro liberius, & pudet me, pro magnis habuisse, quæ tunc minima esse dignosco. Legite præcipuorum Episcoporum gesta; interrogate de modò viventibus: & in cunctis, & singulis reperietis prò solatio, quid admirari, quid tandẽm in vestris afflictionibus æmulari possitis. Præstat tamẽ, & longè præcellit exemplum Christi, cuius vices nos gerimus, in procuranda salute animarum, quæ nonnisi sanguine, ac passione salvantur. Maximus ille Theologus Arcopagita profitetur audacẽ: *Omnium Divinorum Divinissimum esse, in salutem animarum cooperari*; ad quod Episcopi positi sunt. Desint promissa, præmia, societas, exempla: id unum sufficit, per Episcopale Martyrium, nos Deo quàm maximè opitulari, & placere.

CAPUT VII.

De iniqua Episcoporum Diffamatione.

N*on est malum puniri* (ait Seneca) *sed pœna dignum esse*. Id norunt impii Tyranni; qui propterea neminem afficiunt pœna, quem prius ea dignum non simulent. Pudit Hæbreos, occidere Christum, quin antea innocentiam ipsam esse ream mortis impudentissimè succelamarint. Contrà eum inquiri non potest, quī nullatenus diffamatur. Quemadmodum, qui antiquitūs, & nostris quoque temporibus, pro Religione mortem oppetiere; perduelles, incantatores, seductores, nefarii habiti sunt: ita etiā Episcoporum Martyrium incipit à censura. Cum primū in fontes armantur; ipsi rei, & eorum amici, & fautores, illicò in Episcoporum famam insiliunt, venenatis eam linguis inficiunt, & pessimi Sycophantæ dilacerant. Præteritas culpas (si quas inveniunt) ostentant; præsentēs; quas non reperiunt, effingunt; bona ipsa ex mala intentione derivant; & quod piè ab eis geritur, hypochrissi tribuunt. Decreta, ordinationes, præcepta, edicta, sinistrè interpretantur; de imprudentia, de ignorantia, de præcipitatione, de malo animo cuncta eorum gesta obliquè insulant. Si operantur, inquietos; si non operantur, desides vocant: & hoc unum totis nisibus moliuntur, ut, si non damnabiles, saltèm despicabiles Episcopos reddant.

Quidam Præsul, optimè à suis exceptus, & aliquandiu in summa veneratione habitus, cum primū duas
ini-

iniquissimas pellices, cum matre lēna, in carcerem trussit; illarum amasiorum, non modò linguis, sed, & calamis tam dirè, tamquè procacitèr fuit divexatus; ut non amplius priori quiete, ac serenitate frui potuerit. Quæ dictèria, quæ scommata, quas irrisiones, quas conjurationes, quas minas, etiàm per publicos, infamesque libellos; quæ dispendia, quæ deniquè mala non est passus? Longum esset ea recensere, quinimò, & recensita, incredibilia viderentur: Juvit tamèn Deus Episcopi zelum, & patientiam; præciditque malignantium caput ictu lethali. Quotiès ego Ecclesias mihi commissas perillustrare volui, quotiès diœcesanas Synodos celebravi, quotiès abusus evellere studui, quotiès Dei cultum promovere satégi; toties Demonum ira efferbuit, & venenatas linguas incendit, & diras tempestates commovit.

Perditi homines quid non effutiunt contra Præsulem eis invisum? Quantò meliorem agnoscunt, tantò liberiorius insultant; nil ab eo sibi reformidantes, quem sciunt, & mitem esse, & quotidie sacrificium offerre; & paratū dare percutienti maxillam. Primū de ignavia, de imprudentia, de inscitia insimulant; ut contemptibilem reddant: subindè indiscretum accusant, acrem, biliosum; postremò efficta crimina objiciunt, & etiam bona illius opera, ipsam justitiam, sinistra interpretatione commaculant; ut ejus qualemcumquè famam funditus perdant. Hac etiàm intentione id efficiunt, ut eos, ad redimendam vexationem, pro libitu vivere sinant; ut fidem apud majores Judices invenire non possint; ut sub deformi capite membrorum turpitudine minùs appareat.

Si quis Episcoporum perniciosos audacis cujuspiam
erro-

errores , gliscentemquè in sua Diœcesi aliquandò malam doctrinam eradicare studuerit ; auctoris odium incurrit : & humus pravis germinibus apta , quot subindè spinas , quot tribulos , quot venenatas herbas , cultori noxias producit ? In patrem proceres excitat , filios remouet à parente , seducit amicos , avertit subditos , omnia confundit . Quos Episcopo noscit contrarios , adsciscit : & erecto contrà eum tribunali , ex illis eligit scribas , & testes , quibus accusationes , examina , fides , processus , reus in Judicem format . Si quos Episcopus in uisitatione , vel extrà , corripiat , si quos etiàm aliqua pœna mulctarit , eis iniqua commiseratione blanditur , & ad se trahere subdolè studet . Alios verò , usurpato potentum nomine (si apud eos valere contingat) minisque intentatis , jurare , tam falsa , quàm dubia cogit . His artibus mille supplices libellos , modò summo Pontifici , modò sacris Congregationibus porrigit ; nunc plurima simul obijciens , mox unum crimen , aut alterum : & , si nihil efficiat , ab uno tribunali exclusus , redit ad aliud ; semel objecta repetit , permutans verba , non sensa ; rarò proprio nomine id agens ; sed ferè semper alieno ; & (si possit) alicujus Universitatis : aut Cœtus , cujus fit ipse Zelator jurium , patronus , defensor , & caudidicus ; exultante interim hujusmodi cœtu , quod odio alieno suas exerat passiones . Extorquet ille importunus aliquandò literas pro informatione ad Episcopum , & eas in foro , in compitis palàm ostentat , veluti propriæ offensę vindices , & ultrices . Dein verò , citato Promotore Fiscali , easdem publicè , perque publicum Notarium præsentari curat : id unum semper intendens , quemadmodum possit Episcopum contemptibilius lædere , acrius

acrius irritare, ac apud subditos reddere magis exo sum. Non desunt viri prudentes, qui procacem hominem fraternè corripiant, & ultionis divinæ commoncant; ut ab incæpto desistat: sed fortè respondebit iratus: *Nimiùm laesus* (ut sibi videbitur) *nec volo, nec valeo*. Quinimo dicere non verebitur: *Nequam hunc Præsulem tam dirè vexabo; ut tandèm aliquandò præ cordis angoribus animam evomat*. Quid propterea non moliatur, si fuerit aliqua exemptione munitus, procerumque fretus auxilio? Enormi falsitate illius famam tentabit corrumpere, unaquè, aut gradum, aut potestatem adimere: quod si nancisci non possit, anonimis literis inane commentum prosequi non erubescet. Quid ultra? extremè audax, hujusmodi literis Episcopum gravissimis laceffet injuriis, imprecationibus, minis. Interim verò, apud simplices deplorabit suæ sortis miseriam, simulans se, cum velit, ad pedes Episcopi fune ad colulum appenso, veniam petiturus provolui, superbè rePELLI: ab eo, scilicèt, qui apertis præcordiorum brachiis illius penitentiam ex animo præstolatur. Quod hæc, & atrociora contrà Præsulem vigilem aliquandò fieri contingant, & plurium Diœcesum visitatione, ac gubernio, certissimè comperi: sed etiam comperi, facillimè ab Episcopo, & elui objecta, & dilui maculas, & famam tergi nitidiùs: juvante Deo, eique favente, qui pro se patitur diffamationis martyrium. Idcirco Episcopus nunquàm cesset à procuranda tam procacis, & pertinacis adversarii salute, modis quidèm omnibus; sed citrà assentationem, aut metum. Illius astus, ira, livor, odium, ejus constantiam minimè frangent; sed pro solatio meminert, quam graviores, tetrioresque notas Divus

26 DE CONSOLATIONE

Carolus, fortior, illustriorquè pertulerit; quandò de hypochrissi, de perviciacia, de imprudentia, de affectata in patriam Tyrannide, de summi Pontificatus ambitu, non Mediolani tantum; sed, & alibi, & publicè convicia sustinuit: præsertim verò, quandò Concionatorem percelebrem, sibi, coram se, multo populo adstante, insultantem audivit. ^{a Epi- stel. 79.} *Profecto Caroli innocentia, & virtus lateret (ut de Rutilio Seneca scribit) nisi accepisset injuriam: dum violatur, effulsit. Perpendite Præsules Ennodii verba, & lætamini: Splendor vite umbram venenata locutionis excludit: auctorem repetunt tenebræ, quæ ad involuendum jubar aptantur: nitorem syderum, nox infusa non obruit: ad genium claritatis, proficit cum obscuritate conflictus.* Longè plura subtexere possem in re copiosissima; verum hæc indicasse sufficiat, pro cunctorum solatio; & illius præcipuè, qui talia fortè aliquando passus, *speravit in Domino, & non fuit confusus.*

CAPUT VIII.

De Accusatione.

E piscopi, dicuntur quidè ex munere Angeli; sed tamen verè sunt homines, & pro imbecillitatis humanæ conditione, utiquè labi possunt; quos propterea, si quandoque labantur, absquè injuria eò convenire fas est, ubi jure ipsorum errata sacro, censorioque judicio vindicentur: quia verò modus in hoc quoquè servari debet, ne fortè nimia libertas, aut lædat innoxios, aut obruat plus æquo nocentes; pro Episcoporum solatio pauca hic referam ex iis, quæ fusè Divus Bernardus scri-

scripsit ad Eugenium III. ad rem nostram sub appellationis nomine opportunè digesta. ^a

a lib. 2.
de Cons.
sideratione.

Appellasse iniquè, iniquum est: iniquè, & impunè, iniquarum appellationum fomes. Iniqua autem omnis appellatio, ad quam justitiæ inopia non coegit. Appellare, non ut graves, sed si graveris, licet. Appellandum à sententia; antè sententiam, improbo omninò: nisi ob manifestum gravamen præsumitur appellatio. Qui igitur, non gravatus, appellat, liquet; quia, aut gravare intendit, aut tempus redimere. Non est autem suffugium appellatio, sed refugium. Quantos novimus appellasse pulsatos, quo interim liceret, quod numquàm licet? Nonnullis etiàm, quoad vixerunt, licuisse appellationis suffragio nefaria scimus: verbi gratia, incestum, adulterium. Quale est hoc, turpitudini patrocinari, quod vel maximè formidari à turpibus oportebat? Quousquè murmur universæ terræ, aut dissimulas, aut non advertis? Quousquè dormitas? Quousquè non evigilat consideratio tua ad tantam appellationum confusionem, aut abusum? præter jus, & fas, præter morem, & ordinem fiunt. Non locus, non modus, non tempus, non causa discernitur, aut persona. Præsumuntur levitèr passim; plerumquè & nequitèr. Volentes malignari, nonnè his potissimum terreri solebant? Nunc terrori ipsi ex his magis fiunt, atque id, bonis. Antidotum vertitur in venenum: non mutatio dexterae Excelsi hæc. Appellantur boni à malis, ut non faciant bona, & supersedeant à voce tonitruï tui formidantes, Deniquè appellantur Episcopi, ne illicita audeant matrimonia solvere, vel prohibere. Appellantur, ne rapinas, ne furtâ, ne sacrilegiâ, & quæ hujusmodi sunt, ullatenus, vel cohibere præsumant, Appellantur, ne indignas, & infames

personas à sacris officiis, à beneficiis, repellere seu amovere queant. Hæc, & alia plurima Divus Bernardus loco citato. Quia verò Pater Narnius, ex Ordine Capuccinorum, quondam Concionator verè Apostolicus, affert ejusdem Sancti auctoritatem, & egregiè Prælatorum egit causam in Vaticano coràm Summo Pontifice, & Sacro Eminentissimorum Cardinalium Collegio; placet hic ejus verba referre.

Nunc adeò crevit in Populis, ac Religionibus petulantium insolentia; & adeò benè sciunt iniqui, se bracteare, ac minio pingere; quod nisi foret hujus Sanctæ Sedis summa prudentia, & vigilantia; pariterquè discretio, & constantia hujus Sacri Senatus, qui veluti scopuli frangunt, & retundunt importunorum undas, insanosque furores populorum, & religiosorum insolentium; equidèm credò, quod jugum Divina legis excutere omninò satagerent, & sensus, carnisque legibus à Statuis gubernari: & fortè, fortè antiqua illa confuso rediret, quam Sanctus Bernardus suo tēpore irrepsisse lacrymabilibus verbis Ep. 178. deplorat.

(Vox una omnium, qui Populis præsunt, hæc est: justitiam in Ecclesia Dei deperire, annullari Ecclesia claves, & Episcopalem omninò vilescere auctoritatem: dum nulli Episcoporum licet, illicita quævis castigare. Causam referunt in vos; quia rectè ab eis gesta, destruitis; & justè destructa, statuitis: Quique contentiosi de populo, aut de Clero, pulsati currunt ad vos redeuntés jactant, & gestiunt; se obtinuisse tutores, quos sensisse debuerat ultores.) Id autem eo tempore adeò præjudicabat Ecclesia, ac Religionibus, quod propterea Prælati, confusi, ac territi, relaxarint Ecclesiasticam disciplinam, ac regularem, impudentium collo frana projecerint; regimen renuntiarint: ab Ecclesia-

rum residentia recesserint: & Magistratus profani sacras jurisdictiones usurparint: auctoritas autem Divina humi jaceret; Hereticorum, & populorum linguis depressa. Sacri enim Gubernatores brachium exigunt, brachium exigant; exigunt estimationem; & Prælati exanimes, & despecti, neque secundum Deum gubernare possunt, nec sustinere pondus regiminis Apostolici. (Episcopi (subdit Bernardus) ubique veniunt in contemptum, & in opprobrium: dumque eorum recta judicia contemnuntur, plurimum Apostolicæ Sedis auctoritati derogatur: ipsi enim sunt, qui vestra pro pace, & exaltatione laborant. Quid vobis vires minuitis? Quid robur vestrum deprimitis? quid retunditis arma militantis vobis.)

Hæc Apostolicus Concionator in Conc. 5. feria quarta Tertiæ Dominicæ Adventus; in alia verò habita feria sexta secundæ Dominicæ Quadragesimæ coram iisdem ita loquitur.

Roma, cum audis, quod Prælati bella gerunt, & in Populis, ac Religionibus rumores faciunt, ne mireris; Nec eos (ut assoles) quadam tua dyalecto, fastidiosos, & indiscretos appelles: verum, potius gaudeas, audias, expendas, defendas: & animadvertes, quod id signum est, eos pugnare, ac in turri vigilare: quod sine bellico rumore, ac strepitu fieri minimè potest. E contra verò, cum sit silentium, & populi canunt, rident, laudant, plaudunt; tunc time, & (penè dixi) pro certo habeas, adorari vitulum; dormire custodes, & vigiles; vineamque Dei depradari, & vindemiari à latronibus. Quandoquidè, à sana mente capi non potest, quemadmodum gubernare quis valeat secundum cor Dei; contra vitia pugnare; populorum corruptelas evellere; Religionum relaxationes ex-

30 DE CONSOLATIONE

tirpare ; bellum inire adversus Principes , & potestates tenebrarum harum ; animasq; ad Cælum ducere per vias arduas , inaccessas , & sensui , carnique contrarias : & tamèn amari ab omnibus ; & bonis , scelestisque placere ; gubernare cum silentio , absquè contradictionum strepitu , & quin fiat scopus maledicorum , & persecutorum : hoc (inquam) à mente sana capi non potest ; cum dixerit ipse Christus : Si me persecuti sunt , & vos persequentur

Tanti Oratoris verba , hic latinè conscripta multum amittunt nativi candoris , & ingenux gravitatis : cuiusque videre potest citatis locis in fonte . Quia verò materia hæc latissimè patet , de ea etiàm sequenti capite loquar .

CAPUT IX.

De eodem Argumento.

APpellantium , & accusantium versutia quandoquè Sacras Tridentini leges eludit , artesque invenit quibus extorqueat à Judicibus , quod ritè obrinere non potest . Multorum periurio effingitur in Episcopis livor , odium , malignitas . Adversarii se Romæ constituunt , præsertim qui propè sunt ; ubi multis , & malis artibus ergà se commiserationem , contra Episcopos indignationem commovent ; ibiquè rectum iudicium , & non alibi se consequi posse comminiscuntur . Sciunt improbi , hunc , aut illum Episcopum , vel senio confectum , vel semiægrum , vel paupertate gravatum , vel quieti maximè addictum , nolle , aut non valere ad Urbem accedere ; nequè in ea suarum causarum idoneos ha-

habere patronos : & , si habeat , facile posse corrumpi , aut decipi in re non propria . Sæpè multa congerunt , ut Episcopus obruatur copia objectorum . Non rarò , factò agmine , in eum multi diversimodè insiliunt ; ut , quod unus , aut alter non valet , plures obtineant ; nacti grandi numero fidem . In non magna Diœcesi triginta milium animarum , quot putamus reperiri adulteros , concubinos , sacrilegos (ut nequiores reticeam) contra quos opus sit Episcopum insurgere ; illosque admonitionibus , reprehensionibus , mulctis , aliisq; panis pro ratione contumaciæ gravioribus coercere ? Fortè hi omnes pacato animo ab suis nequitiiis , quas impensè depereunt , sustinebunt avelli ? Nonnè plures phrænetici ; & hi potentiores , & nequiores , in medicum , in patrem , in Judicem rabidè insilient ? Qui Deum non verentur , verebuntur Episcopum ? Quid egit mali contra Judæos in vita mortali benignissimus Jesus ? Imò , quid boni non egit ? Et tamèn quam impiè accusatus , quam injustè damnatus fuit ! Numquid ab Episcopis expectamus innocentiam Christi ? Expectemus , habeamus : at non idèò accusabuntur ? Imò , idèò accusabuntur : *Non est Discipulus supèr Magistrum* , à quo propheticè dictum fuit : *si me persecuti sunt , & vos persequentur* . Vir probus accusari potest ; sed non propterea damnari : *nàm quis innocens esse poterit* (ut Juliano Apostatæ dictum fuit) *si accusari sufficiat* ?

Quidam ex Prædecessoribus meis in Ecclesia Bifidia , qui defuit nonagenario major , horrendum est dicere , quot Romæ insectationibus fuerit impetitus ; undè impiorum astu tractu temporis plures Vicarii Apostolici cò missi fuerunt , sublata illi jurisdictione (primus ex

dictis Vicariis, vix eò peruenerat, cum inuitus aliò destinatur; & hoc ad ejus instantiam affabrè à falsario confictam, simulato illius caractere, ac sigillo) Id verò speciali nota contrà dictum Episcopum novus Gerion molitus fuit: Romam se contulit, ibique togatus eum accusavit, & Testes adhibuit, quorum unus, & alter ipsemet extitit, modò capillatus, & postea tonsus, ac diversimodè indutus, fronte, voceque mutata, Veruntamen, quàm bonus esset Episcopus, vel ex eò colligi potest, quod tempore memorabilis seditionis in toto Regno Neapolitano, cum quodam manè valdè diluculò ex ædibus egrederetur, missum excepit, qui præcedenti vespere trës ejus Nepotes (unum Baronem, duos alios Equites Hjerosolymitanos) in convivio à perduellibus occisos fuisse nunciavit. Hac suæ domus extrema clade percepta, procubuit, terram osculatus, extensisque in Cœlum manibus, ait: *Dominus dedit, Dominus abstulit: sit nomen Domini benedictum*. Hæreditatem postea defunctorum nepotum adivit, & ejus Hæredem Divæ Annæ illustre sacellum instituit. Prætereà, vel ipsum senium reddebat Episcopum venerabilem: at periti homines ejus caniciem non sunt veriti per calumniam maculare juvenum vitiis.

Novi quosdam, & ex his etiàm Ecclesiasticos, qui unà convenientes, de superiore conquesti, crimen effingebant, de quo ipsorum quilibet eum diffamare pollicebatur, hoc pacto, ut id à pluribus rescivisse diceret: quo commento, Urbem totam, vicinasque Regionem malus rumor facilè, ac brevi excurrebat. Hic, & hujus generis alii optimè norunt, e mentita non forè diuturna; sed lucrum putant, vel lacerasse innocentem,
vel

vel aliquatenus illius obnubilasse splendorem, vel red-
didisse suspectum, vel denique præcidisse progressum.
Celebris erat in Indiis cujusdam Nobilis fama, sed ma-
lis inuisa: qui, nè is fieret in illis partibus Prorex, da-
tis literis in Lusitaniam, morbo correptum, & ab ali-
quo tempore non sui compotem evulgari ab amicis in
Aula Regis curarunt: non tamen iuvit iniquos astutia;
quia prudentissimus Rex eundem instituit proregem, &
aliud substituit; si, cum Naves Goam appulissent, eum,
vel superstitem, vel infirmitate aliquâ, Prefecturæ ap-
tum non reperissent. Ergo, sanus, & sui compos inuen-
tus, supremum illud gubernium suscepit; eoque su-
scepto, Versipelles illi, qui contra eum scripserant, plus
cæteris de ipsius dignitate gratulari, & gaudere visi
sunt. Jam olim legi ego literas cujusdam Episcopi Car-
dinalis ad suæ Diæcesis Virum primum, quibus eum
monebat, rescisse, quanta malignatus fuisset adversum
se, ne Pontifex crearetur in pridem absoluto Conclavi.
Passim igitur mentiuntur iniqui delatores, & appellan-
tes, variâ quidem intentione; sed semper ut noceant.
Verum, hoc grande malum, quod propinquiore Episcopos
adeò inquietat, vel saltem occupat, remotiores
vix unquam molestat. Idcirco quidam Archiepiscopus
in Indiis, minantibus aliquando recursus, subridens,
ajebat: *Ego longè propior Urnæ quàm Urbi.*

Ut se, quidam seductor, suosque affectas ab Episco-
pi Jurisdictione petulanti calliditate subduceret, sem-
per lividum, malignumque appellabat; quo permotus
Episcopus, ne speciem veritatis calumniæ daret, cum
scandalo Pusillorum; cum, suosque impunè peccare
sinebat, quos certè noverat, habituros Deum ultorem.

Id autem facilius assequuntur Urbi viciniore, quò minimis expensis brevi se conferunt; vel inibi propinquos, amicos, concives habent, eosque Aulicos, aut Aulicorum, seu Magnatum familiares, vel saltem famulos; quibus aliquando mercedis, gratiæ, beneficii loco, favor, defensio, protectio in ipsorum Clientes defertur. Qui verò alicubi potentum negotia gerunt, patrociniæ pro stipendiis exigunt; eisque freti quàm maximâ immunitate fruuntur (plerumque in suarum animarum perniciem) & in calumniis eò majorem fidem inveniunt, quò suorum Patronorum temporalia bona fideliùs administrare putantur: ita fit, ut illæsi, acriùs lædere queant, & impunè mordere.

Sacri Concilii Tridentini Venerabiles Patres à Spiritu Sancto illuminati, & edocti, multa (ut jam dixi) de Episcoporum causis, & de appellationibus ab ipsorum sententiis optimè decreverunt, quæ videri possunt, præsertim sess. 13. cap. 5. 6. 7. & 8., & sess. vigesima quarta cap. 5. 10. & 20. Solari debent Episcopos, quæ dictis locis ad ipsorum favorem sanctissimè decernuntur: & si fortè impiorum nequitia quandoque irrita fiant; magnâ fiduciâ expectent auxilium à Domino, *qui tandem malignantes exterminabit*; & in quolibet Episcopo iniquè vexato *exaltabit cornu Christi sui*. Non despondeant animum; sed audacter, ubi opus fuerit, se, justitiamque defendant, reosque jure insectentur: nam (ut scribit Sanctus Cyprianus) ^a *Si ita res est (Fratres, ut nequissimorum hominum timeatur audacia, & quod mali, jure, & equitate non possunt, temeritate perficiant: actum est de Episcopatus vigore, ac de Ecclesiæ gubernandæ sublimi, ac divinâ potestate. Pellat ergo timorem charitas;*

^a lib. 2.
Epist. 3.

ritas; tendat patientia vires: nam veritas salvabit vos, & mendaces offendet, qui maculant vos, & dabit vobis claritatem aeternam. Dicamus audenter cum Paulo: ^b Gloria nostra hæc est, testimonium conscientia nostra: ^{b 2. ad Corint. 1.}

Nam hæc mille testes. Ipsemet plures ex Eminentissimis Cardinalibus nuper audiui, detestari, & abominari petulantissimos nostri temporis adversus Præsules malignantium recursus; & horum causâ jam quosdam damnasse Triremibus. Non ultio placeat, sed zelus; qui utinam, vel sic, vel pœna tallionis obstruat ora loquentium iniqua; ne sacri Antistites, dum occupantur in defensione propriæ innocentiae, retardentur ab infectione alienæ malitiæ. Verùm hæc nihil proficiet adversus sanctum Domini; sed illustriorem faciet, quem obnubilare curavit. Ita Cassiodorus in persona Theodorici ad Antonium Episcopum Polensem:

Sanctitatis vestrae animus non gravetur, nec fallacibus verbis doleat accusatum. Multo major est opinio purgata, quàm, si, ^{c. lib. 4. vaviar. Epist. 11.}

desinentibus querelis, non fuerit impetita. Nusquam Episcopi uberiores consolationis venam reperient, quàm in iis malis, quæ ipsis ab Urbe inferri adversariorum dolus molitur. Exultant ipsi, & insultant, cum propriâ versutiâ per obreptionem, aut subreptionem quidquam contra illos extorquent. Diù aliquandò per effusas ambages, per insensibiles technas triumphant, longo, diroque martyrio Episcopos divexantes: at Divini spiritus lux indeficiens, quæ Romanæ Curiae linceos oculos perennis illuminat, detectis malarum artium nebulis, tenebrisque falsitatis, vel serò depulsis, quantis gloriæ radiis, quantis splendoribus Episcopos antea multâ caligine opertos illustrat? Tunc quanto

36 DE CONSOLATIONE

affectu eos Roma complectitur ? quantâ æstimatione collaudat ? quantis viribus , quanto conatu defendit ? Ipsimet adversarii præ confusione tabescunt , præ dolore deficiunt , & præteritæ nequitiae poenas amarissimas luunt . Felices ergo propiores Urbi , cujus gloria est , non tam nocentes plectere , quàm innocentes benignè , strenuèque tueri ! & quamquàm id etiam in longè remotos agat : Non tamen hi ad eam tam faciles habent sive accessus , sive recursus . Hæc eadem ratio solari debet Episcopos , quoties illos aliorum odium , quo quomodo Romæ insectatur (ut hujus operis decursus ostendit) nec eam ipse ulterius repetam ; cum id experientiâ magistrâ ubique , ac semper cunctos edoceat .

C A P U T X.

De Litibus .

P Ræfati recursus in criminalibus adversus Episcopos trahunt me ad alios in civilibus , quibus ipsorum corda æquè , si non acriùs , vexantur . Eorum , quæ Deo sunt dicata , rerum , jurium , personarum , Episcopi ex officio Judices , & defensores existunt ; & si ea , vel minimum lædi permittant , gravissimè peccant , & censuris Ecclesiasticis irretiuntur . *Nihil est tam sacrum , quod sacrilegum non inveniat* . Equidem puto , in Ecclesia Dei per totum Orbem diffusâ nil magis controverti , quam jurisdictionem , libertatem , & immunitatem Ecclesiasticam : & utinam solummodo Laici adversarentur ! Verùm , id aliquando pervicacius

cuius fit à quibusdam Ecclesiasticis contra Sacros ipsorum defensores, & Judices. In singulis: differentiarum, litiumque origo est arrogans quorundam inscitia, & nesciens arrogantia. Ignarus non audet contendere; sapiens cum docto non pugnat. Primus cedit, quia non intelligit, alter convenit, quia merita causæ, vel docto clarè demonstrat, & flectit; vel sibi à docto clarè demonstrantur, & flectitur: qui verò, nec omninò ignarus, nec verè sapiens existit, audet contendere, quia quædam intelligit; & nunquam convenit, quia doctiorem flectere, vel ab eo flecti non potest, dum arrogantè putat scire, quod nescit. Episcoporum scientiam approbavit coram Pontifice Doctissimorum examen; auget studium; firmant Prudentum consilia; fovet Vicariorum, Auditorum, Assistentum discussio; dirigit Spiritus Sancti gratia, quam suis Orationibus, & piarum animarum suffragio postulant. Minimè igitur suspicari quis potest, eos tempore quidquam velle juri contrarium. Accedit, quod cum sibi successores non eligant, nec hæredes instituunt, & mortem, ac iudicium imminere sat benè intelligant: non utique credendum est, eos gratis ultra debitum pedes, manusuè proferre, spinis & tribulis configendos. Quis quietem oderit, anxie quærendam? Quis pacem fugiat, ad cuius amplexus, vel per arma proceditur? Sed jura Ecclesiæ Episcopi etiam per quietis, pacis, bonorum quinimò, & sanguinis, & vitæ profusionem tueri debent; id exigentibus officio, & juramento, quibus obstricti sunt. Si hæc omnia seriò quisque perpendat, nemo erit, qui non cedat Episcopis; vel eos cogat litibus implicari. Magna ipsis irrogatur injuria, cum eorum conscientia ità.

38 DE CONSOLATIONE

itâ coarctatur, ut peccent, ne litigent. *Satiùs est incidere in manus hominum, quàm in manus Dei viventis*, cujus est Episcoporum actiones strictè disquirere; præsertim ubi de Ecclesiæ juribus agitur. Felices Episcopos, quorum subditos, docilitas ornat! Verùm, inter tot impossibile ferè videtur, vel unum saltem non reperiri ceruicosum, refractarium, protervum (uno

a Prov.
16

verbo) perversum: nam *a homo perversus suscitât lites*. Is alios trahit in suas partes, & devios abducit. *Multa sunt falsa probabiliora veris* (ait Philosophus), & hujusmodi falsis rationibus litium suscitator, legibusque malè intellectis, seducit ignaros, & subjectos efficit perduelles. Pessimè dictum: *hoc à superiore malè præcipitur: suæ auctoritatis excedit limites: ledit privilegia: justas consuetudines abrogat: antiquos possessores extrudit: nimium gravat: imperitè gubernat*. Hujusmodi censuræ sunt seminarium dissensionum, & fomes litium. Vix ullum præceptum, decretum, aut edictum fiet ab Episcopis, quod homo perversus, aut parum, aut nimium sapiens, non audeat arguere. Qui nolit argui, hoc unum agat, ut nihil præcipiat, statuat, decernat, ordinet, mandet, nisi prius à cuncto populo, & ab audacioribus populi fuerit approbatum. Quàm convocare omnes, tam eos omnes in unam convenire sententiam, est impossibile: vel unus inter tot perversus jurgia suscitabit, & lites. Audiant subditi, & benè perpendant Divi Greg: Nazianzeni in oratione ad Julianum sanctissima verba: *Oves Pastores nè pascite, nec supra fines vestros assurgite; satis enim vobis est, si rectè pascamini. Judices ne judicate, nec legislatoribus leges præscribite. Utinam itâ fieret! Jurgia, litesque cess-*

cessarent; nec oves in rabiem versæ à se Pastores averterent, & distraherent. *In omni discordia ferè semper tota Episcopi culpa est* (ut Bernardus ait) ^{b Epist. 152.} *quod culpas redarguerit Clericorum*. Eja boni Pastores, obligationem vestram optimè scitis: quæ spectant ad Ecclesiam, non sunt vestra, sed Christi. Pro illorum defensione possetis bellum indicere, si vires adessent: debetis animas ponere, vitamque profunderè, si necessitas exigat. Sacri Canonès, strictè præcipiunt: id in vestra consecratione jurastis: id egere Sanctissimi Præsules; id præstitit per longas lites, & per beatam mortem invictus ille Thomas Cantuariensis, adversus proprium, & potentissimum Regem. Insurgant oves, latrent, obmurmurent, mordeant, non ampliùs mites oves, sed rabidi canes. Non vos expensarum summa retardet; minuite domus impendia, & quod pauperibus clargiri debetis, expendite in lites, si utrumque fieri non potest. Grande profecto Episcoporum in litibus solatium est, ad eas cogi, & non cogere: non enim fieri potest, ut Judices spontè Rei evadant in causis ad se pertinentibus: Actores oportet, ut sint, qui vos à vestro tribunali pertrahunt ad aliud, eoque conventos, ire compellunt.

Novi amicum Præsulem à jurgiis, & litibus adeò abhorrentem, ut spontè amiserit aliquot aureorum millia, quæ propria ipsius erant, ne judicio contenderet: hic tamen, quæ sui muneris agnoscebat, magno dispendio tuebatur; nec quieti, nec labori parcebat; spernebat odia, opprobria, contumelias, paratus mori, si opus fuisset. Litigabat inuitus, & in litigando pirissimè torquebatur; sed expectabat de tortura mer-

cedem, grandique constantia dicebat: *id ago, quod quilibet Sanctus Episcopus ageret: si non facerem, mercenarius, proditor essem, non Pastor, & sponsus. Immineat mors, & id ex revelatione cognoverim; usque ad ultimum alitum. Ecclesiam, & quæ sunt Ecclesia, ac proprii muneris jura tuebor. Si Judex superior aliter sentiat, judiciumque contra me ferat: cessabo à litibus; non alius ascendam; & pacatâ conscientia, meis partibus satisfecisse letabor. Compensabit utique Deus, qui nec falli, nec fallere potest, aterna retributione amissas expensas, & damna judicii.*

Bonus Episcopus, *nec timeat lites, nec inferat*: quæ privatam respiciunt personam, facillimè cedat; quæ publicam, strenuè defendat: quæ verò ad Ecclesiam spectant, nec minimùm lædi permittat. Id agat in proprio foro perquam dulciter, servatisque servandis, nec antea per viam judiciale incedat; quam extrajudiciale priùs frustrâ probavit. cum verò in alio convenitur, præstet coactus; quòd debet; nè suâ culpâ Ecclesiæ jura, & Episcopalis officii quidquam patiantur: ea namque tanti sunt ponderis, ut nèc proborum arbitrio ritè committi, vel transigi possint, nisi Apostolicæ Sedis consensus accesserit. Vetant leges inter patres, & filios etiam emancipatos agi, quorum lites jubent summarie componi. Quantò æquius, & opportuniùs id fieret inter Prælatos, & subditos; cum illi potiori jure dicendi sint patres, & isti filii, nulla unquam emancipatione ab eorum patria potestate soluti!

CAPUT XI.

Brevis Apologia pro Episcopis non ritè conventis .

D Amnant ferè omnes , & execrantur , contra Episcopos ultra modum , & sine modo auctos recursus , eorumque tam in qualitate , quàm in numero excessus . Verùm , eis viam præcludi non posse videtur ; quandoquidè inter tot egregios , & insignes Episcopos reperiuntur aliquot , rari quidè ; sed turpi notâ degeneres , quos compescere magnoperè oporteat . Hæc tota ratio , eos conveniendi , & liberrimè , ac perpetim vellicandi : at fortè propterea omnes , & bonos , & malos ? *Premet insontes , debita sceleri , noxia pœna ?* Liceat mihi pro consolatione optimorum Præsulum hic pauca subtexere in ipsorum defensionem .

Quo tempore Dei Ecclesia formosius enitebat , purpurata Martyrum sanguine , turpius à Dæmone fædabatur : detracto enim fidelibus Christi nomine , alio , & planè infami eos vulgus urebat , Gnosticos appellando . Gnostici hæretici erant nequissimi , à Catholicis Christianis longè diversi , à quorum sanctissimis legibus in pessimos errores desciverant : quia tamen se Christum sequi per quam impiè profitebantur ; Principes , Populi , Ethnici omnes cunctos Christianos , etiam veros , Gnosticorum nomine compellabant , ac si eorum spurcissima dogmata Catholicis quoquè essent communia . Idcirco , & sanctissimi viri , & virgines innocentes , non ampliùs , ut Christi fideles , sed ut nefarii Gnostici rapiebantur ad necem . Horrendum di-

Atu! Eos pati, ut impios, qui pro pietate moriebantur, & fœdissimè supersticiosos haberi, qui vitam pro immaculata Religione amittebant. Quis non videat. quàm iniquum fuerit, non discrevisse Gnosticos à Catholicis, malos à bonis? Et ergo æquum erit, nocentes Episcopos, & innocentes unà complecti, & unius, vel alterius mali Præfulis improbitate optimos quoque damnare? Episcopi erant Apostoli, & inter hos Episcopos Judas, cujus Episcopatum alter accepit. Num ergò Judæ avaritia, proditio, & reliqua scelera cæterorum Apostolorum inclita merita, præcellissimam sanctitatem inficiunt? Cecidit Lucifer de Cœlo, & unà cecidit Angelorum innumerabilis multitudo; non tamen propterea sublimes illos spiritus, ejusdem naturæ consortes, qui permanserunt in stationibus suis, minùs, segniùsque veneramur. Quinimò indè impensius eorum merita extollimus; undè turpiùs aliorum perfidia corrui. Ita ergo, ut optimi Episcopi sua bonitate perversos non ornant, neque perversi optimos suâ malitiâ deturpent. Dedit Græcia Nicolaos, Basilios, Gregorios, Chrysostomos, Flavianos, Ignatios, aliosque sanctissimos Præsules: verùm horum gloriam, vel minimùm præstrinxere Nestorii, Eutychetes, Nestarii, Fotii, ceterique pessimi Græcorum heresiarchæ? Neutiquam. Ut quid ergo paucorum, non in dogmatibus, non in fide; sed in moribus crimina, tot inter latinos egregios Antistites lædant, ut reddant cunctos, aut saltem plerosque suspectos? Coerceantur mali, plectantur, amoveantur: at maneat bonis immunitas; decus, auctoritas, ne aliena iniquitate vilescant, & à subditis contemnantur.

Hu-

Hujusmodi contagiosa lues, quam venti malignantium ab infirmis Præsulibus in sanos quoque detorqueant; ut à supremo Principe, & à sacro Magistratu spirituali sanitati præfecto veluti suspecti habeantur; non admodum longa spatia percurrit; & vix remotam aliquando Regionem invadit. Magno tractu ab Urbe distantes, & itineris difficultas, & expensarum inopia, illæsos, incolumesque dimittit; quin etiam, & si quem sustinent morbo infectum, silentio premunt. Quemadmodum syderibus in Cælo Solis vicinitas obesse videtur, ita etiam in terris supremi luminaris propinquitas minoribus stellis officere: vel quia excessu lucis patiantur ecclipsim, vel quia propiores quævis nubecula obumbret: attamen secus accidit; nam proximi fulgoris prudentissima virtus nebulas omnes citò dispellit, & proprium cuique syderi decus reddit. Hoc autem decus, quàm ingens incrementum refert ex approbatione Romana! Hinc infectantis confusio, hinc oblatrantis silentium, hinc malignantis damnatio. Qui alicubi de contagiosa lue, seu morbo epidemico perperam accusatur, cum subindè, facto periculo, sanus agnoscitur, sospes dimittitur, & ex ejus incolunitatis experimento ipse gaudium, pœnam haurit delator. Multi quidem æstimandus est lydius lapis, qui, & verum aurum, & auri pretium discernit: verum longè pluris faciendum Urbis judicium, quod non modò bonos Præsules, vel serò approbat; sed & probatis addit fulgorem, quò illi tamquam sydera verè aurea in Ecclesiæ Cælo renident. Cunctas hujusmodi Cœli Stellas (quarum vix paucas agnoscunt errantes) etiam laici Principes quam maximè venerantur, & eas

(ut proficuos influxus in aulam quoque refundant) inter præcipuos Consiliarios adsciscunt ; quinimò , & Provinciarum , & Regnorum illis gubernia committunt ; præsertim in Indiis , & etiam apud nos in Trinacria , ubi Proregibus morte sublati , & nullo ex substitutis ibi reperto , ad sacros Antistites regimen omne devoluitur , donec subindè à Regibus provisum . Etiam Pontifex , & impensius , Episcopos , quos fratres appellat , honorat , eosque , in partem sollicitudinis suæ , à Spiritu Sancto vocatos , exaltat . Ipse , quos prudenter eligit , sapienter gubernat ; & injustè vexatos , strenuè defendit . Quanti eos æstimet , præsertim in gravissimis totius Ecclesiæ necessitatibus , ac negotiis ; Concilia Generalia , & in primis Tridentinum , fatentur . Id benè agnoscunt Delatores Episcoporum , qui eorum causas à Pontifice , ac etià à sacris Purpuratorum Congregationibus ad alia tribunalia detorquent ; ut illos unâ privent , & favore supremorum Judicium , & honore . Verùm , quibus tanta potestas inest , & coercent malignantium ausus , & astus eludunt ; nec finunt insontes Episcopos , aut poenam , aut notam ferre peccantium . Et optimè quidè , nè minoris æstimari videantur Sacri Antistites ab Ecclesia , quam Laiçi Proceres à Magistratu profano , qui eos impensè tuetur , & eorum injurias , calumnias , & quascunque vel minimas offensas magno ulciscitur zelo . Episcopalis dignitas id potiori jure meretur , cui à Deo potestas est in Principes , Duces , Reges , Imperatores , qui revereri debent in suis Episcopis , non dico Chrysostomos , & Ambrosios ; sed Judicem Christum , Deum vivum Omnipotentem . Non convenit ergò , nèc expedit ,

dit, ipforum auctoritatem, aut famam ab eis lædi, quibus displicet eorum iustitia, & zelus, coercens, & vindicans perniciosam libertatem, petulantiam, & cætera vitia: nequiores enim sunt, qui contra eos insurgunt, oblatrant, & malignantur. De his ait S. Augustinus: *Cum autem de quibusdam, qui sanctum Nomen profitentur, aliquid criminis insonuerit, instigant, satagunt, ambiunt; ut de omnibus hoc credatur, quod de uno tantummodo diffamatum est.* Oportet considerare Ecclesiarum regimen, ut ingens ædificium, quod diversimodè apparet illud intuentibus in vario situ: aliter enim se repræsentat iis, qui sunt infra, & aliter iis, qui supra: quod Optica satis clarè demonstrat. Intuentur subditi hoc ædificium ab infra, & quæ sunt optimè posita, ea extra, vel contra ordinem putant. Superiores verò desuper idem ædificium contemplantur, cujus partes, ac symetriad facile agnoscunt, & quæ damnant subjecti, ea Præsules approbant. Ità Vigilius Papa, dum Ecclesiæ Apochrysalium ageret Constantinopoli, suspiciens ab infra Romanum Pontificatum, damnabat Sancti Silverii regimen apud Imperatores, quibus audebat polliceri multa, quæ illis à Silverio negabantur, si quando ad eundem Pontificatum ipse sublimaretur. At, ad illum evectus, tantum regimen de superiori loco aptè contemplatus, promissa negavit. Ità etiam Æneas Sylvius, infrapositus, quædam scripsit de auctoritate Concilii supra Pontificem, quæ postea de altissimo Petri solio, Pius Secundus effectus, idem ipse damnavit. Adeo diversa noscuntur, quæ infra, & supra videntur. Idem fieri oportet in his, quæ propè cernuntur, & procul. Itaque nil temerè judi-

46 DE CONSOLATIONE.

judicandum de Prælatorum regimine, cujus aspectus à loco, à distantia à personarum conditione alteratur.

a am.
464. n.
ult.

Quisque perpendat quæ narrat, & monet Baronius.
Ne mireris (inquit) Lector, Romanum Pontificem Hilarium adversus Mamertum adeò vehementer insurgere, virum (ut declararunt eventa) sanctitate insignem. In his, quæ contentiosi fori sunt, perfacile est, quempiam decipi. Persimile etiam Sancto Leoni accidit, qui in Sanctum Hilarium eadem fermè ex causâ acerrimè invehctus est. Quis nesciat aliquando accidere, ut falsis accusationibus, & subreptionibus aures Pontificum repleantur, & cum putant agere quod justum videtur, bona fide innocentem exercean. Ita Deus aliquando permittit, ut Prælatorum fidem, & patientiam, dirius probatas, gloriosius in Cœlo coronet; doceatque Judices cautius agere, cum Præsules judicant.

CAPUT XII.

De Carceratione.

DIVUS Carolus Borromæus aliquando in suis ædibus sub custodia inclusus, cogit me vel pauca de Præsulum carceratione proferre. Rarò inter Catholicos accidit, Episcopos domi, aut in turribus, seu castris vi detineri, si de corporali cohibitione loquamur: sæpè verò id aliâ ratione fieri contingit, de quo mox agere instituo. Negociorum aggeres, epistolarum copia, multitudo adventantium, Episcopos egredi prohibent, & domi concludunt. Inopia quosdam, & defectus honesti apparatus in suis ædibus continent.

Alios

Alios foràs progredi non permittit publicè peccantium temeritas; ne cogantur, aut immaturè corripere, aut impunè dimittere, quos fortè per vias offenderint impudentes. Nonnullos in publicum exire vetat Potentum audacia, qua obuii superbè despiciuntur: nec desunt, quos perduellium insidiæ intra suos lares cohibeant. In quadam Urbe Vicarius Generalis Episcopi occisus objerat, sed auctor criminis prorsus ignorabatur: cum autem Dominus loci, Ecclesiæ infensus, ab Episcopo coereretur, ille palam obsequium, & eximiam reverentiam professus, clam ad eum mittit, qui suo nomine dicat: *Scito (Præsul) qui præmisit Vicarium, submittet etiam Episcopum, cujus tonsura, ut parum amplior, ita erit vulneribus aptior.* His verbis, tanquàm catenis, mansit ille domi longo tempore adstrictus. Aliæ quoque rationes, nec paucæ, nec leves, & plerumque occultissimæ sacros Antistites libertate spoliant, & quasi funibus ligant. Eas longum esset referre, ac etiàm supervacaneum; cum ad atrociore poenas opus sit properare. Ità inclusus Episcopus, animum liberum servat, qui nullis repagulis cohiberi potest, quominus, & Dioecesim, & Orbem totum percurrat; ad Inferna descendat, & super sydera scandat, contemplaturus, quæ velit, & capturus ex Dei bonitate de sua carceratione solatium. Exemplum habet Sanctorum Præsulum, Athanasii, Ambrosii, & Chrysostomi, quorum primus in sicca cisterna sex annis, & in paterno sepulchro mensibus quatuor deliquit: alii verò in Ecclesia tanquàm in carcere manere coacti sunt. His addat præfatum, eumque imperterritum Divum Carolum à militibus domi

48 DE CONSOLATIONE

domi clausum ; & ea æquanimittate , atque constantia in suis ædibus oportune se continet , qua tot optimi Præsules uno in loco diu consistere violenter compulsi , & mente libera perstiterunt .

C A P U T XIII.

De bonorum proscriptione , seu expoliatione :

QUælibet Ecclesia sponso Episcopo dotem affert , de cujus fructu alere debeat se , sponsam ipsam , & filios egentes . Non ergo exiguus sufficere , potest , cum in tot partes sit dividendus . Res familiaris , pro ratione dignitatis , non parum exigit : ornatus , mensa , servitium , stipendia , domus , prædia , cultura , reparatio , lites , vix quærunť definita . Ecclesia , ubi speciales proventus non habet , incredibile est , quantum velit : sacra vasa , indumenta , ornamenta , linteamina , luminaria , odores , ministri , chorus , familia , solemnitates , apparatus , & cætera hujusmodi Deo digna , ærarium grande requirunt . Monasteria Xenodochia , seminaria , carceres , pauperes , religiosi , virgines , viduæ , pueri , senes , mendici , peregrini , magnum censum expostulant , quo Episcopus eorum tanquàm filiorum necessitatibus consulere possit . Quid ergo , si dotis fructus his omnibus non sufficiat ? subtrahat sibi Episcopus aliquid , Ecclesiæ , atque filiis : nulli satisfaciet ; murmur domi , in templis , in Populo . Propterea qui Episcopatus dotarunt , prædivites instituerunt . Attamen longa ætas , mala tempora , fluminum rabies , prædiorum , ædium-
que

que reparatio, lites, expensæ quotidianæ, multa-
 que alia Ecclesias ita deglubunt, ut, jam egentes, non sint
 amplius solvendo. Est ergo bonorum expoliatio in Epi-
 scopo! Quem idèò miserrimum fateri oportet, quia
 mendicare non potest, nec stipem dare mendicis. Non
 loquor hic de Præsulibus inter infideles degentibus,
 quorum aliquot vidi pauperrimos: sed utique de ha-
 bentibus totam Diœcesim Catholicam, quorum pleri-
 que gravi egestate laborant: & alii, quanquam divites,
 agrorum fallaciâ, surripientium astu, litium impendiis,
 ita sæpè consumuntur; ut magnam patiantur inopiam.
 Quid verò, si addantur inopiæ debita? Durum est ege-
 re, & debere, durissimum. Hinc citationes, lites,
 monitoria, sequestra, exactiones, tantâ cum Episco-
 palis dignitatis jacturâ, ut unâ quoque auctoritas omnis
 depereat, aut saltem omninò vilescat. Quot curis tor-
 quetur Episcopus ære alieno gravatus, qui solvendo
 non sit? Quoties cum Sancto Paulino Nolensi Antistite
 ad Deum clamat: *Domine, non excrucior propter aurum,
 & argentum: ubi enim sint omnia mea, tu scis*. Solici-
 tudines, animarum guberniō debita, pecuniarum de-
 bitis applicantur, & mendicorum provisor fit ipse men-
 dicus; anxius, inquietus, abjectus. Quæ hinc mala
 sequantur, quis exprimere possit? Unum dicam, &
 illud maximum: ipsa mors Præsulis; exhausto enim
 secundo sanguine, dum plus exigitur, primus in animâ,
 & cum animâ datur. Scio, aliquot hac morte defunctos;
 nec eis superfuisse pro funere censum.

Duri exactores, & creditores increduli, omni pietate
 depositâ, dum usque ad ultimum quadrantem expetunt,
 ultimum anhelitum extrahunt, & mori cogunt, ex im-

potentia morosum . Quos Episcopi adversarios in sua Dioecesi rescunt , eis contra illum mandata committunt : & hi alienis armis eundem duplici vulnere fauciant , & interimunt : propriâ vindictâ , & suorum principalium avaritiâ . Quid non timeat Episcopus inops , & debitor ? Quem itidem non vereatur ? Dignitate , & auctoritate superior , censu sit subditus ; & , ne possit ab ullo vexari , nullum vexare audet , vel nequissimum , quem prævidet , posse fieri exactorem . Certò scio , quemdam Episcopum plura pluries erogasse ultra debitum , ne pro debito , vel etiam dubio , vel non liquido quidquam simile pareretur ; eligens potius misere vivere , quàm ad mortem ita torqueri .

Videt aliquando Episcopus egens , & debitor , suam Ecclesiam , domum , prædia , reparatione indigere ; pauperes , mendicos , debiles , infirmos , virgines , viduas periclitari ; Monasteria , Xenodochia , Seminaria , omni auxilio destitui : dumque , tam inops consilii , quàm æris , meditatur his necessitatibus , utcumque succurrere ; occurrit creditor , & omnem , vel excogitatam facultatem eradit . Petunt Ecclesia , & mensa præsidium ; stipem mendicus ; virgo dotem ; medicinam ægrotus : & ille , quod eis laborando collegit , gemens creditori largitur : huic nempè argentum , sibi confusionem , & aliis inutiles lachrymas dividit .

Nullâ re tam efficaciter potest Episcopus oves sibi concreditas ad optima pascua pertrahere , quàm elemosynarum profusione , quibus viscera charitatis palàm ostendit ; nam præclusa , ut ignota , non profunt . At pauper Episcopus illas petere , non dare potest : & utinam aliquando non cogatur , vel vi exigere , ut vivat . Syra-
nus

nus Populus in Mari Ægeo, charitate, ac liberalitate sui Præsulis, olim defuncti, abjuratis Græcorum erroribus, ad Catholica dogmata fuit revocatus. Nusquam verò tot filios parit Ecclesiæ Episcoporum largitio, quam in Indiis. Utinam in partibus Infidelium Episcopii opibus abundarent! Quot animas hoc pio Christi sanguine, donando, redimerent? Quot ab apostasia, cohiberent? Quot à peccatis averterent?

Puto, Divinam Sapientiam ita disponere, ut Apostolici viri, paupertatem Apostolicam experiantur, ad incrementum virtutis, & præmii; & ne de auro in extremo die rationem reddere cogantur, qui de animarum thesauro sunt judicandi.

^a *Paupertatem Dei Filius concupiscens, descendit; ut eam eligeret sibi, & nobis sua æstimatione faceret pretiosam.* Veræ divitiæ in animo sunt, quæ amitti, vel auferri non possunt. Nihil æstimabilius bono Episcopo, & paupere. Hic, impotens, nulli est debitor, & nudus, expoliari non potest. Errat, qui Episcopatum à pompa, & divitiis metitur. Primi Ecclesiarum Episcopi, & hi sanctissimi, egentes fuere, angustiiati, afflicti, labore quoque manuum victitabant; neque in eis Tyranni quidquam invenerunt, quod raperent, præter vitam. In Syria novi Patriarcham Jacobitarum Antiochenum Mar Andream, qui totam fermè suam gentem Romanæ fidei, & sedi subjecerat, ita pauperem in domo, in habitu, in mensa; ut ea, non tanti Præsulis, sed extremè inopis esse videretur. Apparebat nihilominus ipse in animo opulentissimus: erat enim Deo plenus, quem qui habet, omnia possidet, & qui non habet, licet ditissimus, nihil habet. Ipsimet Turcæ; auro inhiantes, ab eo nec pa-

*D.
Bernardus
ser.
in
Vigil.
Nativ.*

rum quid expetebant, cum noscerent pauperrimum; sed tamen ob pretiosissimam virtutem impensè venerabantur. S. Thomas de Villanova, lectulum, in quo tandem occubuit, commodatum habere voluit: & D. Carolus Borromæus lætabatur, ære alieno gravari; ut plus daret, quam possideret, solitus dicere: *Indignum fore tam insigni Archiepiscopatu, qui saltem trium millium aureorum non esset debitor*. O verè magnanimum Præfulem, cui parum fuit egenis thesauros largiri; nisi etiam pro eis propriam libertatem creditoribus oppignoraret! Verum, admirandum omnibus liberalitatis, & pietatis exemplum; sed non imitandum, quando quis non foret solvendo.

CAPUT XIV.

De Relegatione, & Exilio.

FErè omnes Episcopi peregrinis præficiuntur Ecclesiis. Aliquot mittuntur ad Indos, & in Americam alii; quidam verò per Insulas dividuntur, & etiam valdè remotas, ut per Luzonias, seu Philippinas. Quod majus exilium? Quæ relegatio longinquior! Quilibet Episcopus residere tenetur, & sive in patria, sive procul ab ea, Ecclesiam habeat, semper est exul: quinimò, magis in patria, quam extra. Poena est exilium, qua reus loco pellitur sibi grato, & ibi esse cogitur, ubi nolle, ob mala, quæ patitur. Nullibi majora invenit Episcopus, quàm in Patria, ubi præter suas, suorum etiam sentit adversitates; & plerumque suos quoquè sibi adversari cognoscit. Ibi minorum obtrectatio, antiquâ cognitio-
ne

ne irritata; ibi æqualium æmulatio, invidiæ percita æstro; ibi nobiliorum contemptus, auctus incremento contempti. Denique malorum cumulus ex propinquo-
rum præsentia, quibus, ni placeat omnibus, displicet: ut placeat omnibus, Deo displicere cogunt. Præsulis, etiam inviti, esse volunt consilarii, arbitri, & directo-
res; ^a *ita ut in uno stipite tota videatur Episcopata pro-* a S. Ber-
nard.
serm. de
verb.
Evang.
dixit
Simon
Peirus
ad Je-
sum in
decla.
s. buno
nos.
genies. Verùm hoc absit in ingenuis, probisque propin-
quis: aderit nihilominus eorum vexatio, & periculum
in improbis, pessimisque nocentibus, qui vel transver-
sali volunt ultione placari; vel iudicis animum indire-
cta comminatione pervertere.

Ideo Summus Pontifex raro præficit alicui Ecclesiæ
oriundum; & qui præficitur, durius exilii mala patie-
tur in patria. Qui verò extra Patriam deportantur Epi-
scopi, se ibi relegatos agnoscunt, ubi usque ad mortem
residere stricto jure tenentur. Hoc exilium à Præsule
Regulari sentitur acrius, cui patria erat Religio, solitudo
Civitas, cella Theatrum. Assuetus quietissimæ contem-
plationi, tumultuanti exponitur turbæ; sacroque otio
privatus, jugibus, & sæcularibus implicatur negociis;
audiendis causidicis, dirimendis litibus, pacandis odiis,
mulctandis nocentibus. Heu! quam atra nox, quam sæ-
va tempestas, obscurat, subvertit serenissimum diem.
tranquillissimam pacem præteritæ vitæ! Sancti Præsules
de cœnobiis avulsi, amarissimè lugent amissas cordis
dulcedines, & novi Jeremiæ, lachrymabilibus Threnis
deplorant interioris Jerusalem desolationem. Sanctus
Gregorius, in omnibus verè magnus, magnum edidit
ejulatum, cum se vidisset de monasterio raptum ad so-
lium; & ejus vocibus cuncti gemunt Episcopi de patria
Reli-

54 DE CONSOLATIONE

Religionis in exilium immensæ solitudinis deportati . Nil ergo mirum, si tot, tantique Regulares, aut semper, aut diù renuerunt ad Cathedras pertrahi, & quod tracti, subindè à Cathedris ad cœnobîa refugerint, ut Esfrehem Syrus, Ammon, Goares, Nilamon, Malachias, Bernardus, Thomas Aquinas, Gregorius Nazianzenus, Petrus Damianus, & mille alii .

Multi etiam ex Sæcularibus præficiuntur inviti, aut præfici constantissimè renuunt; ne libertatem illam amittant, qua privati fruuntur; & ab arbitrariis studiis avulsi, exulare cogantur per inamænâ Fori judicia . Quoties calamum Episcopus arripit exaraturus, quæ meditatur; quoties librum aperit, meditanda lecturus; quoties pedem effert, ut liberiore aere digerat mentis arcana; cum supervenientibus ab inito munere curis, pedem sistit, librum claudit, calamumque deponit; ac tum demum se, non liberum, sed & exulem, servum agnoscit? Si seriò se Præsul æstimet, non se suum esse, sed aliorum inveniet: nempe; subditorum, & singulorum; & omnium . Ita Pastor, ab Urbibus procul, in campis, & sylvis, non amplius suus, sed ovium, eis totus incumbit, easque pascit in die, custodit in nocte; nec unam deserit, quam non reducat errantem; & omnes numerat, ne vel una deficiat . Quàm benè Divinum oraculum Pastorem Episcopum appellat! Neque utcumque Pastorem vocat; sed utique bonum: etenim, minimè bonum, non Pastorem, sed nuncupat mercenarium . Ergo bonus Pastor gaudeat operari, non quæ velit, sed quæ debet; & eò duci, non quò lubet, sed quò ire tenetur; dicatque lætus in singulis actibus: *id nunc gero, quod Deus jubet, quod munus exigit* . Meminerit

nerit in Apostolorum Principe sibi dictum: *Cum esses junior, cingebas te, & ambulabas, ubi volebas: cum autem senueris, alius te cinget, & ducet, quo tu non vis: id autem intelligat, tam de moribus animi, quam de gressibus corporis; & utriusque præcincti ad opus, alio (nempe Deo) præcingente, & movente. Ita erit in exilio probè occupatus, donec revertatur in patriam illam, ubi non ampliùs hospes, & advena; sed erit in æternum civis Sanctorum, & domesticus Dei.*

CAPUT XV.

De damnatis ad opus.

INter antiquos martyres aliquando viri nobiles, & ingenui damnabantur ad opus, & illud servile, ac laboriosum: ut erat Agrorum cultura, & custodia gregum, & armentorum. Hac pœna plexus fuit Hormisdas Persa ex Illustrissimo genere Achemenidarum; hac etiam Armogastus insignis Comes, & eâ demum plures Episcopi, & Episcoporum Princeps Marcellus Papa sub Maxentio Tyranno. Episcopale institutum ad hanc pœnam, & nunc quoque cunctos damnat Episcopos. Villicationis suæ rationem æterno Patrifamilias reddere debent: ergo sunt Villici; & Christi prædia, vineas, campos, & agros tenentur excolere. Quilibet Episcopus est constitutus à Deo in sua Ecclesia, quemadmodum olim Jeremias Propheta in tota Judæa, ^a *Ut evellat, & c. i.* destruat, & disperdat, & dissipet, & adisceet, & plantet. Quando igitur erit ei requies ab opere? Quando namociari licebit; si modò evellere mala germina; modò de-

destruere inutiles arbores ; modò disperdere iniqua semina ; modò dissipare congestas vepres ; modò ædificare turrim , horrea , & celleraria ; modò tandem plantare vineas , & pomaria tenetur ? Serit ipse bonum frumentum ; & inimicus homo superfeminat deinde zizania . Cedit frumentum , aliud inter spinas , & suffocatur ; aliud super petram , & natum arescit : aliud secus viam , & aves Cæli rapiunt illud : quod verò cadit in terram bonam , fructum affert , aliud centesimum , & aliud sexagesimum . Hoc fructu gaudet agricola , eoque compenfat labores irritos alterius seminis malè sati : verum , antequam ipsum fructum in horreum congreget , sudabit , algebit , æstu uretur , & gelu ; sementem excolet , mundabit , secabitque maturam ; triturbabit , purgabit , ventilabit ; molet , in panes coquet ; vixque tandem comedet de fructu manuum suarum . Durius , impensius , molestius laborabit in vineis ; nec merum bibit ex eis , nisi post longos merores . Silvestres arbores reddet translatione , atque insitione domesticas ; nec poma ex eis aliquando colliget , nisi tarda expectatione adoleverint , brumâ , boreâ , sirioque devictis . Hæc , & plura , ut agricola : quæ verò patiat , ut Pastor , ut institutor , ut animalium Eruditor , solâ malitiâ perversè rationalium ; explicari non potest . Interrogatus quidam Philosophus , *quænam inter bestias immanior esset ?* Respondit : *inter feras , Inimicus ; inter cicures , Adulator* . Quot ergo Episcopus subditos habet , aut durè averfos , aut blandè fallaces ; tot bestias nutrit ; & feras , & cicures . De immanibus alibi loquar ; nunc sermo est de aliis , quæ regi , vel invire patiuntur . S. Gregorius Nazianzenus in apologetico mirè describit , & subditorum in uno , & vario , simulque mul-

multiplici animali naturam, & Episcopi in eo regendo laboriosissimam artem. Is ergo sic ait: *si fieri posset, ut ex multis animalibus, ac bestiolis, genere, ac specie diversis, magnis, & exiguis, ferocioribus, & mitioribus, asperioribus, & lenioribus, unum aliquod animal, & bestia una constaret; hæc utique ad mitigandum, si cui crederetur, quantum ei immineret operis, ac laboris; quantum ejus requireretur industria; ut unicuique bestiarum, vel animalium, prout mos exigit singulorum, vel prout natura poscit? quoniam quidem neque eadem vox apta est omnibus, neque eisdem (ut ita dicam) sibilis aguntur; sed nec cibus quidem unus est bestiis; ita ut interdum iisdem ipsis, quibus mitigantur aliæ, ad furorem aliæ suscitentur; quibus ergo se modis singulis, quibusque bestia hujus ille eruditor aptabit? Quomodo se ad uniuscujusque naturam, atque ingenium accomodabit? Non necesse erit eum, cum sit apud semetipsum simplex, & constans, tam fieri varium, & tam in diversa mutabilem, quod poscit ipsa diversitas bestiarum; ut unumquodque animal pro natura, & ingenii sui opportunitate curetur, quod poscit totius bestia corpus ex tanta diversitate compositum, rectè inter se invicem bestiolis moderatis, in pace, ac tranquillitate persistere? Ita ex multis, ac diversis, & moribus, & linguis, & institutionibus, velut unum animal compositum, sibi que dissimile, commune hoc corpus Ecclesiæ, qui instituendum suscepit, ac regendum, cum esse debeat ipse apud se semper immobilis, & idem; necesse habet tamen, singulorum, & moribus se, & institutionibus conformare, ac sermonem suum aptare singulis opportunum.*

Ex hoc eximii Doctoris exemplo, ac similitudine clarissimè constat, quemlibet Episcopum verè damnari ad

opus, & ad opus difficillimum equè, ac laboriosissimum. ad regendum, scilicet, monstrum; & hoc plurium capitum, naturarum, affectuum, & passionum. Quale portentum, audire idem animal ex grandi populo compactum voces edere longè diversas; non quidem ore, sed moribus! Id adeò expavit idem Gregorius, ut propterea fugerit in Eremum; eligens potius, habitare cum Draconibus, quam monstruosissimum animal educare. Verùm, non despondeant animum Episcopi; nam in re difficillima Deus aderit, dabitque cibum idoneum; nempe, zeli, charitatis, & discretionis, quo ei monstrum illud foetu mirabili quotidie filios pariat humanos, rationabiles, dociles, pios, atque devotos. Hac prole, non raro satis numerosâ, gaudere debent Episcopi, tantòque jucundius, quantò mirabilius ex informi seminario formosissimos partus educunt. Itaque sive campos, & vineas colant, sive animalia pascant: habent in emolumento solatium. Labores, fructus, & gloria sequitur, & *virtus ipsa per labores incedit* (ut inquit Hesiodus). Libet unumquemque Præsulem Divi Bernardi verbis ad Eugenium, hortari, & solari: ^a *Agnosce hereditatem tuam in Christi Cruce, in laboribus plurimis. Felix qui potuit dicere: plus omnibus laboravi. Fuit autem hic Paulus Apostolus; qui (ut ait Augustinus) laboravit nobis; hoc est: Episcopis in exemplum.*

^a lib. 2.
de cons.
sca.

CAPUT XVI.

De damnatis ad aliud opus; nempe, ad eruendos, & secandos lapides.

^a Senec
epist.
30.

Non^a est viri, timere sudorem. In eruendis, & secandis lapidibus magnus profectò sudor effunditur, & cum

& cum etiam ad hoc opus damnentur Episcopi, illum timere non debent. Damnantur autem, & perenni labore, cum à Præfulatus initio ad mortem usque corda quædam lapidea de penetralibus obduratæ consuetudinis, tamquam de terræ visceribus, eruere, ac subinde secare teneantur; ut aliquando tandem aptari possint cœlesti ædificio. Quot homines, omni motu, omni sensu, omni vita pietatis carent, & veluti durissimi Iaspides in impietate obduruerunt? Hæc marmora, in obstinatæ malitiæ latebris profundè sepulta, perfodere, exscindere, ad lucem veritatis eruere oportet. Id autem quantum laboris exigit, & sudoris! Par duritiei robur; par ponderi opus. Eruta jam de absconditis marmora, secari debent, & fabricæ, cui destinantur, aptari. Ah! quoties scindi non sistent. Quoties hebetant ferrum! quoties scalpra retundunt! quoties obterunt seras! In marmorum sectione opus est aquâ jugiter manante juvari: & in secandis marmoreis cordibus pro aqua sudor tantum, & perennes lachrymæ inserviunt; quibus tandem, favente Deo, saltem aliquot ad pœnitentiam scinduntur. Maximianus Augustus, Romam ex Africa rediens, Thermas illas ædificavit, quas maximus Assentator de sui Collegæ nomine Diocletianas appellari præcepit. Ut autem opus immensum citò perficeret, Christianos omnes, & inter eos multos Episcopos, ad eruendos, & secandos lapides tanquam reos damnavit læsorum Numinum. Hi verò quantum laborarint, vel rudera tantæ molis ostentant. Quid, si tunc prævidissent, partem operis aliquando cessuram in Templum Deiparæ Virginis, Angelorum Dominae, consecrandum; ibique Ascetas piissimos, ad animæ, non ad corporis balnea, percelebri

60 DE CONSOLATIONE

fama manfuros ? Exultaffent profectò, & magno júbilo labores ingeminaffent, neque fenfiffent. Quam ergo alacriùs Epifcopi omnes eniti debent in eruendis, & fecandis marmoribus, hoc eft, lapideis obftinatorum cordibus; non ad Thermas profanas, & aliquando caſuras inani ftudio excitandas; ſed ad edificandum Templum Deo viventi, in æternum manfurum in gloria cœleſti, ubi Sancti omnes, & omnes Angeli, & Angelorum, Regina triumphant, & ipſi quoque triumphabunt ?



CAPUT XVII.

De Damnatis ad metalla.

Grandis labor Epifcoporum in eruendis, ſecandiſque marmoribus, ad excitandum Templum Altiffimo; ſed longè major eorum exercitatio in fundendis metallis ad ejufdem Templi ornamentum. Non fuerat ſatis Regum ſapientiffimo Salomoni, extruxiſſe Templum toto Orbi celeberrimum, niſi magnificentiffimè ornaffet opere fuſili, ex ære, argento, & auro, ut haberetur ſecundo Regum. Sacri Præſules Eccleſias Deo, non ſolum ædificare, & conſecrare, verum etiam, & ornare tenentur. Pro earum ſpirituſuali ſtructura lapides, & marmora eruiſſe, ac ſecaſſe parum eſt; niſi ad illarum ornatum pretioſa metalla conſlaverint. Creantur anime rationales compacto jam corpore, per cujus venas, & arterias abſque ulla extenſione diffuſæ, illius contrahunt limofitates, & fæces. In his fodinis laborare debent Epifcopi, & de illarum profundo, greas, argenteas, aureaſque glebas eruere, & aſportare de imis ad ſumma :

ma : nimirum passiones , & desideria mala , seu inutilia subditorum , ab inferioribus ad superiora transferre . Angolani Cafres , qui de Africa deportantur in Americam , empti , & innocentes damnati ad metalla , optimè norunt , quàm laboriosissimum æquè , ac periculosissimum sit in Peruanis fodinis hujusmodi glebas eruere , ac erutas ad lucem efferre . Ipsorum morbi , & frequentissimæ mortes id clarè testantur , Pretiosa hæc pericula fodiunt etiam Episcopi ; dum animas virtutibus aptas , vitiis immerfas , aut obrutas , eruere studiosissimè satagunt , in quo labore lassantur , infirmantur , & plerique moriuntur . Oh quàm difficile , quàm arduum , quàm periculosum est , consuetudinarios ab usu divellere ! Id satis apparet in avaris , quos sordidos aptè vocamus : in lascivis , qui congruè cænosi dicuntur ; & in aliis , quorum vitia versa sunt in naturam . Opus est divinum potius , quam humanum . Ita Publicanorum terrea corda , facta sunt ænea ; sordida Zaccharorum , argentea ; cænosa pellicum , aurea .

S. Cyprianus , & ipse Præsul , & Martyr Gloriosissimus , Coepiscopos ad metalla damnatos his verbis ita solatur . ^a *Quid verò mirum , si vasa aurea , & argentea in metallum ; id est auri , & argenti domicilium , dati estis : nisi quod nunc met illorum natura conversa est ; locaque , quæ aurum , & argentum dare antea consueverunt , accipere ceperunt ?* Id habet à Deo Episcoporum charitas , & puritas , & constantia , ut ipsorum curæ subjectas animas , licet sordidas , & cænosas , & terreas , in sui naturam laboriosè transforment . Æs constant durissimum ex cupro pridem æruginoso , & stamno jam flexili : argentum depurant à plumbo peccati , & ab auro scoriam

62 DE CONSOLATIONE

^a Exod
31.

 riam separant infirmarum affectionum . Præfiguravit Deus Episcopos ad metalla damnatos in Beseleel, & Ooliab ; ^a *Quos implevit spiritu suo, & in corde ipsorum posuit sapientiam ; ut facerent Tabernaculum fœderis, & Arcam testimonii, & propitiatorium, quod super cam erat, & cuncta vasa Tabernaculi, mensamque, & vasa ejus ; candelabrum purissimum cum vasis suis : & Altaria Thymiamatis, & holocausti, & omnia vasa eorum, labrum cum basi sua.* Eosdem quoque designavit in ^b Hiram Tyrio artifice ærario ; ^c *quem Salomon elegit plenum sapientia, & intelligentia, & doctrina, ad faciendum omne opus ex ære ;* quo ad miraculum totum Templum ornavit, & incredibili arte superavit metalli pretium, & copiam inæstimabilem . Hac arte pollere debent Episcopi ; utpotè proprio munere ad metalla damnati ; non tantum, ut fodiant, ut eruant, ut coquant, ut purgent ; sed ut præcipuè ornent ex eis sapientissimè fusis, mirabilique magisterio conflatis, non arcam, sed Deum fœderis, templumque, non manu factum, sed spiritu Dei vivi, æternitati dicatum . Hoc opus, hic labor ! Eliquare metalla, genio, vitio, usuque peccandi, durissima ; Inter quæ Hydrargyriou ; Hoc est argentum vivum instabilis voluntatis sæpe miscetur, & inter Artificum manus, aut evanescit, aut fugit . Quam arduum, informare metalla ! Quam operosum cælare ! Verum, quam gloriosissimum, informasse, ac cælasse ? Et hoc Deo, & æternitati ?

Gaudete Præsules, & effusè lætamini : *nam merces vestra copiosa est in Cælis, ubi, & vasa honoris, & simulacra probitatis, opus manuum vestrarum invenietis, in quibus sculpta, vel fusa legentur nomina vestra.* Peris-
sent

sent cenosæ glebæ, durâ metalla, & informia, vasaque iræ: nisi vestro labore, ac sudore purgata vitiis, virtutibus conflata fuissent. Ibi invenientis, & per sæcula semper mansura, lætantes intuebimini vestrum opus Deo charum & (ut jam dixi) æternitati dicatum.

CAPUT XVIII.

De damnatis ad præcipitia.

QUOS nuper vidimus, ad inferiora terræ descendere, ut de illius visceribus rudes lapides, & indigesta eruant metalla: nunc suspiciemus in altum evehî, *ut lapsu graviores ruant*. Erat Romæ Rupes Tarpeja, quæ dicebatur etiam *Robur*, unde plures Martyres fuere dejecti. Episcopalis Thronus est ista rupes, ex qua impelluntur Episcopi, ut cadant in præceps, & collidantur, & pereant. Ante hoc sublime fastigium tectas voragines malignantes effodiunt; ut invisos Præsules secreto impulsu deturbent, & obruant. Quos ipsis præesse non sistent, præcipites agere conantur, ut subsint. Huc dirigunt suas machinationes, & imposturas. Commovent Plebem; suscitant lites; offundunt ambages; ut confusâ vertigine circumacti in foveam cadant illis paratam. Alliciunt familiam, arcana pertentant; proditorem, aut faciunt, aut quærunt: adulterant verba, falsant scripturas: mendacia confingunt, evulgant; ita ut difficillimum sit, eos utcumque stare, qui nihil firmum, nihil stabile sub pedibus habent. At, non raro impii Versipelles in puteum decidunt, quem suis Præfibus effoderunt. *Qui ambulat simpliciter, ambulat confiden-*

fidenter. Ita Spiritus Sanctus affirmat, de cuius fidelitate diffidere, sacrilegum, & hæreticum esset. *Bona menti succurrit Deus*: hùc Episcopus omnes suas actiones, & operationes, rectâ, purâque intentione dirigat, & nil timeat: *Dominus enim supponet manum suam*; & *qui se de supercilio montis precipitandum abscondit*, cum quoque invisibili protectione salvabit.

Concionem aliquando habet Episcopus de suggestu, aut de Cathedra, omnemque Clerum, & Populum Christianæ pietati suis verbis fortissimè adigit. Eo subinde aliò digresso, inimicus homo, altum, occultumque puteum effodit, in quem ille regressus decidat. Clam convenit, & singillatim, quos ab Episcopo noscit aversos, & quæ ab eodem catholicè fuerint prolata, callidè apud quemlibet in prævum sensum deflectit. Facile potest homo versutus simplices, & immemores hac arte decipere, deceptosque cogere, ut paratæ ab eo accusationi subscribant: quibus viribus ipse nixus, remtemerè quòlibet, deferet, ut suum Episcopum magno conatu paratam in foveam cæcus impellat: ille tamen, impulsus, minimè cadet; sed stabit immotus, & impellentis fallacias, & astus detegit, eludet, ridebit. Ex hac filii audacissima impietate in sacrum parentem satis apparet, quæ à perduellibus præcipitia. cuique Præsuli fodi possint. Discipulus Magistrum accusare præsumit; *mutat rotunda quadratis*: quæ de causis Episcoporum Sacrum Tridentinum Concilium statuit, ignorat; & dum agit sophistam, insignem se sycophantam ostendit. Quid non moliatur impius, quando fidei Propugnatorem audet de perfidia incusare?

* *In sublimi fastigio dignitatis non figit gressus stabiles,* <sup>a lib. 2.
de dig.
Cleric.
c. 18.</sup>
nisi matura sanctitatis gravitas (inquit Philippus Abbas). Verum, nulla sanctitas adeò figere potest, quin instabiles perversitas fingat. Persæpè deferuntur Episcopo Virginum, Nuptiarum, aut Viduarum pericula, vel etiam casus; quas, ut eripiat, aut erigat, per prærupta, per ardua, per declivia ire compellitur, & quanquam inoffenso pede opus perfecit: eum nihilominus, si non cecidisse; imegisse saltem, aut cespitasse, Olores evulgant. Quò non descendunt Pastores; ut oves, aut propè casuras, aut jam dilapsas, eripiant? Denique, non desunt internæ vertigines, quibus eorum capita die plerumque rotantur; ut vix stare possint. Periculosa res est, in lubrico magna moles; & contermina sunt præcipitia fastigiis. *Qui stat, videat, ne cadat*; & agnoscens tanti muneris onus, ac pondus, itèmq; altitudinem, & ventorum, ac turbinum deorsum impellentium rabiem, adjutorio Dei firmiter innitatur, prudenterque se gerat; nec timeat: *Angelis enim suis Dominus mandavit de ipso, ut custodiant eum in omnibus viis ipsius; qui etiam in manibus portabunt eum, ne unquam offendant ad lapidem pedem suum*; & corruat. Si quis tamen innocens validissimo malignantium impulsu corruerit; aut adhuc vivens illeßus ad altiora consurget; aut mortuus æthera scandet; & inde manifestabitur etiam hominibus gloriosus; cogetque Deus (ut aliquando fecisse legimus) ejus exuviis, & statuas, & simulacra inclinare cervices. Si olei gutta in Oceanum cadat, desuper semper erit; & si vi tempestatum desidentibus undis ad ima feratur; eis subinde tumentibus exurget in altum. Ita veritas, & innocentia deprimi, non opprimi possunt; & quos

66 DE CONSOLATIONE

depressionis habent auctores, exaltationis sortiuntur ministros. Qui Josephum deiecerunt in puteum; eundem, vel inviti, extulerunt in solium; & adoraverunt proni, quem olim elati deprefferant.

CAPUT XIX.

De Damnatis ad naufragia.

IN Apocalypsi *Populi Aqua* dicuntur, quorum Congregationes efficiunt hoc mare magnum, & spatiosum manibus; ubi Navis Petri modò fluctuat, modò penè mergitur ex ingenti captura piscium: itaque tam ipsi est perniciosa prosperitas, quàm utique periculosa tempestas. Perire tamen, & verum naufragium pati non potest, sedente ad clavum in suo Vicario, marium, ventorum, naturæ Domino. In sinus omnes hæc se navis inducit; eosdemque ipsa, & Oceanus terminos habent: qui etiam illa maria complectuntur, quibus Nautæ ab Insularum frequentia, & numero Archipelagi nomen dedere; ut sunt, in Græcia *Ægeum*, in Indiis *Maldivum*, in *Luzonia Sancti Lazari*, & alibi alia. Ad horum similitudinem unaquæque Diœcesis *Ægeum* dici potest, quod tot Insulas habet, quot Ecclesias includit. Per eas Episcopi animus circumfertur, naufragio semper expositus. Ut est inquieta humana conditio, ferè semper mare intermedium procellis æstuat; nec finit Præsulem Insulas sibi subiectas plerumque invisere, cogique diù in statione manere. Rarò tranquillum respicit, & verè pacatum. Tunc autem dat carbasa ventis; at dùm putat se prosperè navigare, inopinatus Aquilo, aut

a ut Eurus tempestatem excitat, eumque in mediis undis intercipit. Egregius Nauta fluctus eludit, & magnâ se arte tuetur; at ventorum pertinaciâ, marisque rabie plus nimio agitato, cogitur vela colligere, dimittere remos, & malo clavum ligare, non ferente navi gubernium. *Qui descendunt mare in navibus, facientes operationem in aquis multis, ipsi videntur opera Domini, & mirabilia ejus in profundo: dixit, & stetit spiritus procellæ, & exaltati sunt fluctus ejus, ascendunt usque ad Cælos, & descendunt usque ad Abyssos: anima eorum in malis tabescebat: turbati sunt, & moti sunt sicut ebrius, & omnis sapientia eorum devorata est.* Ita Regius Propheta, & maris, & nautarum æstus describit; quos ipse olim in aquis millies expertus, nunc in Populis ferè semper experior. At longè sævior tempestas animorum, quam undarum: has enim agitat motor externus, & nisi impellantur, quiescunt; illos verò commovet, tum propria, tum aliena malitia, nec ulla inquietat necessitas, sed voluntas. Foris, impostor, susurro, correctio, pena irrogata, denegata gratia: intus, præsumptio, suspicio, passio, læsa conscientia, livor, odium, vindicta, fluctus excitant decumanos; ut navim illidant in scopulos; aut aperiant in Syrtes; aut frangant in lictus; aut obruant in vortices; aut absorbeant in profundum. Interim Præsules in malis tabescunt; turbantur, et fiunt sicut ebrii, et omnis eorum sapientia devoratur. Nil remanet amplius, quam, ut clament ad Dominum, *quatenus de necessitatibus errorum eripiat eos; & statuât procellam in auram; & deducat eos in portum voluntatis eorum.* Ita ingemuit in suis pressuris Episcopus ter Magnus Gregorius dicens: *undique causarum fluctibus quatuor, ac*

68 DE CONSOLATIONE

*tempestatibus deprimor. Fufius autem id scribit Leandro
 a epif. Hispalenfi. Tantis (inquit) hujus Mundi fluctibus qua-
 41. 171
 regiff.
 lib. 1. tior ; ut vetuftam, & putrefcentem navem, quam regen-
 dam occultâ Dei dispensatione fufcepi, ad portum dirigere
 nullatenus poffim. Nunc ex adverfo fluctus irruunt ; hinc
 ex latere cumuli fpumofi maris intumefcunt ; nunc à tergo
 tempeftas infequitur. Interque hæc omnia turbatus, cogor,
 in ipfam clavum adverfitatem dirigere ; modò curvata
 navî, impetum fluctuum ex obliquo declinare. Ingemifco,
 quia ſentio, quod negligente me crefcit ſentina vitiorum,
 & tempeſtate fortiter obviante, jam, jamque putridæ
 naufragium tabulæ ſonant. Flens reminifcor, quod perdi-
 di meæ placidum littus quietis, & ſuſpirando terram con-
 ſpicio, quam tamen, ventis adverſantibus, tenere non
 poſſum. Nil minùs, immò plus patitur quilibet Præful
 in ſuo turbulentiffimo Ægeo; ubi deſunt ei ſumma Gre-
 gorii ars, & poteſtas. Procellis expoſitus, certò ſciat,
 ſe aliquando cum Paulo in profundo maris futurum ; &
 cum eodem facturum, non ter, ſed pluries naufragium ;
 & utinam ſalvis animabus, tam ſua, quàm Vectorum !
 Salvabit autem, ſi aliquando dormientem in navicula
 Redemptorem ſuis orationibus excitarit ; qui novit
 etiam in naufragio æternæ felicitatis portum concedere.
 Quam benè igitur (ut liquet ex dictis) Magiſter
 b lib. 1.
 de eru-
 diſſ.
 princ. Angelicus quærens, ^b quid ſit poteſtas culminis ? ſibi re-
 ſpondit : *Tempeſtas mentis*. Verè tempeſtas mentis,
 qua ſemper agitur, & natat. Gaudeat nihilominus
 Epifcopus nauta ; quandoquidem ipſa tempeſtas, aut
 etiam naufragium, eum citius deducet in portum (ut in
 vero mari etiam mihi quandoque contigit) ubi peractæ
 navigationis, Deus erit in ſtatione perpetua, merces
 perennis, & magna nimis.*

CAPUT XX.

De fame, & siti.

QUOD olim plerique Martyres fame, ac siti necati fuerint, sacræ testantur historiæ, præsertim verò id accidit in Africa sub persecutione Wandali-
ca, quando fideles cum suis Episcopis, aut pellebantur in vastissimas Ægypti, & Lybiæ solitudines; aut navibus impositi absque ullo penitus commeatu, si non mergebantur fluctibus, inediâ saltē, ac siti conficiebantur. Mors planè atrocissima, quæ vitam non adimit, sed absumit. Hæc semper imminet Episcoporum faucibus, quorum cibus est subjectarum animarum salus, potus verò lachrymæ pœnitentium. Quoties, & quamdiù ab hoc cibo jejūant, hoc potu privantur! Satagunt, insudant, ut mensam spiritualibus his dapibus compleant, ut pocula pio latice impleant: pereuntes animas omni studio salvare conantur, pervicaces convertere: sed rarus est, qui pareat; multi, qui pereant: & vix ullus contumax aliquando conteritur.

Videt Episcopus in suo Populo plures abusus, & dum veteres curat abolere, novo gignuntur. Luxus, familiarum, & Urbium pestis, in dies augetur; commessationes, crapulæ, census absorbent: lusus impuri, joci procaces, choreæ improbe, obscena Theatra, promiscui sexus nocturni conventus, criminosæ amicitie; vitia, foveant, pudicitiam eliminant, animas perdunt. Episcopus, esuriens, & sitiens justitiam, è suggestu, de cathedra, de curia, voce, scripto, precibus, imperio, ea mala cvel-

evellere studet, quæ tamen fortius radican- tur, & pul- lulant. Itaque fructus perdit, quibus vesci anhelabat; labique aquas videt in præceps, quas ambiebat Deo propinare.

Felix Moyſes, qui potuit manna, & avibus saturare Populum esurientem in deserto, aquisque de petra sitientem abundè potare! Profert Episcopus *panem de Cælo*, carnes Agni immaculati; Divinarum Scriptura- rum *aperit fontes*: at ejus Populus *nauseat super hoc cibo suavissimo, & relictis aquis salientibus in vitam æternam, fodit sibi cisternas dissipatas, quæ lutum continere vix possunt*. Itaque in esuriente plebe ipse inediâ conficitur, & in sitiente tabescit; fame, sitique mori damnatus. In- videt propterea Neocæsariensi Gregorio prosperitatem, qui esuriens, & sitiens, quamdiù vixerat, in populo sibi commisso justitiam; tandem, benè fartus, & sanctè ebrius, mortem obivit: dum tam magnam Civitatem, quàm penè sterilem, aridamque repererat; fidei, cæte- rarumque virtutum planè feracissimam, lacteque, ac melle pietatis manantem reliquit. Verumtamen faciat Episcopus audacter, quod potest; operetur indefessè, quod debet; exequatur prudenter, quod scit: & licet animarum quæstu, poenitentium lachrymis expleri non possit; beatitudinem nihilominus consequetur. Dicit enim æterna veritas: *Beati, qui esuriunt, & sitiunt ju- stitiam; quoniam ipsi saturabuntur*. Illa ergo beata satu- ritas promittitur etiam esurientibus, & sitientibus justi- tiam; quamquam ex aliena sterilitate; ac malitiâ hic eam edere, seu bibere nequeant.

CAPUT XXI.

De Veneno.

UNI Mitridati fortè concederem Episcopatum ambire, qui ab incunabulis veneno nutritus, venena sub insulis timere non posset. Sacrum enim Antistitum prædia, horti, mensa, & altaria, serpentes, aconita, cicutas habent, quibus vita, vel famæ, vel corporis eis aufertur. Hoc unum genus martyrii, etiam hodiè, sublata Tyrannide, clam in Episcopos sævit, non mysticè tantum, sed aliquando etiam physicè: nunquam desunt sacrilegi Parricidæ si putent nesciri (timentes, non cenfuram, sed gladium; & ultionem dumtaxat humanam, non verò divinam) Salutarum Episcopus Juvenalis Ancina, S. Philippi Nerii alumnus, & æmulator: nostris temporibus hac arte sublatus est; alius mihi notus Virus semel haustum evomit, bis propinatum elusit; pluries indicatum non cavit; habens in Deo spem, & fiduciam. Ex venenis autem quædam mortua sunt, quædam viva; hæc in animantibus, illa in toxicis, quæ non omnes Episcopos, nec semper inficiunt: at alia penè omnes, & ferè semper. De malignantibus loquor, qui, juxta Regium Prophetam, *acuerunt linguas suas sicut serpentis, venenum aspidum sub labiis eorum*. Quis unquam Episcoporum, & quamdiù ab hoc veneno fuit immunis? omnes vitiosi sunt contra eos venenosi; cum corriguntur, aut puniuntur, vel etiam timentes corripì, aut plecti, virus minantur, mordent, inficiunt. Sit innocens Præsul, sit rectus, & justus, eorum linguas non effu-

effugiet; sed ipsarum nequitia percussus, tabescet, fietque apud omnes de sospite venenatus. Crimina effingunt, & adeo atrocia, tantâque arte descripta; ut omninò appareant credibilia veris, quibus cum, & prope laceffunt, & procul accusant; in id anhelantes, ut illius, aut famam virulentis notis conficiant; aut vitam infectis delationibus adimant. *Fel Draconum sub labiis eorum, & venenum Aspidum insanabile.* Quoties molliuntur, ut contra insontem iniqui fabricentur processus, ut delegentur Iudices, ut deputentur Vicarii! omni æstimatione, omni auctoritate spoliatum volunt; & si quandoque id assequuntur, exultant, gloriantur, exhibitant. *Verè Aspides sunt obscurantes aures suas, ne audiant vocem Patris incantantis vehementer,* hortationibus, monitionibus, precibus. Non tamen paveat Episcopus, cujus præsertim ordini, verè Apostolico, datum est in Evangelio, serpentes tollere, mortiferumque bibere innoxie.

a Tom.
21. an-
nal.
1155.

Victor secundus, ut habetur in sacris Annal.^a Calicem, cui Subdiaconus venenum miscuerat, de altari tollere non potuit. B. Pius V. Crucifixi pedes tæbe infectos, attrahi vidit, ne illos exosculando ipse conficeretur. Sabinus Canusii Episcopus, cæcus, & senex, virulentum poculum hausit, sibi ab Archidiacono, qui ejus cathedram ambiebat, callidè propinatum: at dum biberet, virus præsentiens *quod ipse* (inquit) *illaesus nunc sorbeo, statim propinantem occidet*: prout accidit. Mille hujusmodi leguntur exempla Prælatorum innoxie venenatorum, haustu, morsu, vel tactu. Dices tamen, & multos obiisse. Verissimum quidem: at non ideo infelices poteris nuncupare, quos virus, enecando, sacravit,
& bre-

& brevi morte ad vitam perduxit æternam . Sive lingua mendax famam , sive quid noxium Episcopi corpus occidat ; manebit semper incolumis , ipsius honor , & anima . Ita in sacris literis ille spondit , qui falli , aut fallere nunquam potest . Ei semper fidendum est , præfertim verò ubi de venenis agitur , tam phisicis , quam moralibus : non enim linguæ omnes excindi , aut cuncti astus eludi possunt . *Ut vita , & mors corporis , ita & honoris in manu Domini* ; qui solus utrumque , & mortificat , & vivificat . Mulier quædam nequissima , ut virum perderet , ei virus præbuit : at , cum non illicò moreretur , aliud violentius adjunxit ; quo , contra uxoris votum ille convaluit . Id Ausonius argutè canens , apto epiphonemate claudit ,

*Quam pia cura Deum ! Prodest crudelior uxor ;
Et cum fata volunt , bina venena juvant .*

CAPUT XXII.

De damnatis ad Bestias .

Erimus alibi de cicuribus , mox de Feris tractabimus , quibus Præsules expositi immanissimè dilacerantur . Sunt autem canes rabidi , vulpes dolosæ , lupi rapaces , ursi crudeles , pardi fallaces , tigres immanes , leonesque feroces . Nonne canis rabidus , qui cunctos inordet , & nemini parcit ? Nonne vulpis dolosa , qui parat insidias ? Nonne lupus rapax , qui diripit aliena ? Nonne ursus crudelis , qui non læsus irascitur ? Nonne pardus fallax , qui aliud in ore , aliud habet in corde ? Nonne tigris immanis , qui nulla satisfactione placatur ?

K

Nonne

Nonne leo ferox, qui semper jurgia quærit? Ad has bestias damnatus Episcopus, modò unius, modò alterius, modò plurium, & quandoque omnium simul sustinet feritatem. Non quidè semper earum furor in cum irascitur; sed quandoque in alios, vel etiam in alterutrum; seu vicissim. At verò, bonus Pastor, & dulcis Pater, ovium, filiorumque plagas, & vulnera sua reputat: & dum eos ab illarum unguibus, aut faucibus liberare conatur, ipse fit præda, esca, & laniena ferarum; si non corpore, saltè animo. A familiaribus aliquando proditus, quos pridem fidos canes, cicurelque domi nutrierat; subinde feros, perfidos, rabi-dosque foris experitur; ita ut sit ei opus pavère, quos pavit: extraneos autem sub humana specie plerumque reperit irracionales: verè damnatus ad bestias planè diverfas: & quod infelicius est, qui ante vulpis apparebat, fit illico, aut lùpus, aut ursus, aut pardus, aut tigris, aut leo, aut etiam hydra, tot ferarum, quot capitum; non quidem naturâ, sed moribus, seu vitiis. Utinam hæc métamorphosis, non homines in feras; sed feras mutaret in homines! Verùm conversio plerumque fit in deteriùs; & vix aliquando divina Præfulum arte, dolosus evadit ingenuus; rapax, liberalis; crudelis, placidus; fallax, sincerus; immanis, mitis; ferox, tractabilis. Quinimò id sæpè accidit, quod sibi contigisse scribit S. Ignatius Antiochenus Episcopus: *De Syria usque ad Romam pugno ad bestias in mari, & in terra, nocte, dieque ligatus cum decem leopardis; hoc est militibus, qui me custodiunt: quibus, cum benè feceris, pejores fiunt.* Habet nihilominus Præsul ad hujusmodi bestias damnatus, in duplici remedio solatium; in oratione, scili-

scilicet, & in fervore charitatis. Orando clamet ad Dominum: ^a *erue à framea Deus animam meam, & de manu canis unicam meam.* ^b *Ab homine iniquo, & doloſo eripe me.* ^c *Exurge, & ne derelinquas me, ſicut Paſtor gregem ſuum in medio luporum malignorum.* ^d *Non prævaleat contra me urſus inſidians.* ^e *Non immittas Domine, qui ledat me quaſi pardus.* ^f *Pereat tigris, & non habeat in me prædam.* ^g *Salva me ex ore leonis, & molas leonum confringe.* Charitatis verò fervore accenſus, beſtias non timeat, ſed terreat: & cum Ignatio dicat ex animo: *Utinam fruam beſtiis, quæ mihi ſunt preparata: quas & oro mihi veloces eſſe ad interitum, & ad ſupplicia, & allici ad comedendum me: ne ſicut, & aliorum Martyrum, non audeant corpus attingere. Quod ſi venire noluerint, ego vim faciam; ego me urgebo, ut devorer: Frumentum Chriſti ſum, dentibus beſtiarum molar, ut panis mundus inveniar.* Qui ſic loquitur, qui ſic audet, verè Jeſum habet in corde aureis notis impreſſum; cujus divinâ virtute ſuper aſpidem, & baſiliſcum ambulabit, & conculcabit leonem, & draconem: quod ſi Ferarum morſibus interierit; lucrum erit, cum Ignatio, moriendo viciffe.

CAPUT XXIII.

De damnatis ad ignem.

DEi charitas ignis conſumens eſt; quo uritur Episcopi animus, ut ſalvet, eique reddat animas ſibi commiſſas. Segnior eſt flamma, quæ foris urit; quam quæ ardet interiùs. *Hanc flammam, teſte Chryſoſtomo*

super epistola ad Corinth., *Satan ferre non potest; qui potest ferre flammam Inferni. Quis scandalizatur, & ego non uror?* dicebat Apostolus. Populi vitia, peccata, scandala publica, in corde Præsulis intolerabile augent incendium, quo vellet ea inenutanter absumere: verum, spe frustratus, ipsius viscera vorat. Audit lascivum corrupisse puellam; thoro insidiari pudico; innocentem vitare juventam; sacras virgines impudentissime circumvenire: ardet ipse implacabili zelo, quem suo damno premit; ut cautius peractis malis, imminetibusque provideat. Si res non ex voto succedat; intenditur ignis, miserumque Præsulem dirè consumit. Videt festa contemni, jejunia frangi, Ecclesias profanari, aut pollui, aut in suis juribus lædi: & ipse, novus Vesevus, æstuat, ejaculatur ad sydera flammam; ut vel indè tot scandalis finem, aut ultionem imploret: quod si non exoraverit; se mons exurit, & cæco incendio vertit in cinerem.

Explicari non potest, quam sit zelanti Episcopo intolerabile, filiorum suorum cernere mala, & non pellerè; agnoscere vitia, & ignoscere; prævidere damna, & filere: inops enim consilii, & viribus impotens, quid agat, quo se vertat ignorat. Occultus ignis intensius ardet; oclusus dirius vorat; obstrictus violentius erumpit. Fornax est Episcopi pectus, cujus flammam bini folles incendunt; zelus; videlicet honoris Dei, ne lædatur; & desiderium salutis animarum, ne pereant.

^a Ma-
tathias
cap. 2.

^a *Vidit Matathias Judæum Idolis immolantem, & doluit: contremuerunt renes ejus; & accensus est furor ejus secundum judicium legis, & insiliens trucidavit eum super aram: sed & virum, quem Rex Antiochus miserat, qui roge-*

cogeret immolare, occidit in ipso tempore, & aram destruxit. Magnum profecto incendium fuit istud Matathie, quod tam violenter erupit in Apostatam, in hostem, in aram: verum, erupit. Episcopi verò zelus pro gloria Dei, & legum observantia, qui sæpè non segnius ardet, erumpere aliquando non potest; obistente plerumque, aut Procerum, aut plurium fautorum astu, & potentia. Tunc accidit, quod in metallorum fornacibus fieri videmus, ubi flammarum vortices in semet reflexi, cum erumpere non possunt, quod intus habent, intensius eliquant, & vorant. Ita Episcopi zelus, cum explicari non valet, ejus viscera intensissimè absumit. Oh! Si posset Episcopus, quoties videt publicè, impudenterque peccantem, cum, vel ut alter Phinees, debitâ pœnâ, tamquam pugione transfodere; quam faciliè ipse leniretur, cohiberentur mala, & Deus placaretur! Quot Chrysostomos haberet Ecclesia; quot Ambrosios; quot Thomas Cantuarienses; quot Carolos! *Elias Propheta surrexit quasi ignis; idest, ardens zelo* (ut ait Lyranus) & igneo gladio Pseudopphetas occidit nongentos quinquaginta. Moyses verò triginta tria millia de populo interfici jussit in ultionem offensi Numinis. ^b *Erat autem* ^{bc. 32.} *Moses certè mitissimus; & tamen amatorio furore supra modum percitus, propriam etiam ignoravit naturam: ut inquit Theodoretus; quod etiam de ipso Eliâ dici potest, qui timidus erat. Sed ubi honorem Dei graviter lædi viderunt, uterque vehementer exarsit, nocentesque magno quodam justî furoris incendio combussit. Non quidem hujus generis pœnâ Episcopus graviora peccata debet ulcisci, nec potest; cum in lege gratiæ longè mitior vindicta exigatur, & potius infligatur censura,*

fura, quam vulnus. Sensus tamen commissi sceleris tam acriter pectus Episcopi adurit; ut, si fas esset, Moysen, & Eliam æmulari satageret: &, quia non potest, dire torquetur: utinam ei permetteretur, enormia crimina, & atrociora delicta saltem vindicare censuris, Ecclesiasticoque refecare mucrone! sed testium improbitas, perjurio confisa; reorum impudentia, proprio, vel alieno culmine freta; ministrorum perfidia, pretio, seu favoribus empta, enervant justitiæ vires, eludunt Judicis artes, ejusque studia; & labores contemnunt. Itaque à pessimis impunè peccatur, & scandala, quæ publica sunt, ea tanquam ignota, præterire, aut dissimulare opus est: quod etiam extorquet appellantium versutia: etenim, nisi delictorum qualitas rectè, ac ritè probetur; nisi criminalistarum formulæ sint exactè, ac scrupulosè observatæ; nisi luce meridianâ clarior appareat culpa reorum, totus processus cadit, acta irritantur, Judexque deluditur. Itaque absolvitur crimen, plectitur zelus, & luit innocens poenam nocentis. Quæ tunc exultatio, & objurgatio reorum, perjurio, potentiâ, perfidiâ vincentium! Quæ tunc Episcopi vim patientis confusio? Quæ ipsius zeli torrida exustio! Mali triumphant; boni scandalizantur; & hujusmodi spe impunitatis etiam non mali pessimi efficiuntur. Nec Judex audet eos juris vinculo cohibere, quod ipsorum dolo videt potius rescindi, quam solvi. Quot hinc mala sequantur enumerari vix possunt: stupra, incastus, adulteria, sacrilegia, concubinatus, nefanda scelera, delicta enormia, doctrinæ pessimæ palàm grassantur, & unâ Clerum, populumque corrumpunt. Ardet interea Præsul, & *tabescere facit zelus ejus*, qui totus furit in

Judi-

Judicem impotentem, coactus parcere impudentibus!

Hoc igne Christus exarsit, quando juxta Joannem cap. 2.

zelus domus ejus comedit eum, & expulit de Templo emen-

tes, & vendentes, & cathedras nummulariorum evertit.

Hoc eodem efferbuit, quando turbæ de ipso dicebant:

quoniam in furorem versus est: ita ut exierint sui tene- o Mar:
cus 23.

re eum. Mirabile dictu! mitissimum Dei filium, & sa-

pien-^{ti}ssimum paterni honoris zelo ita exarsisse, ut eum

nequissimi hostes vinciri oportere putarint, ac si (ut ip[s]is

videbatur) in furorem fuisset actus. Æquanimiter ergo

ferat Episcopus, quando simili percitus charitate, zelo-

que succensus, irridetur, ut furens, accusatur, ut sæ-

vus; damnatur, ut nimis acerbus: nam teste D. Chry-

stostomo super Matt. & D. Thoma, ^{d 2. 2} *Superior, qui cum*

causa non irascitur, peccat: patientia enim irrationabilis q. 155.
art. 8.

vitia seminat; negligentiam nutrit; & non solum malos, ad 6.

sed etiam bonos invitat ad malum.

Quanto zelo conflagrarit Cantuariensis Archiepisco-

pus Thomas, is planè intelliget, qui ejus acta perlege-

rit in annalibus Baronianis; ubi eum longè ante marty-

rium martyrem extitisse clarissimè apparet; non tam ex

persecutione Anglicana, quam ex admirabili disposi-

tione divina; quæ illi tormentum indè magis adauxit,

undè auxilium expectabatur; Plura in iisdem Annalibus

circa id tempus de aliis Præsulibus referuntur, ex qui-

bus liquet, Episcopos non rarè ad hunc ignem damna-

ri, quo interius ardentissimè concremantur. Gaudeant

nihilominus, & indè capiant solatium, undè sumunt

ardorem: *hunc enim ignem in terris ille mittere venit,* cin Ps.
118.

qui de Cælis descendit; nec aliud vult, nisi, ut ardeat. Jer. 12.

Bonus zelus, & utilis in Sacerdot: (inquit Ambrosius)

pra-

præcipue, ne negligens, nec remissus sit (unde vulgò dicitur; qui non zelat, non amat) zelus Dei vita est. Zelum habere debet Sacerdos, qui incorruptam servare studet Ecclesiam. Angeli quoque sine zelo nihil sunt, & substantiam suam amittunt; nisi eam zeli ardore sustentent. Cum ergò Episcopi in Apocalypsi vocentur Angeli, eorum naturam induere debent, quorum nomen sortiti sunt: non autem induent, nisi habuerint in cordis fornace magnum incendium: Deus enim facit Angelos suos spiritus, & Ministros suos ignem urentem. Nihil sic placet Deo, nihil sic placat Deum, quomodo zelus Animarum: dicit Riccardus Victorinus. Nam zelo vindicatur Jerusalem (ait Ambrosius) zelo Ecclesia congregatur. Hoc ita exarsit Chrysostomus, ut nullatenus quiescere posset, etiamsi multos quotidie ad viam salutis reduceret; sed incessanti ardore omnes salvare cupiebat, & satagebat, ut de se ipse fateretur: *nemo mihi dicat, quod multi* f. hom. 13. ad Populu *correcti sunt: hoc non est, quod queritur; sed ut omnes quousque hoc non videro, respirare non possum. Ardeant Episcopi, & si alios incendere nequeunt, si eorum flamma restringitur, si absque subditorum calore, se ipsos exurunt, & de sua exustione tabescunt; gaudeant in holocaustum tam sacro incendio consumi; ut enim ait* g. bo. 12. super Ezech *Gregorius: & nullum omnipotenti Deo tale sacrificium; quale est zelus Animarum. Ut dictum est supra ex Ambrosio: qui non zelat, non amat; & qui non amat non ardet, nec sine ardore gratum Deo sacrificium offerri potest. cuius odore ardoris vi resoluti potissimum delectatur.*

CAPUT XXIV.

De damnatis ad gladium.

Longum esset ad singulas species descendere sub unoquoque genere martyriorum, ac prorsus inutile; præsertim, cum non de corporali agamus martyrio, sed tantum de spirituali; sub quo, ut in præsentī capite, non datur armorum diversitas, quibus diversimodè Martyres torqueantur, sive necentur; ut sica, mucrone, securi, ense, lancea, jaculo, aut sagittâ: verum sub gladio hæc, & quæcunque arma complectimur: ita ut ille dicatur ferro analogicè occidi, cujus animam gladius pertransit; quemadmodum de martyrio Sanctissimæ Virginis olim Simeon prophetaverat. Hoc etiam intelligi volumus de quocunque alio spirituali tormento hætenus viso, sive per ignem, sive per aquam, sive per bestias expresso; ne prætermissum videatur, quod sub suo quoque genere comprehendimus.

Nil morte crudelius; & eam infert quodcunque ferum, si præcordia transverberet; si caput amputet; si lethale vulnus infligat. Quæcunque Ecclesia unum efficit corpus, cujus caput Episcopus est, sub quo cætera membra pro ratione graduum congruè disponuntur. Amor Episcopi totum hoc corpus velut anima informat, & vegetat; nec aliqua ipsius pars lædi potest, quin ipse lædatur. *Ferrum ergo pertransit animam ejus*, quoties in membris offenditur; & mortem patitur, si offensa sit gravis; ut quando per inobedientiam caput à corpore abscinditur; aut quando per lites feriuntur

L

præ-

præcordia; aut quando per inimicitias, & odia membra læthaliter vulnerantur. Certè Præfulis caput abscinditur, quando reliquum Ecclesiæ corpus ab eo pertinaci rebellionè præciditur; quando schismata fiunt; quando subditi ab ipso superiore rebellant: quod tunc verè accidit, cum, excusâ subjectione, inferiora membra obedire contemnunt; cum Pastorem oves refugiunt; cum Lupum tanquam Pastorem hallucinatæ sequuntur. Non potest caput hære corpori, si corpus non hæreat capiti. Abscinditur à corpore caput, non à capite corpus: et ita dici non potest, quod Episcopus ab inferioribus semet ulla tenus dividat; sed quod inferiores se ab Episcopo subtrahant. Mens, ratio, dirigendo in capite residet, et reliquum corpus gubernat: verum, si hoc regi nolit, sinè mente, sinè ratione, veluti obtruncatum, deficiet; sentietque caput, se ab eo crudeli ferro præcidi. Hoc, sed rarò accidit, in generali torius Diocesis à Præfule schismate; non tamen rarò in unius, aut alterius, vel etiam plurium præcipuorum membrorum divisione. Quam durè, quam dirè obtruncat Episcopum hujusmodi nobilium partium factiosa rescissio! Ipsæmet propria multitudinè fiunt audaces, protervæ, potentes; & multæ unum oppugnant, & in suam perniciem expugnare moliuntur. Quale monstrum! Incedunt membra capite inverso: melius dicam, habentia sub pedibus caput! Id autem præcipuè tunc accidit, cum arrogans sophista indoctos assecclas rapit in præceps, eosque dementes callidus seductor abducit. Quod si forè communi causæ, licet iniquissimæ, aliam privati livoris, odii, & vindictæ jungere possit; sub specie communis boni, communi nomine infectatur Episcopum,

pum ; ejus famam dilaniat , cor transverberat , jugulat animam , nititurque alienis viribus , aut eum è medio tollere , aut cogere , seu cogi ad abscessum ; ut alius , vel defuncto succedat , vel adhuc superstiri substituatur . Hoc igitur acutissimo capulo Episcopi jugulum petitur , & innocens damnatur ad gladium .

Nec desunt huic Martyrio spicula , & sagittæ , quibus Præsul transfigitur ; dum iniquis litibus divexatur , & Ecclesiæ jura , quæ ipse tueri debet , callidè oppugnantur ; non quidem vincendi spe , sed animo ferendi . Passim invenit perfidia Patronos , & iniqua clientela nequiores causidicos ; quibus Judices non quidem seducti ; sed planè decepti , sententiam proferunt , & qui vicerunt , se vicisse mirantur ; secundisque rebus elati ; pejora minantur , & cum placuerit , moliuntur , ut nova semper vulnera inferant .

Odia quoque privata , jurgia , rixæ , civile bellum , feriunt Episcopi animum ; & eò acriùs , quò utrinque ejus corporis membra feriuntur . Ipse in omnibus , in singulis reperitur , & cujusque in se recipit ictus ; nec quisquam læditur , quin ipse lædatur . Quantum laborat , quantum sudat , ut inimicitias componat , ut compe scat iratos ! Verùm , perduelles , nil veriti Sacri Antistitis , aut præsentiam , aut officia , cæcâ rabie in mutuam armantur perniciem ; & *more ruinarum supra id , quod oppressere , franguntur* . Opponit pectus irruentibus armis Episcopus ; & hostes , tam barbari , quàm sacrilegi , ut inimicum transfodiant , vel per viscera patris arma protendant . Ita nuper contigit Nicoteræ Episcopo , quem hostes occidere , ut ejus corpore protectum inimicum occiderent . Quid sævius , quid immanius ? Hoc

84 DE CONSOLATIONE

tamen rarò contingit ; semper tamen Episcopus vulnus in corde patitur ; quoties , aut in singulari certamine , aut in tumultuario conflictu quis interimitur ; & si cum contingat absque Sacramentis decedere , quomodò ingemiscit , & dolet ! Tunc verè *gladius pertransit animam ejus* , & sine ferro fit martyr . Gaudeat nihilominus hoc martyrio coronari , quod ex pastoralis charitate procedit , & grande meritum habet : ut habuit Deipara Virgo , *cujus animam pertransiit gladius* ; qui fodit in clavis , & lancea corpus Filii , & Matris spiritum unà transfodit .

CAPUT XXV.

De damnatis ad Crucem .

CApit Martyrum Christus , Episcopus Animarum nostrarum , hoc genus martyrii sua morte sacravit , & omnium nobilissimum reddidit ; coque inferiores Episcopos cum primis honorare desiderans , *si post se ire velint* , unicuique semetipsum abnegare , suam tollere crucem , eumque sequi mandavit . Adeò necessarium est , Episcopum crucem ferre , in eaque mori ; ut neque Martyr dici possit , nisi cum capite Christo , & pro Christo crucifixus appareat . Reliquæ poenæ , tormenta que cætera , sunt Crucis præludia ; in cruce , & à cruce sanctificantur , & in ea Martyrem collocant , ut Christo conforment , *qui Martyrum est corona* . Ipse ait ; *bonus Pastor animam suam dat pro ovibus suis* ; & quod verbis docuit , firmavit exemplo . Nos ergo , ejus , non solum doctrinam , sed & vestigia sequi debemus : sequen-

sequemur autem, si ascenderimus cum ipso crucem; & in ea, nondum vestigia; sed & manus configi patiemur.

Quod verò etiam hujusmodi martyrium Episcopum maneat, experientia demonstrat. Cum non acquiescit carni, & sanguini, cum vitia redarguit, cum virtutes promovet: *Animales homines, qui non percipiunt ea, quæ sunt spiritus Dei*, Hebreorum more, adversus Christum Domini concilium colligunt pessimorum; inter quos non desunt, qui expedire, dicant, *ut unus moriatur homo pro Populo, ne tota gens pereat*: quasi verò, non plebis malitia, sed Pastoris imperitia turbas excitet, dum veteres eradicare curat abusus, & legum observantiam inferere. Qui terrena sapiunt, & inter cæteros prudentiores videntur, eum tolli, & crucifigi debere succlamant: & si quis contradixerit, eum quietis publicæ inimicum appellant. Potestatem subinde ordinis, & aliam jurisdictionis, de quarum fructibus pascit oves, & de virgis regit, dirigit, atque compescit; profanâ securi de Foro sublata, vel etiam sacra de templo furtim erepta, in crucem convertunt; in qua omni auctoritate spoliatum Episcopum figunt. Clavi, quibus ejus pedes, & manus cruci affiguntur, sunt inhibitiones, vel laicæ, potentum, & impiæ; vel sacræ majorum, per obreptionem, vel subreptionem extortæ, adedòque nullæ. Primæ, si non figunt ex metu, (quem dedecet robur Antistitis) quandoque id efficiunt ex prævisione pejorum malorum. Secundæ verò ex reverentia sistunt, donec tandem comperta veritas infixos clavos revellat. Quam ergo aptè, cum Paulo Gentium Apostolo, & Episcopo, is tunc dicere potest: *Christo confixus sum Cruci!*

^a Ad
Galat.
2.

Sic

Sic ergo cruci affixus Episcopus crucifixores suos, & illusores audit, & videt, murmurantes adversum se, & *moventes capita sua*. Ipse verò immobilis, nil facere potest, nisi tantum clamare ad Deum; *ut illis ignoscat, quia verè nesciunt, quid faciant*; dum suo malo ita serviunt in Pastorem, in Magistrum, in Medicum, in Parentem. In tam dira persecutione à suis deferitur, & omnes eum derelinquunt: si quis verò illius misereri videtur, ei acetum præbet felle permixtum, referens adversariorum amarissimum animum, querelasque, mordaces æquè, ac mendaces. Tota interim Dioecesis magnis motibus quatitur, & cum sacrum Tribunal patitur eclypsim, vitiorum tenebris obcæcatur: & vix est ullus Nicodemus; vix ulla Maria, qui audeant in tanta malorum caligine lucem quærere.

Non desunt in hac Præsulis mystica crucifixione, innocentiae venditor, & emptor, & qui eam hostibus tradant, traditamque, ream, uti falsi Testes, affirmant. Reperiuntur etiam Herodes Antistitis derisores, qui cum propriis adversariis in ejus perniciem foedus ineant, hac pessima occasione discissam prius amicitiam, sarcientes. Multò plura de hoc martyrio dicere possem, crucifixioni, probè convenientia, sed brevitati studeo, ne poenam augeam, daturus solatium. Nemo tamen existimet, vel in præsentì, vel in præteritis hujusce libelli capitibus, me cujusque martyrii plenum, integrumque proposuisse genus, aut schema, in quo solari Præsules velim; cum ex hominum nequitia, ita unumquodque variari possit, & dividi; ut sunt multiplices casus, & circumstantiæ malorum, quibus illi passim afficiuntur. Communiora palàm exhibui, ad quæ faciliè alia sub eodem

dem genere adversitatis, afflictionis, & poenæ reduci possint; ut eâdem valeant Sancti Spiritus consolatione leniri. Nusquam verò copiosius hæc unctio divina superabundat; quam in speciali Episcopi crucifixione, in qua socium habet, quem Creatorem, Redemptorem, ac Deum confitetur. *Absit ei gloriari, nisi in Cruce Domini Nostri Jesu Christi, per quem salvati, & liberati sumus: & quemadmodum ille proposito sibi gaudio, substinuit Crucem, confusione contempta:* ita Episcopus ex contemplatione innocentissimi, & amabilissimi Jesu Crucifixi, perferat alacriter suam Crucem, ignominiamque despiciat. Noverit Episcopus, nunquam se posse Deo amplius, quam in hoc statu placere, sicut dilectissimus ejus Filius tunc illius iram adversus genus humanum prorsus extinxit, quando immobilis in Cruce pependit: etenim in eo miserrimo agone peccatum, & mortem devicit, hominesque redemit. Videtur sibi Episcopus, pedibus, manibusque confixis, nil agere posse: quinimò suæ dignitati, populoque subjecto magnam præjudicium inferre; ac si spiritualis ejus crucifixio, bonis, & malis stultitia, & scandalum foret. Verùm quemadmodum Apostolus dixit, ^b *Se predicare Christum Crucifixum, Judæis quidem scandalum; gentibus autem stultitiam,* & statim subjunxit: *ipsis autem vocatis* ^{b r. ad. Cor. cap. i.} *Judæis, atque Græcis Christum Dei virtutem, & sapientiam:* ita, quod putat Episcopus, & gradui noxium, & plebi despicabile, utrique fit gloriosum; nec unquam plus agit, quam cum fixus cruci, moveri non potest: tunc enim ex Cathedra Christi excelsiores virtutes grandi exemplo Populum silendo docet. ^c *Lignum siqui-* ^{c Tyac. 119.} *dem Crucis, in quo fixa erant membra patientis, etiam*
 Cathe-

88 DE CONSOLATIONE

*Cathedra fuit magistri docentis: inquit Augustinus: itaque Præful in Cruce magister efficitur, dum tale martyrium fortiter, patienterque perferre dignoscitur. Multos ego vidi ex hujusmodi Episcopi crucifixione, resipiscere à malo, & ad bonum converti; deservescen-
tibus enim odio, & invidiæ, amor, & commiseratio succedunt; miranturque in eo virtutis magnitudinem, animique constantiam, quem ex proprio vitio persequebantur; & eum subinde imitari coguntur: quosque non potuit Episcopus agendo corrigere, patiando convertit.*

Attendat Episcopus, quæ Sanctus Maximus in sermone de martyribus ait: *Crux non solum dicitur, quæ tempore passionis ligni affixione conficitur, sed quæ totius vitæ curriculo cunctarum disciplinarum virtutibus coaptatur: ut non solum intelligatur crux ligni patibulum, sed piæ vitæ, virtutisque propositum: unde omnis Christiani vitæ, & multò magis Episcopi, qui secundum Evangelium vixerit, crux est, ac martyrium: hanc autem crucem, (inquit Augustinus) ^{d in Epist. ad Galat. c. 5.} ut in ea gloriemur Dominus suo gestans humero, pro virga regni nobis commendavit: quod est grande ludibrium impiis, grande misterium piis, & unde mundi Philosophus erubuit; ibi Apostolo thesaurum reperit: quod illi visum est stultitia, Apostolo factum est sapientia, & gloria. Ergo Episcopus grandi animo crucem perferat, quinimo ab ea deponi non curet: non minus enim Deum glorificabit, eique placebit Crucifixus; quàm in sui muneris exercitio liber, & expeditus. Non est nostrum, eligere, quemadmodum Diæcesim, aptè gubernemus; ipsius est id præscribere, cujus est dare: cum non sit volentis, neque currentis; sed Dei mi-
seren-*

ferentis. Non servus præripit sibi munus, in quo juxta suum placitum Domino serviat; sed ipse Dominus utrumque determinat, & munus, & modum; non propter indigentiam, sed propter Famuli obedientiam. Ipsius Imperium liberum est; quod vult, non quod volumus, jubet. Placet ei, quod petit, accipere. Displicet, si jussa (licet parva) negemus, & non jussa (licet magna) offeramus. Crucis ergo amantissimus Jesus, si nos ad ejus imitationem cruci affixos habere decernit, non jam inviti figamur cruci; sed eam spontè amplectamur, & cum dilectissimo ejus discipulo Andrea crucem suam ita ex corde quisque alloquatur: *O bona crux, quæ decorem ex membris Domini suscepisti, diu desiderata, sollicitè amata, sine intermissione quaesita, & aliquando cupienti animo preparata: accipe me ab hominibus, & redde me Magistro meo, ut per te me recipiat, qui per te me redemit. Salve Crux pretiosa, suscipe discipulum ejus, qui pependit in te Magister meus Christus.* Clamet etiam cruci affixus cum eodem Apostolo ad Deum: *ne me permittas, Domine, famulum tuum à te separari; nec me patiaris à cruce deponi; sed suscipe me pendentem in patibulo, in quo tu Episcoporum Institutor, ab omnibus derelictus, pro omnibus mori voluisti.* Non absque mysterio gestamus crucem in pectore; ut, scilicet, eam habeamus in corde, seu veriùs, ut cor figamus in ea. Materialem crucem Christi, ejusque vel minutissima fragmenta devotè adoramus: quid ni ergo, & spiritualem toto corde amplectamur, qua nobis Mundus juxta Apostolum crucifixus; idest, despicibilis factus est: & nos mundo crucifixi; nempe, contemptibiles reddimur? Sicut ergo gaudemus illius, vel minimum,

invenisse segmentum : ita etiam lætemur , cum Deus nobis magnam hujus portionem , grandem , scilicet , afflictionem largitur .

CAPUT XXVI.

De Martyrii causa in specie ; & primùm de Fide .

STatim in ipso limine hujus Tractatus exposui, quod Martyrē faciat, non pœna, sed causa: causam verò dixi, esse Fidem, aliasque virtutes; quatenus homo pro illarum defensione tormenta, & necem fortiter patitur. Id autem in spirituali Episcopi agone regulariter accidit, pro religione, pro Ecclesia, pro justitia, & pro animarum salute; de quibus jam in genere dictum est: ideoque nunc de his tantummodo, & in specie agam; & primùm de fide, quæ totius vitæ Christianæ fundamentum est, & *sperandarum substantia rerum*. Episcopi omnes ex officio sunt ordinarii Judices, & Inquisitores in causis ad religionem spectantibus; etiam ubi reperiuntur alii Judices delegati: adeoque contra Hæreticos, & quoscumque de fide suspectos; contra infordescētes in excommunicatione ultra annum; contra blasphemos, contra magos, incantatores, supersticiosos, polygamos, & similes procedere debent; nisi à delegatis, ubi sunt, præveniri contingat, juxta id, quod sacri Canones præscribunt. Quæ verò, quantaque mala Episcopum obruant, cum hujusmodi causas pertractant; & in hos reos inquirunt, non est facilè dictu. Indicavi quædam in aliis capitibus; sed illa sunt potius nulla, quam levia, eorum comparatione, quæ hic, tanquam
in

in proprio loco, recensenda forent. Quò gravius est crimen, eò difficilius probatur, & plectitur; cumque directè Divinæ Veritati, ac Majestati opponatur, Angeli apostatæ acrius insurgunt in Judicem, reosque violentiùs defendunt. Ipsimet-Rei, eorumque fautores, amici, & domestici, populum commovent, testesque seducunt; ut in Judicem scelus detorqueant, & livor appareat, quod ab eis sit ex zelo religionis, & debito muneris. Minas intentant, ut terreant; preces adhibent, ut flectant; dona proferunt, ut decipiant. Si potentes existunt, aut potentum sint viribus freti, corrumpunt testes, aut pellunt; & in causa infallibilis veritatis nulla veritas reperitur; doli, technæ, fallaciæ, amphibologiæ, hypocrysis, mendacia protegunt, & pro veritate colorant; ipsamque veritatem reddere nituntur mendacem.

Quæ mihi acciderint in causâ intrusionis Thomæ de Campo, & ejus schismatis hæreticalis, fusè refero in meis expeditionibus ad Indos Orientales. Haud minora contigerunt in alia contra Presbyterum magum, bis è meis manibus, non sinè Dæmonum auxilio, dilapsus; & in tertia contra Clericum primæ tonsuræ, impiè, sacrilegè, ac nulliter sacra mysteria celebrantem. Plures Auctores, qui de sacra Inquisitione scripsere, plurima narrant, ex quibus constare potest, quanto astu, quantaque rabie hujusmodi Rei Judicem eludere, & insectari nitantur, ope Dæmonum, & pessimorum fautorum: sæviùs autem, & liberiùs, ordinarium, quam delegatum: sive ob gravio rem Principis delegantis; sive potiùs ob impotentem, despectumque hodie apud plerosque gradum Episcopalem. Quidam Episcopus

92 DE CONSOLATIONE

mibi notus, gliscentem nuper perniciosissimam doctrinam ita compefcuit, ut illius Auctor se abscondere, calamumque, ac linguam cohibere coactus fuerit. Verum, in Judicem tam pertinaciter postmodum, & insolenter exarsit; ut contra eum, homo turbulentissimus, & mendacissimus, ex cunctis ordinibus persecutionem exciverit; & adeo efferam, ut mitiorem is planè tulisset, si doctrinam illam ipse vulgasset. Probarant omnes hujus vigilantiam, ac zelum; damnavissent verò socordiam: sed in ejus pro tam pia causa martyrio, plerisque clam miserantibus, nemo palam auxilium præstitit, aut solatium. Mirum ergo non est, si aliqui Præsules hujusmodi causas effugiunt; easque delegatis relinquunt: sed id fieri non potest, ubi tales Judices non existunt; neque hoc laudandum in Episcopo, ^a *qui per Dei gratiam* (ut ait S. Prosper) *sunt divina voluntatis Judices; Ecclesiarum Christi post Apostolos fundatores; Fidelis Populi Duces; veritatis Assertores; prava doctrina hostes.* Hæc est potissima cura Pastorum, arcere hujusmodi Lupos à Grege; Christi ovile in Fidei unitate servare intemeratum; nec sinere, suæ sponsæ cubile ulla impietate fœdari. Agat Episcopus, quæ, quantaque velit, si hoc unum prætermittat, inutilis; quinimò noxius erit, & valdè noxius: ubi enim Religio polluitur, omnia corrumpuntur. Indivisibilis est vera fides, Veritati Divinæ tam firmiter innixa; ut vel tota subsistat, vel tota corruat. Si firma fuerit, fides erit; infirma fides esse non potest. Sinè macula existit, vel unico inficitur nœvo. *Quæ societas lucis ad tenebras? Immaculatæ Religionis cum impietate? Illius Propugnator, Custos, & Defensor Episcopus est: si nolit, non erit sponsus Ecclesię,*

a lib. 2.
c. 2. de
vita cō-
templ.

fiæ, sed hostis. Indignus planè sponsi nomine, qui sponsam pudicitiam, candoremque traducit. Ergo ex officio persequi debet quoscumque de fide, Religione, ac pietate suspectos; in reosque invehì, & inquirere. Si secus egerit, ipsemet inter reos computabitur, easque pœnas incurret, quas æternus, tremendusque Judex cap. 2. & 3. Apocal. minatus fuit septem Episcopis Asiæ: verùm, si Dei zelum habuerit, sponsamque vigilantissimè custodierit, ea præmia consequetur, quæ in dictis capitibus iisdem Episcopis, si pro fide, & in fide stetissent, promissa fuere. Horum spe gaudere debet Episcopus, qui causâ fidei, & religionis patitur; nam longè gloriosius, atque sublimius suos ipsâ Martyres in æternitate coronat. Ut verum fatear, nunquam minus tormenta, quam in agone fidei, sentiuntur; nam, & pro ea pati, & quod pro ea quis patitur, gloriæ pars est. Quoties apud Hæreticos, Schismaticos, Idololatrias, aliosque Infideles, aliquid pro fide mihi contigit sustinere; ipsa malorum causa dabat animos, & exultare cogebat. Ideo namque *ibant Apostoli gaudentes à conspectu Concilii; quoniam digni habiti sunt pro nomine Jesu contumeliam pati: & quod ad me attinet, quoties reminiscor, ab hostibus fidei non plura, & longè majora fuisse perpeßum, ex corde suspiro; & pudor est non licuisse mori.* Nemo tamen dicat, quod hæc militant, cum ab Infidelibus pro fide quis patitur: nam quo ad meritum, idem est, à malis Catholicis, vel ab Acatholicis pro Religione torqueri. Beatus Eleucadius Episcopus, non ab Infidelibus, sed à fidelibus in sua Diœcesi multa sustinuit: & nihilominus S. Petrus Damianus de illo ita loquitur.

Neque verò credendum est, Beatum Eleucadium, dum adhuc

adhuc viveret, martyrii caruisse laboribus, etsi non fuerit martyrio consumatus. Non contemnendum pertulit in ipsa Ecclesiæ pace martyrium: quandoquidem, & si non cum perfidè credentibus; cum perversè tamen viventibus inferabilem probatur habuisse conspectum. Patiantur ergo libenter Episcopi, & causam intueantur, non hostes.

CAPUT XXVII.

De secunda causa martyrii; scilicet, de Ecclesiâ.

SUB Ecclesiæ nomine cuncta hîc intelliguntur, quæ pertinent ad Ecclesiam; nimirum, immunitas, libertas, & jurisdictio Ecclesiastica, itemque illius bona, obventiones, & jura. Omnium horum Custos est Episcopus, ac etiam defensor; tam stricto jure, ut etiam teneatur de levi. Ejus nobilissima sponsa pretiosissimam hanc dotem affert, quæ Ecclesiastici præsertim ditantur, & perfruuntur, veluti filii majores natu, & chariores, utpotè, Matris obsequio, & cultui prorsus addicti: alii verò quatenus ad Ecclesiam pertinent, vel confugiunt. Episcopus ergo, tanquam legitimus Ecclesiæ sponsus, ejus locupletissimam dotem custodire, ac defendere debet ex præcepto naturali, & divino: cum id exigat ratio matrimonii, & hujus dignitas matrimonii. Propterea Sacri Canones, Sanctionesque Apostolicæ sub censuris, & comminatione districtæ ultionis ei mandant, ut cuncta, quæ diximus, acerrimè tueatur. Hinc est, quod inter præcipuas Episcopi laudes, hæc una refulgeat, Immunitatis Ecclesiasticæ imperterrita, & strenua defensio. Verum, quæ mala, quæ bella, quæ tormenta, quas perse-

persecutiones, quale martyrium, in ea defensione Præsul non patitur? Omnis laica potestas in eum armatur, & quandoque inferiorum etiam Ecclesiasticorum perfidia. Episcopalis auctoritas vix obsistere potest; quinimò persæpè, nec vix; sed ei recurrendum est ad Apostolicæ sedis auxilium; quæ ut tot, tantisque hostibus occurrere valeat, Purpuratorum Patrum Congregationem hac de re, veluti Episcoporum Arcem, atque præsidium instituit. Sed ea est inimicorum nequitia, ut fallere nitatur, & quandoque fallat hujusmodi præsidii præstantissimum munimentum. Tunc Episcopus, omni prorsus auxilio, & ope humana destitutus, ab adversariis obruitur; & ea mala patitur, quæ ingemiscens Thomas Cantuariensis, Ecclesiasticæ Immunitatis Assertor accerrimus, & Martyr invictus, in suis literis ad Romanum Pontificem, & ad illius Curie Purpuratos audacter enarrat. Hostium potentia, & versutia ita causas invertunt, ut subdola narratione, corruptisque auro, promissis, aut metu, minisque Testibus; Episcopum, non Ecclesiæ defensorem, sed laicæ Jurisdictionis everforem, aut suorum bonorum raptorem ostendant. Absens Episcopus, & quandoque pauper, nec rarò desertus, obreptitiis, aut subreptitiis litteris, & mandatis obstrictus, grande martyrium sustinet; viderque sponsam ab Adulteris impunè, quinimò, & cum laude expoliari, & pollui. Hoc pluries accidit, pro impudentia, pro petulantia, & pro aviditate Impiorum: ut aliquando contigit sacro Ecclesiæ defensori accerrimo præfato Thomæ Cantuariensi, ante martyrium hac de causa jam martyri: nec secus aliquando accidit aliis Episcopis, quos Laicorum, aut inferiorum Ecclesiasticorum rabies, invidia,

invidia, odium, avaritia, vel ambitio, infectatur, torquet, exagitat.

Non tamen hic finis malorum : aliud superest, certè pessimum, Dæmone, fallaciarum patre, inventore. Id autem est; accusatio Episcopi, quod læsam ab aliis Immunitatem Ecclesiasticam minimè defendat; immò verò, quod ipsemet lædat. O' nunquam satura humanæ malitiæ rabies! Quem mordere tanquam indiscretum defensores non potest; eum lacerat quasi desertorem; ac denique veluti propriæ sponsæ offensorem procacissimè devorat. Quidam Episcopus uno, eodemque tempore fuit Romæ denunciatus, quod publicis ædibus ecclesiasticam tribueret immunitatem; quam certè: ut pius locus, habebant: quod captum à Curia seculari hominem Laicum, ut Clericum; qualis verè non erat, minimè repeteret: quod ipse Reum privilegiatum à loco immuni extraxisset. Ita simul idem Præsul (ut ipsemet inquiebat) albus erat & niger, & neque niger, nec albus: verùm ubique deformis, & reus, & quia defenderet, & quia non defenderet, & quia offenderet Ecclesiastica jura. In his autem quisque delator suum mendacium tot testibus, & probationibus callidissimè pinxerat, ut verum putari posset, si tam contraria verè coire potuissent. Gaudeat Episcopus pro dilectissima sponsa tam dirè vexari, & in diversitate pœnarum unam semper Ecclesiæ causam intueatur; pro qua pati, & mori, martyrium est, & ipsum utique gloriosissimum. Non datur modò inter Orthodoxos pro fide torqueri; sed datur passim pro Ecclesia; nec minus rabiðe, quam inter hæterodoxos pro fide. Utrobique constat perennis corona martyrii. Eâ redimitus inter ceteros clarè præ-

præfulget Gregorius Septimus, immortalis memoriæ Pontifex, qui tot contra se habuit Tyrannos, quot ipse pro Ecclesia imperterritus, censuris, comminationibus; repræhensionibus, depositionibus irritavit; nimirum, utrumque Imperatorem, Occidentis, & Orientis; Reges, Galliarum, Poloniæ, ac Ungariæ; Normandorum Principem, Apuliæ Ducem; Quintium Urbis Præfectum; Ugonem Cardinalem Sancti Clementis: Archiepiscopos, & Episcopos, Ravennatem, Mediolanensem; Bremensem, Straburgensem, Spirensensem, Bambergensem, Papiensem; Taurinensem, Cremonensem, plurimosque alios, præsertim Gallos: & quanquam Româ pulsus, & innumerabiles, gravesque calamitates perpeffus; invincibili tamen animo Salerni plusquam martyr occubuit, dicens: *justitiam dilexi, & odi iniquitatem; propterea morior in exilio*. Eja exilium omni Patria nobilius! Stat ibi ex ære tanti Pontificis simulacrum, quo ipse firmitus pectus habuit, & heroica virtute Princeps, Laicos, usurpatum ab Ecclesia jus, beneficia conferendi, Ecclesiæ reddere compulit; & Regnantem olim in toto ferè Orbe fœdissimam Simoniam, de Throno dejecit. Hæc nobis præstitit ejus martyrium in terris; sed ei multò plura, & gloriosiora, æternumque mansura præbet in Cœlis, ubi tot habet sui Triumphii consortes, quot hic habuit pro Ecclesia Commilitones; Ambrosios, Chrysostomos, Carolos, & mille alios; inter quos recenseri quilibet Episcopus ambiat, & gaudeat!

CAPUT XXVIII.

De tertia causa Martyrii: nimirum de Justitia.

IN omnibus causis spiritualibus, & Ecclesiasticis, vel ad Clerum spectantibus est Judex Episcopus, qui unicuique jus suum tribuere debet; & in civilibus, & criminalibus justitiam administrare: hoc autem quàm difficile, quàm arduum sit, experientia docet; præsertim quando requiritur tela judicii: tunc enim judicare oportet secundum allegata, & probata: verùm allegationes ipsæ, ac probationes diutissimè protrahuntur, versutissimè implicantur, fallacissimè proponuntur. Tandem aliquando causæ absolvuntur in ipsa curia, & postquam à Judice fuerit prolata sententia, nil restat, nisi executio: hæc autem ab iis Ministris dependet, quorum fides venalis est, maximèque suspecta. Plures menses, & annos; multum auri, & argenti; summam animi applicationem Partes in litibus insumpserunt; Judex, quam potuit, æquam sententiam protulit, relaxavitque mandatum: ast infidi satellites, aut metu, aut avaritiâ corrupti, executionem, vel diù retardant, vel subdolè prætermittunt. Idem in criminalibus accidit, & utrobique, Partium, Fisci, Judicis anxiosissima studia falluntur: ita ut perquàm verum appareat, justitiæ complementum ab vilissimorum hominum fide, vel perfidia pendere. Hinc omnium Curialium, ipsorum Clientum, Actuariorum, totiusque Populi clamor in Judicem, ac si ad eum pertineret lictoris officium. Permutat ipse satellites, monet, repræhendit, minas inten-

tat,

tar, obtestatur, & urget: verum, quos optimos putat, pessimos experitur. Deperit exinde justitia; debita non solvuntur; delicta impunè grassantur, & his malis Episcopi animus dirè torquetur.

Absint nihilominus à Sacro Tribunali versutia, fallaciæ, perfidia, temporis jactura, metus, & avaritia; non tamen decrunt querelæ in Episcopum, quem in judicio, Rei, victique in lite, aut iniquum, aut indoctum evulgant. Quisque in aliena domo justitiam amat; odit in propria: & cum in jurgiis, ac litibus alterum oporteat damnare, alterumque absolvere; qui succubuit, hostis efficitur cum tota familia. Cum autem Episcopus, ut vindex, delicta punit; id acrius, sæviusque patitur: furor enim nocentium Innocentis Judicis famam dilacerat, impiamque sumit de pia ultione vindictam.

Hoc præ cæteris Judicibus habent Episcopi, quod præmia, dignitates, & beneficia plurima conferunt; sed amplior potestas, & honor, longè ampliorem faciunt martyrii causam, & poenarum. Quoties vacat, & ab Episcopo largiendum est beneficium, toties confluant, qui petant, qui ambiant, qui extorquere præsumant: verum; cum uni tantum concedi possit, ac tribuatur; cæteri competitores in Collatorem armantur, & invidia Provisi, & exclusionis propriæ dolore; quodque præelecto beneficium extitit, sit reliquis omnibus veneficium. Favor Magnatum, amicorum, consanguineorum, cum perit irritus, eos irritat, & urget in Præfulem; qui unius lucro multos amittit; neque tamen ipsum lucrum ipsius est, sed Provisi. En igitur; quot pro una justitia poenas, quot martyria patitur Præsul, alioquin rectis-

100 DE CONSOLATIONE

simus, mitis, atque justissimus! Dnm lites dirimit,
litibus irretitur; dum reos condemnat, ipse damnatur;
dum confert beneficia, patitur maleficia: ubique mar-
tyr, & semper. Maneat tamen in Episcopo *constans*,
& *perpetua voluntas jus suum unicuique tribuendi* (sine
à lib 2
decad.
3. qua justitia esse non potest) ^a *jus enim* (ut ait Livius)
b 5. mo
ral. *laborat, non extinguitur*; & ut habetur in historia Saxo-
nica; *justitia vincit odium*. Quæ verò bona ex eo na-
scuntur, Episcopum solari debent; cum verè maxima
sint, & Reipublicæ, non modò utilia, sed necessaria,
ipsique Deo charissima, & Judici veluti certissima pi-
gnora salutis æternæ; ait enim Gregorius. ^b *Justitia Re-*
gis (ita & Episcopi) pax est populorum, tutamen patriæ,
immunitas plebis, temperies aeris, serenitas maris, terræ
fecunditas, solatium pauperum, cura languorum, gaudium
hominum, hæreditas filiorum, sibi metipsum spes futura bea-
titudinis. Hinc est, quod Paulus formans in Timotheo
perfectissimam Episcopi ideam, bis ei præcepit Apo-
stolico imperio; *sectare justitiam*; ut habetur in utraque
ad illum epistola. Postremò ex Divino Veritatis oracu-
lo, impensissimè gaudere debent Episcopi, qui pro
tanta virtute martyrium sustinent; cum ab eo declaren-
tur *Beati, qui esuriunt, & sitiunt justitiam*; itemque,
Beati qui persecutionem patiuntur propter justitiam. Su-
blimissimum profectò justitiæ meritum, cujus Assedas
efficit duplex beatitudo felices!



CAPUT XXIV.

*De quarta martyrii causa ; hoc est , de salute
animarum .*

Bonus Pastor animam suam dat pro ovibus suis ; ne devorentur à lupis , aut aliter pereant ; sed potiùs vitam habeant , & abundantius habeant . Id fecit , & docuit Magister Pastorum Christus ; & hoc principalitèr exigit ab Episcopo , qui ab eo constitutus est Pastor super gregem suum , ut illum pascat , & salvet . Nil autem eum magis perdit , quam scandalum . Quòd unum pecus abit , alia sequuntur ; & quòd se proripit illud , hæc quoque ruunt . Scandalum est dictum , vel factum minus rectum , præbens aliis occasionem ruinæ spiritualis . Ab hac ruina tenetur Episcopus eripere suas oves ; nec aliter potest , quam refecando scandala , & exempla perniciofa . Id autem difficillimum est , & plurimum , maximarumque pœnarum causa , & origo : nam sæpè , tam dantes scandalum , quàm capientes , in eum armantur , qui scandalum tollere curat . Velut phrænetici , amant perire ; imò , & conantur ; eorumque rabies in medicum vertitur . Hoc autem clarè patet in publicis peccatoribus , quos non pudet , aut usus , aut infamia peccati . Triplex in hoc opere tormentum patitur Episcopus ; zelum , nempè , salutis ovium ; ipsarum odium in se ; & earundem perniciem in alias oves . Zelus torquet viscera Pastoris , ac Patris ; qui , vel proprio sanguine ; ac etiam interitu , velleret oves , & filios à malo retrahere . Horum odium eum persequitur , à quo retrahi nolunt à malo,

malo, quod impensè depereunt. Eorumdem perniciēs in alios, qua eos pertrahunt in ruinam, ipsum quoque dirissimè exulcerat. Itaque ab uno scandalo triplex martyrium sustinet: sed tamen una est causa martyrii; salus animarum. Concubinatus, lascivæ amicitiae, impura commercia; & hæc omnia palàm, & impudentissimè exercita, pessimo exemplo cunctos rapiunt in præceps; præsertim, quando peccatur impunè. Infelices pueros, atque puellas, quorum innocentiam majorum vitia corrumpunt! Vident peccata, & ignorant; & dum imitantur, addiscunt; & vitia exercent nondum vitiosi; pravosque habitus induunt, antequam noverint pravitatem. Quidni ergo grandævi mala operentur, quando eos versi habitus in naturam naturaliter malos efficiunt? *Plus patitur Christus ab eo, qui scandalum præbet, quam olim à crucifixoribus suis; cum hi saluti animarum, vel inviti, profuerint; ille verò plurimum noceat. Non tibi videtur (ait D. Bernardus) graviores ab eo Christus sustinere persecutionem, qui suggestionem maligna, exemplo pernicioso, scandali occasione ab eo pervertit animas, quas redemit; quam à Judeo; qui sanguinem suum fudit? Eorumdem animarum salutem Episcopus totis nisibus curat; sed rarè assequitur; obfistentibus moribus, aliorum exemplo corruptis. Senescit in adultis perversitas; adolescit in pueris; & vix ulla reperitur ætas, quæ rectè gradiatur. Hos abripit sensualitas, alios avaritia, plerosque odium; & paucissimi sunt, quos à salutis semita fallax malitia non abducatur: dumque illos reducere conatur Episcopus, fallit opus eorum astus, & pervicacia, peritque labor infructuosus. Quoties ipse nequissimos homines, foeminasque repræhendi; ut aliquando tandem*

dem resipiscerent à peccatis ; qui ausi sunt respondere ,
*se de salute nihil curare ; nec magnum fore , si & ipsi tot
inter millia damnatorum recenseantur ?* Hoc sentiunt
pellices ; hoc usurarii ; hoc blasphemæ ; hoc mimi ; hoc
plagiarii , & lascivi omnes ; hoc ipsum fures , grassato-
res , sicarii , malefici , & qui odio habent proximum
suum . Pertinax eorum nequitia torquet Episcopum ;
ita cæterorum superbia, luxus, & vanitas ; ejusque tor-
turæ causa est una salus , quam ipsi despiciunt . Ideò
Concionatores admonet ; Confessarios hortatur ; Paro-
chos urget : ut peccatores convertant . Ideò ipsemet
irrequietus agit , quod potest ; ut eorum animas ab
æterno eripiat interitu , & in viam salutis , & in portum
perennis felicitatis perducatur . Ipsemet, Parochus, Con-
fessarius , Concionator efficitur ; Synodos congregat ;
Visitationes peragit ; edicta promulgat ; nequiores com-
pescit , & cuncta perlustrat . Hæc omnia præstabat Chry-
sostomus ; & licet ex tot laboribus fructus colligeret ;
non tamen quiescebat : cumque illi diceretur (ut jam
alibi retuli , & hic rursus referre placet ,) *plurimos esse,
qui ejus operâ salventur* ; ita respondit : ^a *nemo mihi* ^{a bo. 13}
dicat ; quod multi correcti sunt : hoc non est , quod quæri- ^{ad Po-}
tur ; sed ut omnes : quo usque hoc non videro , respirare ^{pulum}
non possum . Quale martyrium , quod intercipiebat anhe-
litum ! Non multorum , sed omnium salus poterat solari
Chrysostomum : & poterit non tristari Episcopus de
plurimorum interitu ? Teste D. Gregorio , ^b *quot regen-* ^{b lib. 4.}
dis subditis præest , tot (ut ita dicam) animas solus habet . ^{novat.}
Quid mirum ergo , si tam anxius , tam sollicitus est de
uniuscujusque animæ salute , cum ipse in uno corpore
tot animas habeat , quot in tota Diœcesi subditos regit ?
Quid-

104 DE CONSOLATIONE

Qui dquid pro sua paratus est pati; hoc sustinet pro aliena sibi commissa, ne pereat: siquidem pro utrisque districto Judici rationem reddere debet. Væ, væ miserrimo Præfuli, si vel una ovis suâ culpâ damnetur! Minus foret, concreditum amisisse thesaurum, quàm perdidisse ovem, pretio Divini sanguinis emptam. Fateor: hæc ipsa consideratio cor meum sævissimè torquet, nec unquam quiescere finit: multum timeo de mea salute ob cuiusque meæ ovis interitum. Ast, non ideo despero, sciens, à me exigi curationem, non curam. Præceperat Abrahæ Deus, filium sibi immolare; quod tamen fieri subindè inhibuit, suscipiens affectum, opus repudians: ubi S. Prosper sic ait: *Ita Deus, aliqua fieri noluit, quæ homines, Deo volente, facere voluerunt*. Hinc magnum oritur in hujusmodi martyrio solatium: duo namque in eo reperiuntur; & studium salvandi oves; & harum salus: primum à nobis omninò dependet; non ità secundum: duo itidem primo respondent, & studii effectus, & præmium: ille non semper sequitur; hoc nunquam fallit: siquidem benignissimus Deus opus attendit, non operis fructum; quinimò augetur quandoque operis meritum, si fructu careat; privatur enim operans eo gaudio, quod ex fructibus oritur; ejusque loco datur mercedis augmentum. Resideant duo nostræ fidei Operarii apud Indos, eosque infideles: alter diù, multumque laboret; ut eos ad Ecclesiæ gremium reducat; oret, jejundet, doceat, concionetur, exemplis, & verbo; vix tamen paucos intra decennium, ob eorum duritiem, convertat. Alius verò plurimos, & nullo studio quæsitos; sed spontè ad se venientes, & de Religione instrui postulantes, intra quinquennium baptizet: cujus meri-

ta excellunt? cui majora præmia dabuntur? Utique primo, qui plus laboravit, minusque collegit. Gloriari poterit secundus de uberiori messe; non quidem arte propriâ, studioque paratâ; sed ex sæcundiori agro productâ: & ejus gloriatio minuet præmium; quòd augebit in alio, & improbus labor, & mæror sterilitatis, Gaudeat ergo Episcopus, non tam de fructu, quam de operis merito. Suarum ovium salutem omni prorsus conatu perquirat; & si assequatur, lætetur quidem ob illarum adeptam felicitatem; sed minimè tristetur, si parum, aut nihil profecerit; quoniam promittitur merces labori, non fructui. Egregius Medicus non perdit lucrum ex morte infirmorum, qui, cum sanari potuissent ipsi obtemperando, suâ contumaciâ periere. Magnum profectò solatium est, intentionem nostram cum cernere, cui omnia nuda, & aperta sunt: qui æstimat virtutem ex animo, non ex effectu. Apud eum, tam in bono; quàm in malo, voluisse, sat est. Vota nostra intuetur Deus; à quo semper fenus, & usura percipitur. Potissimum lucrum erit, ei ex desiderio placuisse. Impensè gaudeamus; nam *ante oculos agimus Judicis cuncta cernentis*.

c. Roet.
lib. 5. de
Consol.
Phil.

CAPUT XXX.

*De Tyrannis in Episcoporum Martyrio; & primùm,
de Damone.*

SÆpè quidem in toto hujus operis decursu actum est; non solum de pœnis Episcoporum, & de causa pœnarum; sed etiam de illarum Auctoribus, ac Ministris: verùm incidenter, & ex ipsa rerum connexionione.

O

Mox

106 DE CONSOLATIONE

Mox autem ex instituto de ipsis Tyrannis tractabimus ; quatenus hinc quoque præbeamus nostro Martyrio grande solatium . Hi verò sunt, Dæmonum odium , hominum malitia , & propria Synderelis, scrupulis, timoribus , anxietatibus agitata : ab his enim omnia penè mala procedunt , quæ in animarum gubernio Episcopi patiuntur . Ut autem exordiamur à primò ; certum est, Dæmonem nullum magis odisse , quam Præsules, quorum studio fides propagatur , Deus rectè colitur, hominesque salvantur . Mundi hujus est ipse Princeps , non hæreditarius , nec electivus , nec jure belli præfectus ; sed utique astu , vi , dolo , potentiâ intrusus ; adeoque imperium malè quæsitum , violenter exercet . Dei Adversarius, & hostis, ejus Regnum pertinacissimè invadit ; & quot potest de illius subditis ad se allicere, sibi subjicere , aut perdere , nequissimè fallit . Cum ergo nullum sui Principatus titulum habeat ; cum alterius dominationem usurpet ; cum jus in minimè subiectos exerceat ; cum præterea in eorumdem perniciem , & ruinam totus incumbat : ferus , impiusque Tyrannus existit . Idcirco à D. Chrysostomo . ^a *Tyrannus crudelis* asseritur . Suam verò Tyrannidem in Episcopum trifariam exercet , vetustissimus Geryon ; ex rabie in Deum , & Angelos ejus ; ex vindicta damnorum , quæ patitur ; & ex invidia gloriæ alienæ . Inflexibilis voluntas Dæmonum perseverat in malo , cui ab initio firmiter adhæsit : ideoque pertinax , & rebellis , in Dei odium immutabiliter ardet , ejusque pugiles implacabilis insectatur . Bellum , quod in Cælo gessere cum Angelis , feri , fædique Apostatæ , in terris cum Episcopis habent ; qui meritò in Apocalypsi , ^b *Angeli* nuncupantur : sunt enim præcipui ministri

^a tom.
14. sup.
Matth.

^b cap. 2
et 3.

stri Numinis in Ecclesia, illius Regnum, & Cœlum, ipsiusque Militiæ, ut supremi Duces vigilantissimè præfunt. Magnum ergo prælium, quod factum est semel in Cœlo à Dracone cum Michaelè, & Angelis ejus; ab eodem quotidie fit in terris cum summo Præsule, minoribusque Hyerarchis; contra quos tantò acriùs furit, quantò digniores agnoscit. Horret in eis characterem Episcopalem, quo Dei vices hic gerunt, ipsumque Deum inter homines repræsentant; & odium, quod in Omnipotentis Majestatem exercere minimè potest, in ejus Vicariorum infirmitatem exercet. Dæmonis ergo tyrannis duplici rabie Præsulem torquet; qua scilicet, Deum, & qua ejus Angelos in ipso execratur, & dirè persequitur. Episcoporum charitas, zelus, & vigilantia ingentem prædam à Dæmonibus aufert: animas, videlicet, quas ipsi decipere, ac sub impietatis vexillo, aliquandò militantes habuerunt. Eos propterea vehementer urit, urgetque desiderium vindictæ, omnemque lapidem movent, ut rursus, & pluries, & millies ablatam prædam eripiant, & cum præda Pastores. Ideò in eos, & propriis viribus, & alienis insurgunt; ut vexent, exagitent, perdant. Postremò, invidiæ livore acriùs incensi, eosdem furiosius insectantur; & quandoque præter naturam iis malis, hisque gravissimis Episcopos complent, quæ naturales causas habere non possunt: quare, mystici Martyres ea nec intelligere, neque repellere queunt; sed pati coguntur, ignari auctorum, & qua veniant, & qua de causa. Quod olim in Job evomere iræ, vindictæ, invidiæ virus; hoc idem in Episcopum sæpiùs effundunt, & si non corpus, animum tamen, amissionibus, afflictionibus, ulceribus, innu-

108 DE CONSOLATIONE

merisque malis, & atrocibus implent: ita ut introrsus nulla sit in eo sanitas, nulla quies, nullum solatium; per mittente Deo in martyribus suis hæc fieri, ad præclarissimum virtutis meritum augendum; ad illustriorem victoriam de tot, tantisque hostibus reportandam; ad sublimiorem triumphum in Cœlis agendum. Lætentur Episcopi ab hujusmodi Tyrannis torqueri; quorum immanitas, ut nexuit patientissimo Job coronas; ita præparat eorum fortitudini palmas. Quàm difficile, quàm arduum est, pugnare cum Dæmone; tam gloriosum erit, vicisse; Ille autem loquens de Job, Chrysostomus ait: *‘urbe extorris; & domo, & facultatibus simul, affinibusque nudatus, sterquilinum pro domo, pro stramentis humum, finum pro indumentis habebat, sed in his omnibus, non solum nihil leditur Job; verum, & clarior per hæc, ac magnificentior redditur: cum enim cunctis eum facultatibus, atque ipsius sanitatis corporis spoliasset; immensas ei virtutum divitias per patientiam congregavit: neque enim tantæ fiduciæ apud Deum erat Job antequam in hoc agone desudaret. Quod si iste, qui tanta perpeffus est; & ab eo perpeffus, qui omnes homines nequitia, & crudelitate præcellit, ladi in animi virtute non potuit: quis erit jam; cujus videatur digna excusatio, cum dicit: ille me læsit; ille offendit, ille novit, ille impediuit? Si enim Diabolus, qui omni malitiâ repletus, commotis universis viribus suis, atque omnibus telis, armisque, vel in domum justî, vel in corpus ejus directis; ledere omninò non potuit: sed magis eum (ut dixi) gloriosum, & spectabilem reddidit: quomodo dignè quis ullum hominem culpabit, quod ab eo ladi quiverit, aut noceri? Ex his inferre potest Episcopus, planè gloriosissimum esse à Dæmo-*

Dæmonibus tyrannidem pati, & non lædi; neminemque ab eo pertimescendum, qui nec timet diabolum, nec vincitur à Diabolo; sed ipsum potiùs, & terret, & vincit. Neccessaria pugna est, ubi nulla societas, amicitia nulla esse potest; vel si fortè intercesserit, perniciosior sit ipsa pugna: etenim amari à Dæmonibus, & cum eis fœdus inisse, nequissimorum hominum est; non verò Sanctorum Præfulum; qui eosdem suarum ovium teterrimos Lupos, aut veriùs, animarum sibi commissarum implacabiles, crudelissimos hostes agnoscunt. Hi autem blandiendo nocent; feriendo profunt: parcendo necant; interimendo sanant: & cum tyrannidem immaniùs exercent, quos faciunt martyres, eos meritis, coronis, palmis, perennibusque cumulant gloriæ splendoribus.

C A P U T XXXI.

De Hominibus malis.

OMne ferè martyrìum Episcopus ab hominibus patitur; ut satis clarè in toto hoc opere monstratum est. Verùm hic longè clariùs apparebit: si enim omne hominum genus dividamus in Classes, harum singulas in Episcopum armatas videbimus. Plebs, recti, verique nescia, regi vix patitur; & in Rectorem etiam finè causa bacchatur. Rationis experts, amat, odit, laudat, infamat, defendit, persequitur; non utique ut debet; sed tantùm, ut lubet: cumque, ut plurimùm vitiosa existat, & libera; eum acriùs insectatur, à quo corripì, & cohiberi formidat. Hinc tumultus, hinc
mala

III DE CONSOLATIONE

mala fama, hinc blasphemix in Episcopum; & tantò vehementiùs, quantò ad hæc ab Episcopi perduellibus plebs rudis, & effrænis acriùs impellitur.

Cives honestiores, qui, vel mercaturam, vel artes exercent, quas liberales appellant; si à Præsule de usura, de perjurio, de dolo, de iniquitate commoneantur; eum rabidè persequuntur: in officinis, in apothecis ipsius nomen proscindunt; & si per ocium liceat, eorum negotium est, cum adventantibus de illo diutius obloqui; sitque censura Pastoris pecudum quies.

Nobiles, naturâ delicatiores, nisi humanissimè pertractentur, etiam cum nequissimi existunt; pro læsa eorum nobilitate dirè ferociunt: ac si generis decus, non à crimine; sed à commonitione lædatur. Univerſa familia in unius objurgati vindictam accenditur; & quasi cunctos offenderit, singulorum odium Præsul repatitur. Verùm, Magnates, & Principes, nedum eum æquare contendunt; sed etiam antecellere: unde fit, ut neque ab eo corripì sinant: & si corripì necesse habeant, id velint, non reverenter, non obsequiosè tantum; sed utique cum ipsorum laude præstari: quod, nimirum, inspectis legibus humanæ rationis, optimè quidem egerint; sed non ita juxta Regulas Evangelii: cumque illos fortiùs moveant, quæ sentiunt, quam ea, quæ credunt; neque dolent, neque malè acta execrantur, mox acturi pejora, si commodum fuerit. Monueram aliquando ipse Principem præpotentem; eumque de læsa indirectè Ecclesiastica libertate, quam humanissimè reprehenderam; & is quidam pacato animo, sed minimè bono, respondit: *non posse probari, pœnam, à se laicis sui juris illatam, hac intentione processisse, ut Ecclesiam vel*
indi-

*indirectè gravaret : cumque ipse subrexerem , probationem intentionis ad hoc tantùm requiri ; ut ad anathematis publicationem procedi possit ; non autem ad hoc , ut anathema intrinsecus incurratur : ille addit : nos Principes , cedulones , non excommunicationem timemus ; nam quo ad occultas censuras à solo Deo conveniri nil formidamus , cum quo faciliè convenimus . Fortè putabat , parum interesse inter Principem Deum , & Principes homines ; & ex nominis analogia oriri strictissimæ cognitionis fiduciam ; nesciens , Potentes potenter tormenta passuros , tyrannosque Deo ridiculos esse ; nempè , vilissimos , & contemptibiles Mimos . Non ita certè respondit quidam Prorex Indiarum , qui à me confidentissimè admonitus , de à se gravata Ecclesiastica immunitate ; modestissimè suis rationibus (ut erat etiam in sacris literis valdè versatus) quæ præstiterat , excusavit ; deindè rescidit ; & me perbenignè amplexatus , meamque suâ dexterâ stringens : *utinam (inquit) omnes amici hac me libertate admonerent !**

Sæviùs furit quicumque Magistratus , si ab Episcopo de re aliqua , vel blandissimè commoneatur ; sibi putans de jurisdictione multùm adimi , cum eam in se viderit exerceri . Præcelli vix sustinet in dignitate ; in auctoritate prorsus non sustinet . Hinc jurium bella , privilegiorum , consuetudinum . Tota Civitas , omnis Populus , minores , majoresque armantur pro defensione Reipublicæ in Magistratu despectæ (ut vulgus apprehendit) fitque seditio maxima , in re minimè præjudiciali ; sed potius utili , & æquâ ; imò , & necessaria . Quidam hæreticus Anglus mecum Romani Pontificis celsitudinem mirificè laudabat , & ad Cœlum usque fere-

112 DE CONSOLATIONE

ferrebat, *insulsiſſimè decipi* (aſſerens) *A catholicos omnes, qui hoc audent negare*. Mirabar ego, hæc ab hæretico de Summo Pontifice tam audacter proferri ! & , *ergo fatendum eſt* (ipſe reſpondi) *Romanum Pontificem totius Eccleſiæ viſibilis, ac militantis Caput, & utrique ſupremum exiſtere ? Ita eſt, negari non poteſt* (ille ſubjunxit) *ſed dignitatis præeminentiâ dumtaxat : non auctoritate aliquâ, vel poteſtate !* Quot mundi Potentes hæc ſentiunt de Pontifice, quot Magistratus de Præſule ! Verentur quidem eadem ore proferre ; ſed minimè verentur opere profiteri ; & quos dicunt, ſe venerari, ut ſuperiores ; ut inferiores proculcant, unâ ſimul colentes, & colaphizantes.

Quid referam de mulieribus, & infimis, & mediis ? Quid (inquam) de ſupremis ? Omnes amari volunt, laudari, & blandiſſimè pertractari : ſi ſecus fiat, implacabiliter irascuntur : quinimò, nec læſæ, adverſantur ; & plerumque, non tam propriâ, quàm alienâ malitiâ : ſeu verius, & propriâ, & alienâ. Quam procaciter viliffima pellex auſa fuerit de ſtupro Athanaſium incuſare, notiſſimum eſt : idem, & aliæ tentarunt contra Euſtadium Patriarcham Antiochenum : Briçtium Turo-nenſem ; Ethærium Lexoviænſem ; multosque alios ſanctiſſimos Præſules . Non deſunt noſtris temporibus Eudoxiæ, ac Theodoræ, Chryſoſtomo, & Sylverio inſenſiſſimæ ; ſi non potentiâ ; ſaltèm odio, & feritate pares ; aut fortè majores .

Ne in re tam clarâ prolixior exiſtam, breviter cuncta complectar . Quidquid, per crudeliſſimos omnis generis cruciatus, paſſi ſunt Martyres ; id totum patiuntur ab hominibus Præſules ; & ad pœnarum cumulum, homi-

mines ipsi Præfulum tormenta efficiuntur ; nimirum , feræ , metalla , ferrum , ignes , naufragia , & cætera mala ; tantòque acriora , quantò efferatius acuit malitia cordis virus , virefque nocendi . Quidquid passus est Christus , Episcoporum Princeps , & Pastor ; à malis hominibus passus est : & qui ceteras creaturas obsequentissimas habuit , eisdem perfidos hostes , & adversarios palàm sustinuit . Gaudeant Episcopi , sub tanto humanæ feritatis martyre , ab hominibus martyrium pati . Non reformident , ejus patientiam , & fortitudinem imitari , qui eo tempore nasci voluit , quo posset habere tortores nequissimos , & efferatissimos hominum ; Scribas , Phariseos , Annam , Caipham , Pilatum , Herodem , & Judam . In Dei potentia confisus dicat audacter cum Davide ; quondam Pastore , quilibet Pastor : ^a *Dominus illuminatio mea , & salus mea ; quem timebo ? Dominus Protector vitæ meæ ; à quo trepidabo ? Dum appropiant super me nocentes , ut edant carnes meas ; qui tribulant me inimici mei ; ipsi infirmati sunt , & ceciderunt . Si consistant adversus me Castra ; non timebit cor meum . Si exurgat adversus me Prælium ; in hoc ego sperabo ,* ^b *In Deo speravi , non timebo quid faciat mihi homo .* Ps. 26.

Quod supra innuimus de Christo Domino , Chrysostomus conglobatim affert , cum exul ipse in epistola ad Cyriacum Episcopum exulem ait . *Qui terram continet , factus est nobis figura , ne deficeremus in tentationibus . Recordare passionum Domini Salvatoris , & injuriarum , quas tulit pro nobis . Alii eum Samaritanum vocabant ; alii Demoniacum , & voracem , & Pseudo-Prophetam : dicebant enim : ecce homo vorax , & vini potator : & in principe Demoniorum Demonia ejicit . Quid autem , quod*

duxerunt eum, ut præcipitarent? Quid, quod in faciem ejus conspuerunt, & alapas ei dederunt? Quid, quod aceto, & felle potarunt, & arundine caput ejus percusserunt? Quid, quod eum circumdederunt clamyde, & spinis coronaverunt; & supplicando, omnique alio genere, deriserunt, circumdederuntque eum sanguinarii illi canes? quid, quod ad passionem ductus, & nudatus; dereliqueruntque eum omnes Discipuli? Et unus quidem negavit; alius etiam prodidit; alii autem omnes fugam inierunt; & solus ipse stetit nudus in medio turbarum illarum, quas festus dies coegerat: & quod, ut Malefactorem eum crucifixerunt; & quod sepulturâ carens, pendeat, neque deponebant ipsum à cruce; donec precibus à quodam impetratus, qui eum sepeliret: & quod sepulturam non habuit, conviciaque mala adversus eum pronunciabant, & inter cetera, quod Discipuli ipsum furati essent, & quod non resurrexisset? Hæc ipse Chrysostomus de Christo Domino, ad solatium Episcopi ab hominibus pessimè lacesciti; ut in effrenata contra suum caput hominum rabie, longè minora disceret ab hominibus pati. Plura in dicta epistola super hoc argumento summarie differit; sed longè meliùs, & prolixiùs in hom. 9. cujus titulus est; *quod nemo leditur, nisi à semetipso*; ubi clarè demonstrat, quod illi soli leduntur, qui ledunt; & quod nulli alii nocet noxa, quam ceteris inferunt; nisi ipsis, qui inferunt. Ad rem facit etiam alia ejusdem Chrysostomi epistola ad Episcopos, & Presbyteros ob pietatem in carcere inclusos; ubi hoc profert aureum epiphonema: *tanta res est virgus*; ut illam etiam impugnantes, admirentur. *Tanta res est malitia*; ut etiam ii, qui eam operantur, condemnent. Probè agat Episcopus; patienter se gerat; & quos

quos persecutores habet, habebit aliquando Panegyristas, & propriæ tandem oſores perfidiæ. Ita Læno, vel invitus, laudat Virginis à ſe tentatæ conſtantiam; & Pater impius, dum filios de impietate coarguit, ſe ipſum condemnat. Præſatas Chryſoſtomi Epistoſas, & homiliam in Tomo quinto, & ultimo, legat Episcopuſ, qui ab hominibus iniquè vexatur; & magnum ex eis hauriet in ſua vexatione ſolatium. Poſtremò, reminiscatur Divini Oraculi, & impenſè læteretur: *Stuppa col-* c. Ecl.
c. 21.
lecta Synagoga Peccantium. Aliud quoque, nec fortè minus, inveniet in unaquaque hominum claſſe; cum plurimi reperiantur in plebe, in civibus, in nobiles, in magnatibus, in mulieribus etiam primariis, in magistratibus, & Prioribus, qui obſequio, æſtimatione, reverentia, pietate, devotione, ope, affectu Episcopos colant, & juvent. Nec inter eos deſunt, qui velint unà pari, ſimulque mori; ſi opus eſſet: ut contigit in Ambroſii, Chryſoſtomi, Caroli, aliorumque Sanctorum Præſulum immani præſſura. Quam ingens lætitiæ torrens Episcopuſ cor inundat, cum in omni ordine tales reperit!

CAPUT XXXII.

De propria Syndereſi.

HActenus de malis, quæ Præſulem extrinſecùs torquent, pro quibus ſolatium intrinſecùs habet. Hic verò, & in ſequenti capite, de illis agam, quæ ſolùm animam intus exulcerant, diriùſque transverberant; in quibus ullam conſolationem vix reperit; cum

116 DE CONSOLATIONE

animus ipse, qui exhibebat in exteriori martyrio solamen, semet in suis malis solari debeat, & infirmus Medicus propriæ infirmitati impedi. Torquetur scrupulis, dubiis, timoribus, anxietatibus; & cum utraque tormenta, & extima, & intima simul ipsum dilacerant, cogitur exclamare cum Paulo; *foris pugna, intus timores; quis me liberabit de corpore mortis hujus?* Et (ut alibi ait) *supra modum gravati sumus, supra virtutem, ita ut tadeat nos etiam vivere.*

In Animarum gubernio Episcopus angitur scrupulis, ne quid agat, quod noceat; ne quid prætermittat, quod posset opportunè prodesse. Operatur, ut peccata eradicet; & ipsa uberius pullulant. Omittit agere, ne fortè exasperata ulcera recrudescant; & ipsa callum obducunt; aut incurabilia redduntur. Errat ovis; & quæ perquirat, ignorat. Rapitur; & de sua incuria suspicatur. Cadit; & num suâ culpâ, perpendit. Perit; & quod perierit se fortè reo, ingemiscit. Ah! Quoties in bivio positus, nescit quâ pergat! Prævidet secutura mala, si agat; si agere omittat, non minora ominatur. Quò se verteret utrinque oblitus graviter peccandi periculo? In his angustiis ipse quoque aliquandò deprehensus, Deum orans, non exorabam; Cælitè deprecans, non exaudiebar; Confessarios consulens, mutos reperiebam. Cum ad opus inclinarem, retrahebat metus prævisorum malorum. Cum ad omitendum pendèrem, urgebat scrupulus, ne id suaderet ignavia, proprius amor, quietis affectus. Læditur à Principe, vel ab optimate pessimo Ecclesia: defensio tricas nescit; probationes nec vi extorquet; scandala suscitât, minaturque ruinas. Conniventia obligationem, & quidem gravissimam
sugge-

suggerit; pessimi exempli perniciem; admirationem bonorum; offensæ luctum Ecclesiæ. In defensione opus exigitur, & maximè arduum. In conniventia, otium; & hoc facillimum, Præfuli gratum, cunctis plausibile; sed num Deo, valdè anceps, & dubium: hic enim dicit: *Beati qui persecutionem patiuntur propter justitiam: & beati eritis, cum maledixerint vobis homines, & persecuti vos fuerint, & dixerint omne malum adversum vos mentientes propter me: & nolite timere eos, qui occidunt corpus; animam autem non possunt occidere: ac denique oportet, ut veniant scandala: verumtamen, va homini illi, per quem scandalum venit.* Quam malè hujusmodi Christi sententiæ cum omissione conveniunt! Quam acriter conniventiam redarguunt! Ubicumque Magistratum, seu jurisdictionem exercui, de nimio zelo ab imperitis notatus fui; cum tamen de nimia remissione mecum ipse dolerem. In districta exomologesi conscientia meæ circa ea, quæ ad regimen spectant, & ad gubernium, **vix reperio**, quod aliquando in commissione peccaverim; at in omissione non ita. Reformido rationem omissionum; comissionum vix timeo. Et nihilominus, & has exagerat vulgus, quia ipsum exasperant: de illis non loquitur, quia per illas non læditur. Verumtamen, non vulgus, non homo; sed utique Deus, cujus judicia, & vera, & terribilia sunt, me de his judicabit. Quid; si post operationem, prævisa mala sequantur? quàm pœnitet fuisse operatum! Quid, si post omissionem permissa mala increbuerint, recruduerint, immedicabilia sint facta! quàm dolet, non fuisse operatum? Ah! sufficit, egisse prudenter. At, num verè prudenter! Solatium anceps, & quod omninò pendet
ab

118 DE CONSOLATIONE

ab strictissimo Dei judicio, *qui scrutabitur Jerusalem in lucernis, & iustitias judicabit.*

Multa quotidie occurrunt Episcopo in suo regimine peragenda: & obrutus aliquando multitudine rerum, nescit quid agat, aut quid primum expediat; ne cætera patiantur moræ periculum. Hinc urget claustralium Virginum cura; hinc aliqua Cleri necessitas; hinc Ecclesiarum immunitas; hinc Jurisdictionis indemnitas; hinc omnium ovium sollicitudo. Unus cunctis incumbit, & ægrè sufficit; si tamen sufficit. Habet quidem ministros, & quandoque bonos; at ipse verus, proprius, & præcipuus Pastor existit.

Quid dicam de malorum spirituum suggestione maligna, quâ singulas regiminis operationes inficere satagunt? Nunc superbiæ, nunc livoris, nunc lucri, nunc plausus; itaut vix ullam impollutam relinquant? Et licet Episcopus à principio rectissime agere intendat; perfidi virtutis olores, operationem in decursu obliquare pertentant: & num obliquaverit Episcopus dubitat; cumque telam gubernii ante mentis oculos, ferè semper tumultarie contextam, expandit; pannum respicit menstruata. In his, & similibus animi cruciatibus hoc habet solatium Episcopus, quod velit, quod intendat benè operari; quod opera sua frequenter abluat rivulis lachrymarum; quod sæpè conscientiam emundet Sacramento pœnitentiæ; ut antiqui Præsules, ut Carolus Borromæus, ut Franciscus de Sales, & alii recentiores fecerunt: in quo clarissime apparet, quam, & hi, licet sanctissimi, timerent sordes, & pulveres in curandis ovibus plerumque pulverulentis, & sordidis. *Bona menti succurrit Deus: qui ambulat simpliciter, ambulat consi-*

confidenter ; Audeat Episcopus, audacter operetur, & in sola spe gratiæ cælestis innixus, confidat semper, se Deum habere propitium ; à quo, cum habeat bonum, velle, habebit quoque, & benè perficere .

CAPUT XXIII.

De Agonotheta Deo .

OMne bonum est ipse Deus, ejusque bonitati deesse nil potest, nec ei quidque addi : & , si cunctorum hominum intellectus, & Angelorum, etiam possibile, per æternitatis interminabile spatium, singulis quibusque momentis primo divinitatis conceptui novum semper, majusque bonitatis adderent incrementum ; nunquam tamen attingerent, vel primum limen veræ bonitatis divinæ, prout realiter ipsa subsistit in se : adeoque in eo nec minimum quid malitiæ, vel odibilitatis reperire fas est, vel effingere . Hinc sequitur, non posse Deum, vel esse, vel concipi sub ratione Tyranni, quod impiè blasphemant Dæmones, cæterique damnati ; cum tamen Deus eorum sit equissimus Judex, eosque citrà meritum pœnis afficiat . Non igitur hîc Deum ipsum inter Episcoporum Tyrannos attexo ; sed de ipso, ut de Agonotheta duntaxat, & specialiter ago . Est autem Agonotheta Princeps ipse, qui, & agonem disponit, eique præsidet, ac præmium præparat, & coronas . Verùm, in hoc ita se gerit, ut plerumque certantes Præsules in agone martyrii plus torqueat hujus Agonothetæ apparens subductio, quam realis cunctorum Tyrannorum crudelitas .

Patien-

120 DE CONSOLATIONE

Patientissimus Job, Dæmonum rabiem, hominum feritatem, uxoris contumeliam, vermium corrosionem, sterquilini fæorem, cæteraque mala tam fortiter pertulit; ut semper Dominum benediceret. Cum autem à Domino deferi sibi visus est, ad amicos magno prorsus horrore clamare cæpit: *miseremini mei, miseremini mei, saltem vos amici mei: quia manus Domini tetigit me; nec aliter certè, quàm per sui met apparentem subtractionem*, & occultationem: juxta illud quod: ait, ^a *novit, quod in manu ejus sit tenebrarum dies*. Hac cum tenebræ manu percussit, ^b *in qua lucem abscondit* (ut idem inquit) quando ei fulgentissimæ suæ præsentis lumen subtraxit, & procul visus est abiisse. Christus Dominus, fortitudinis, & patientiæ symulacrum, in sacra suæ passionis acerbissimis cruciatibus, *tamquam ovis non aperuit os suum*: at, quando in cruce pendens à Patre, deferi utcumque putavit; tunc primùm clamare cæpit: *Deus, Deus meus, ut quid dereliquisti me?* Si hæc Patris derelictio Dei Filium adeò contristavit; quid ni Episcopum extremè conturbet, affligat, prosternat! Animæ ipsæ Divinæ contemplationi vacantes; cum primùm, cœleste lumen eas deferit, miserè contabescunt, conqueruntur, gement, languent, suspirant, & mori videntur. In canticis canticorum id graphicè ostenditur sub sponsæ figura, quæ seorsum à se dilapsam amarissimè deperit. Id ipsum omnes, qui de Mystica Theologia scripsere, testantur; & S. Matris Theresiæ, B. Joannis à Cruce, aliorumque de contemplatione agentium, opera omnia; præsertim verò doctissimi, & illuminatissimi Præfules Petri Matthæi Petrucci clarè demonstrant. Hoc autem in Episcoporum martyrio acrius ferit, ac per-

perimit . Non enim Dei lumine , ac assistentiâ pro sua tantum ipsorum salute indigent ; sed etiam pro cunctarum ovium sub eorum cura degentium .

Ignoto Deo immolabant Athenienses ; Episcopus aliquando ignotissimo . Certè mirum est , quàm etiam in naturalibus Deus latère contendat ! Videas alicubi montes asperissimos , omni venustate nudatos ; rupes horrendas : scopulos , vel immaniter prominentes , vel insidiosè absconditos : Syrtes voraces , rapidissimos fluxus , atque refluxus , paludes noxias ; regiones inhospitas , deserta invia , & inaquosa : mare glaciale , littora formidanda ; ut quid (inquires) Deus hæc ita in Mundo disposuit , quem dedit hominibus habitaculum ? Ad quid ista inserviunt ? Si casu hæc omnia emerisissent ; aut si Deus ea nullâ prorsus arte formasset , vix alia forent . Verum , sapientissimus , & providissimus Deus , optimè cuncta produxit , & sine ratione nil egit , egitque ita ; ut homines , dum hæc ipsa vident , credant Deum esse , non sentiant . Id multo magis apparet in ejus Monarchico , & naturali rationalis creaturæ gubernio ; sed quàm maximè in spirituali , & Ecclesiastico à Christi nativitate usque ad hunc diem . Quomodo fundavit Ecclesiam , quomodo crexit ? Vide initia nascentis , vide jam propectæ incrementa : perpende Judæorum perfidiam repugnantem ; ethnicorum prudentiam insultantem ; Tyrannorum ferociam persequentem ; & prorsus miraberis , per hæc eam ad tantam magnitudinem excrevisse . Intuere Pontifices Romanos , hæresibus , schismatibus , bellis vexatos ; Concilia Occumenica immanissimâ Demonum rabie concussa ; & obstupesces inter hæc Petri Cathedram prominere sublimiùs , & portas Inferi contra eam

Q

non

122 DE CONSOLATIONE

non prævaluiffe. Ita Deus, etiam, & quàm maximè in his credi vult; non videri; & cum abesse putatur, præfentior adest. Ita quoque se gerit in cujusquè singularis Ecclesiæ gubernio, dum in plerisque ipsius, & ejus Pastoris necessitatibus recessisse, aut obdormisse videtur; cui rectè ab Isaia dicitur, ^a *verè tu es Deus absconditus.*

^a Isa-
ias ca.
45.

Dum studet Episcopus abusus evellere; novi nascuntur: dum in malos invehitur; peiores fiunt: dum refractarios compescit; hi durius obfistunt: dum scandala tollit; majora insurgunt. Prævalent Adversarii, omnia superant, omnia vincunt, exultant in rebus pessimis; obloquuntur, derident, minantur, insultant: & interim Episcopus confusione plenus, satagendo, nil agit; ars nulla, nulla prudentia eum juvat; frustra operatur; quinimò, & cum damno. Tunc demum sibi metipsi gravis effectus, in corde gemit, & clamat: *Deus, Deus meus, ut quid dereliquisti me? Constituisti me Ducem Populi hujus, & pedes vinxisti? Dedisti regimen, & manus ligasti? Operari jubes, & vires demis? Præscis, & deseris? quid est hoc? Vide me Domine truncum inutilem, apodem, sine brachiis, in terram dilapsum; impiorum, & subditorum calcibus elidi, & proteri. Si propter me mota est tanta tempestas; procyce me in mare, & fiat aliquando tranquillitas. Obsecro te Domine verbis Moyfis quondam Præfulis Populi tui, ^b *ut interficias me; & inveniam gratiam in oculis tuis; ne tantis afficiar malis. Dirissimè tortum mori finas, & requiem concede. Non inutilis modò, sed & noxius factus sum Ecclesiæ tuæ: aut eam à me libera, & alteri da; aut me solutum ab ea divelle, ut sequester, ignotus, alicubi Tibi soli vivere possim.* Id petit Episcopus à Christi Vicario, & repellitur: auxilium postulat, & non obti-*

^b Deu-
teri. 1.

obtinet; hominem non habet in terris; in Coelis adiutorem non reperit; nulla creatura Deo nolente juvat; ipse Deus tacet; & vel procul abiisse, vel non sentire, vel non esse videtur. Clamat interim Præsul: *exurge, exurge, quare obdormis Domine? Ut quid repellis in finem? Contra folium, quod vento rapitur, ostendis potentiam tuam, & stipulam siccam persequeris; & consumere me vis peccatis adolescentie mee?* Certè, in tam grandi agone non est, quod magis eum affligat, quam præteritorum peccatorum memoria, vel etiam præsentium: & non humana virtutis est, quod tot afflictionibus obrutus, non desperet, aut desinat, sed prorsus divina. Deus enim oculatissimam providentiâ, mirisque modis ita se gerit, eaque omnia permittit; ut ipsum Præsulem, benè probatum, sublimius evehat, & coronet: pro cujus ingenti solatio hic nonnulla brevissimè attexam.

Nil est, quod Episcopum magis humiliet, quam hæc Dei providentissima sui occultatio, in qua evidenter agnoscit, se, non modò parum; sed omnino nihil sine illo posse: cumque præterita mente recurrit, ex præsentium praxi clarè deducit; *omne datum optimum, & omne donum perfectum desursum fuisse, descendens à Patre luminum; & à se mala, tenebras, ineptias, nugæque fluxisse.* Hic fides viget, dum cuncta sine lege, sine ratione, sine justitia, & veluti casu; quinimò, & perperam fieri videntur: & nihil est, quod ad credendum moveat; sed quod removeat, planè multum. Spes ipsa, quæ in prosperis vix reperit ubi dentes figat; in hac tempestate soli Divinæ pietati firmissimè adhæret: Amor vero hic exerit vires, & absque ullo penitus blandimento eum diligit, à quo deseri putat; ejusque bonitatem amplectitur, quem cre-

124 DE CONSOLATIONE

dit in se bonum, & sibi bonum minimè sentit. Quot actus fortitudinis, & patientiæ hic elicit divexatus; quos in malacia perdidisset? *Virum fortem injuria probant*: dicit Augustinus. *Fortitudo, rerum contemptu constat*; inquit Ambrosius. *Non est vir fortis, cui non creseit animus in ipsa rerum difficultate*; Bernardus docet. *Serpens, sitis, ardor arena*; *dulcia virtuti: gaudet patientia duris*: sanctè cecinit Poeta profanus.

In summis angustiis, & in perditis rebus hæc sæpè repetit Præsul desertus: *numquid aliqua creatura quidquam agere potest, quod Deus nolit; quod ignoret; ad quod non concurrat? Fortè, non ipsius est, rebus præfigere metas, modum, ordinem, intentionem, ac temporis spatium? Num eum latet, quantus ipse, qualisque sem; & qua gratia, & qua virtute muni-verit? In agentibus totus est, & in singulis totus; itidemque in patiente: illis dat vires ad exercendum; sed non utique malitiam ad peccandum: huic tolerantiam tribuit ad meritum; non utique gratiam denegat, ut desperet. Satis est mihi, scire, quod Deus errare non potest. Nullus peccat per id, quod patitur, (hoc est, renuente voluntate) sed solum per id, quod agit: inquit Angelicus. In ipsa Redemptoris crucifixione actio displicuit; passio grata fuit. Si persecutorum malitia Deo displicet; grata sit patientis virtus. Nullus me lædet, si me ipsum non læsero; vera læsio à propria voluntate, non ab aliena promanat. In hoc hominum natura consistit (Ut ait Chrysostomus in homilia, quod nemo læditur nisi à semetipso) rectè sentire de Deo, & rectè inter homines agere: quæ si habeat; auferre ab eo nullus omninò, nec ipse Diabolus potest; nisi ipse, qui ea possidet, perdat. Stet ergò Episcopus imperterritus, & certò sciat, se facturum cum*

tenta-

tentatione proventum. Adest præsentissimus Deus, & abesse nequiquam potest; videt, adjuvat; sed videri, & sentiri non vult. Cæci sumus; Dei adiutorium credere oportet; non sensibus experiri. Ah! quoties in desperatissimis rebus felix eventus subito emerfit! Ut noveris; omnipotentissimam Dei providentiam, non mediis, non humanis dispositionibus indigere; sed posse in aquis vehementibus siccum iter præbere; solvereque de petra durissimâ fluvium dulcissimum. Ipsa mortuos excitat, etiam quatruiduanos. Qualibet die novum aperit in mundo Theatrum; & quos heri ostendit miseros; hodiè fortè, vel crastinà proferet exemplo felices. Quid futurum abscondat, profectò nescimus. Scimus tamen, & fide credimus, *quod momentaneum hoc; & leve tribulationis nostræ, æternum gloria pondus operatur in Cælis*. Patere hodiè Dei simulatum abscessum: diù vixisti; si non cras, saltem brevi eum clarè videbis in Cælo; qui justus, & misericors Agònotheta, pro tam multiplici, & temporali martyrio æternas dabit coronas; (melius dixerim) erit ipse corona.

CAPUT XXXIV.

Ad ambientes Episcopatum Parænesis.

Longè plura in medium proferre potuisssem pro Episcoporum solatio in ipsorum martyrio; sed neque vacat, neque prolixior fieri volo in argumento, cui multa suppeditant Sanctorum Episcoporum scripta, & ipsorum præcipuè gesta. Lectores ad eos remitto; & præsertim ad Chrysostomum exulem, & in exilio defunctum.

Nunc

126 DE CONSOLATIONE

Nunc juvat ad eos sermonem convertere, qui hoc martyrium minimè reformidant; sed ambiunt, nescientes, profectò, quid petant. Cum Mauri magnam Hispaniæ partem armis, ac viribus possiderent, multos Christi fideles martyrio afficiebant; quorum sortem cum plurimi concupiscerent, ultro, nullâque necessitate coacti, se Tyrannis, atque tortoribus objiciebant; ut Martyres fierent: sed plerique, in poenam temeritatis, & nimix in se confidentiæ, fiebant Apostatæ: Ut longè priùs contigerat in Africa sub anno 301. ubi nonnulli Patres ultroneam hanc sui exhibitionem, Tyrannorumque provocationem inhibuere; nisi quis specialiori Spiritus Sancti impulsu urgeretur. Magis tamen vetita est ambitio spiritualis martyrii, quod sub insulis reperitur: & licet Apostolus dicat: *qui Episcopatum desiderat, bonum opus desiderat*; non propterea desiderium laudat; sed opus: possum enim ego bonum opus desiderare, sed malo utique desiderio: ut perpetrare miracula, futura prædicere, nosse occultissima. Quod autem magis vetitum sit Episcopatum desiderare, quam corporale martyrium, vel inde liquet, quod ad hoc ita fuere aliquando à Spiritu Sancto quidam impulsu, ut illi spontè se objicerent: ad Episcopatum verò neminem ex Sanctis invenies fuisse ita proclivem, ut illum ultro appetierit. Omnes pios refugisse videas; quæsisse neminem. Grande argumentum temeritatis in eo, qui petit! Altè perpende, quid egerit Ambrosius, ne fieret Episcopus; & maxime pudeat te plura gerere, ut fias. Ille, Divinitus in-
 auguratus, restitit: tu inconsulto Deo expetis. Ille populo acclamanti succensuit: tu laudatus, exultas. Ille sævitiam finxit, ut reprobareretur: tu blandiris, ut eligaris.

Ille

Ille famæ jacturam exposuit, ne videretur idoneus; tu probitatem ostentas, ut habearis emeritus. Ille suffragium Cæsaris non admisit: tu Principum favorem captas. Ille, invitus, gemens, coactus fuit subire Thronum: tu vix cohiberi potes, ne ascendas. Et nihilominus, quæ non fuit ille passus in Episcopali martyrio? Et tu nihil in eo passurum te putas? Verùm, ille pari non timuit, quia Cathedram non ambivit: tu verò timebis, quia quæstisti. Et quid quæstisti? Deus bone! Amissa libertate, Mancipium fieri, damnari ad bestias, ad metalla, ad naufragia, ad præcipitia, ad ignem, ad gladium, & ad cætera mala, quibus Præsules exponuntur. Fortè dices, te fortiter hæc omnia pro Dei gloria, & animarum salute perpeti velle. Magnus profecto ante agonem Athletæ! Magnus item athleta, qui hætenus Tyro, aut pugil non fuit! Audi Nazianzenum adversus hujusmodi audaces, zelo percitum, declamantem. *Nunc^a periculum^{20.} est, ne ordo omnium sanctissimus sit omnium maxime ridiculus: non enim virtute magis, quam maleficio Sacerdotium paratur: nec dignorum, sed potentiorum throni sunt. Cumque, nec Medici, nec pictoris nomen quisquam obtineat; nisi prius morborum naturas consideraverit, aut multos colores miscuerit, variasque formas pennicillo expresserit: Antistes contrà facile invenitur, non elaboratus, sed recens; quantum ad dignitatem simul satus, & editus: quemadmodum Poetæ Gigantes fabulantur. Subinde prosequitur: nos una die Sanctos fingimus, eosque sapientes, & eruditos esse jubemus, qui nihil didicerunt; nec ad Sacerdotium quidquam prius tulerunt, præterquam velle. Papa! Quam egregia præfectura! Quam excelsus animus! Protinus Samuelem ab incunabulis sanctum in ore habemus;*

128 DE CONSOLATIONE

mus ; protinus sapientes sumus , protinus praeceptores , protinus legislatores , protinus rerum divinarum cognitione sublimes ; nosque metipsos calculo nostro caelestes designamus .

Qui nunquam agros excoluit , si villicus esse velit , & fiat ; quid faciet , si spineta , sentes , & vepres , zizania , urticae , aconita , & cicuta ; sata , plantas , vineasque inficiant , & perdant ? Qui mare nunquam ascendit ; si navem sibi committi curaverit , & ad clavum sedere ; oborta tempestate quid agat ? ventos nescit , acum ignorat , chartam nauticam non intelligit , magnetis naturam planè miratur ; sed minimè assequitur : quid (inquam) agit saviente borea , vel austro ? Qui nunquam armat tractavit , si belli dux esse contendat ; irrupente hoste : ac validè urgente , quomodo commissas acies firmabit , disponet , obtrudet ? Utinam omne damnum , omne discrimen , omnis ruina solum villicum , aut nautam , aut ducem obrueret ! Ineptus Episcopus vix solus perit :

a De
Reg.
Præl.

6. 126.

b lib. 5.

de Sa-

cerdo-

tio .

c bom.

3.

d lib. 5.

tom. 5.

de Sa-

cerdo-

tio .

^a Grande prorsus onus , negotium multarum vigiliarum ; pavendumque ministerium est regimen animarum : ait Laurentius Justinianus . ^b Quippè difficultates eas omnes recensere , quas Episcopum tolerare oportet ; prorsus nihil aliud fuerit , quam maris altitudinem emetiri : scribit Chrysostomus . In caput verò primum Act. Apostolorum sic ait : ^c Nonnè terrarum Orbis imperium tenet Imperator : hic autem unius Civitatis Episcopus est ? Sed tantum plus curarum habet hic , quantum interest inter aquam fluminis vento agitatam , & inter mare intumescens , & infans . Subdit autem Chrysologus . ^d Certè , neque mare unquam potest undis carere , neque illius animus curis , atque angustia . Cogitet ergo , qui honorem affectat :
tempe-

tempeſtatem ſe affectare (ut ait Philo hæbr.) Dicit fortè inſularum Venator : Si quid in me deeſſe perſpexero in Animarum regimine, per alios ſupplere curabo, & Vicarios diligentiffimè adſciſcam, qui meos defectus abundè ſuppleant. O ſtulta reſponſio ! ergò ſalus ovium erit magis Mercenario credenda, quàm vero, legitimoque Paſtori ? Nonnè in Epifcopi electione electi induſtria deligitur ? Oh ! quam differunt vox Opilionis, & vox Paſtoris ; zelus Patris, & zelus Nutritii ; præſentia Principis, & præſentia Miniſtri ? Oh ! quam diſtat primaria poteſtas à poteſtate Vicariâ ! Non ſic effugies manus Domini : ut Epifcopus judicaberis, ut Epifcopus condemnaberis : Vicarius portabit cenſuram Vicarii, non Epifcopi. Oh ! quam præpoſterus ordo ! Par erit Vicarius oneri Epifcopali, cui ſe imparem fatetur Epifcopus ? Hic ergo erit Epifcopo major. Audi Spiritum Sanctum, ſic te monentem : *° noli querere fieri Judex,* ^{e in Ec} *nifi valeas virtute* (non utique alienâ ; ſed tuâ) *irrum-* ^{cleſiaſt. c. 7.} *pere iniquitates*. Time, ambitioſe, præfici ; & vel idoneus, Epifcopari formida. Compara te Bernardo, Thomæ Aquinati, Bernardino, aliifque quamplurimis, in albo Sanctorum adſcriptis ; qui à præcipuis Eccleſiis expoſtulati, ſtrenuè reſtiterunt, ſe indignos tanto munere faſſi : & vide, nùm tu illis dignior exiſtas ; ut audeas, non poſtulatus, ex viduis Eccleſiis, unam, aut alteram poſtulare. Si te meliorem exiſtimas ; ſuperbus es nimis : ſi non eſſe putas, indignus petis. Utrobique te reum agnoſce, tam prælationis iniquæ, quàm petitionis indignæ. Habes igitur Sanctorum exempla ; & eorum qui nullatenus præeſſe voluerunt ; & eorum, qui præeſſe violenter coacti ſunt : nullum ex his imitaris ; nec re-

130 DE CONSOLATIONE

nuis, nec cogitis: ultrò appetis. Eos condemnas, improbus Iudex, si te benè facere putas. Verius tamen, illi te damnant, quorum virtutem nullo pacto vis sequi. Vel exinde tanto munere indignus appares, quod te dignum fateri non erubescas; & certè adhuc silens fateris, cum illud, aut ultro quæris; aut non invitatus acceptas.

C A P U T XXXV.

Ad eosdem.

Tanta est ambitionis prurigo, ut efficacioribus indigeat argumentis compesci. Ecclesiarum perniciēs, quibus ambitiosi præficiuntur; & eorum ruina, qui præfici ambiunt; cogunt me contra eos vehementius insurgere, illosque prolixius insectari: quod hinc faciam unicâ quidem; sed & prorsus irrefragabili ratione; cui si non cesserint, cum Juda peribunt, & eorum Episcopatum alter accipiet.

Audite Chrysostomum, sic declamantem, & contremiscite Præsulatus ambitiosi: ^{a bcm.} Non temerè dico; sed ut ^{3. in} affectus sum, ac sentio, loquor. Non arbitror inter Episcopos multos esse, qui salvi fiant; sed multò plures, qui pereant. In causa est, quoniam res excelsum requirit animum. Non vides, quàm multas res oportet adesse Episcopo? Quam innumeris oculis illi sit opus undique? Ut sit appositus ad docendum; ut tolerans sit malorum; ut subditorum salutem anteponat suæ; ut tenax sit, ac fidelis in doctrina sermonis. Sed quanta hoc difficultatis est! & insuper, quod alii peccant, illi imputatur. Hæc ibi; & in homilia 4. ad Hæbreos, horrore percussus interrogat:
quid

quid dicemus infelicibus illis, qui semetipsos ad alios regendos precipitant, & se in tantorum suppliciorum abyssum jactant? Perpendite verba, pensate pericula; & si salvari cupitis, periculosissimum fugite Præfularum. Si privatus homo, etiam Religiosus, & Anachoreta in directo Dei judicio damnari timet: quid ni plus id reformidet, qui publicum gesserit Magistratum, eumque sacrum, & planè divinum? Gregorius Magnus ad singulos Episcopos ita loquitur: ^b *Penset ergo unusquisque, qui ad satisfaciendum districto Judici de sua fortasse anima vix sufficit; quod tempore reddendæ rationis quot regendis subditis præest; tot (ut ita dicam) animas solus habet: quæ nimirum cogitatio si assidue mentem nostram occuparet, omnem superbiæ tumorem sine dubio premeret.*

^b 4. mo
val. ca.
30.

Sanctus Paulus Apostolus, classicum personans, omnes creaturas provocat ad certamen: ^c *Quis ergo (inquiens) nos separabit à charitate Christi? tribulatio, an angustia, an fames, an nuditas, an periculum, an persecutio, an gladius? (sicut scriptum est: quia propter te mortificamur tota die: æstimati sumus sicut oves occisionis) sed in his omnibus superamus, propter eum, qui dilexit nos. Certus sum enim, quia neque mors, neque vita, neque Angeli, neque Principatus, neque Virtutes, neque instantia, neque futura, neque fortitudo, neque altitudo, neque profundum, neque creatura alia poterit nos separare à charitate Dei, quæ est in Christo Jesu Domino nostro. Magnus animus, egregius, imperterritus Miles! At verò totus alius, & à se ipso diversus sic ait: ^d *Et ego in timore, ac tremore multo fui apud Vos. Ergo ne, qui omnes provocat, imò, & omnia; ita timet, ac tremat? Ita quidem; sed non alios, nec alia. Se tantum, se utique timet,**

^c c. 8.
ad Ro-
man.

^d epist.
1. ad
Corin-
thios.
c. 12.

132 DE CONSOLATIONE

ac tremit, in animarum cura formidolosus. Attendite Chrysoſtomum in hunc locum. Si *Paulus*, Dei mandata sic obſervans; ut *majora* etiam, quam ipſi à Deo injuncta fuiſſent, præſtaret; nunquam ſui ipſius, ſed ſubditorum tantum commodo ſtudens, ſic ubique formidabat, Magiſtratus ſui molem expendens: quid faciemus ipſi, qui multi ubique ſumus in quærendis, quæ noſtra ſunt? Qui Chriſti mandata, *Pauli* exemplo, non modò non ſuperamus? ſed eò majori ex parte transgredimur. Ubi ergo *Paulus* timuit, tu audes? Væ tibi, ſi vel unica tantum anima, tuâ culpâ cadat in præceps.

Quid te movet, ut Episcopatum ambias? Fortè honor, tituli, rheda, palatium, redditus, famuli, thronus, thiara? Verùm, non hæc ſunt Episcopatus: nil ex his habuere primi Eccleſiarum Episcopii; nec modò habent, qui ſunt in Libano. Non ergo Episcopatum deſideras; ſed Episcopalia: non bonum opus; ſed boni operis adminicula. Oh! quam præpoſterè agis! Finge te brevi moriturum; aut iturum ad Indos, nunquam hùc reverſurum: & deſines ambire gradum, cujus blandimenta, vel ſepulchri propinquitas, vel magna terrarum diſtantia non ſentiat. Quidam Religioſus infra quinquennium pro nullitate ſuæ profeſſionis apud me inſtetit, & metum adfuiſſe tandem aliquando, me, de induſtria moras trahente, atque cunctante, probavit. Planè noveram, eum in ſæculo non probè victurum; adeòque ipſius ſalutem in magno periculo fore: promiſi de profeſſionis invaliditate decretum; hac tamen conditione, ut priùs fidejuſſorem inveniret, qui ſuo juramento ſponderet, eum ſaltem ad ſex meſes poſt abditam Religionem inter vivos futurum. Negavit ille, ſe talem ſponſorem ullatenus dare

dare posse : cumque ipse in ea conditione persistere-
 & ille negaret, ob mortis incertissimam horam ; tunc
 apertè subtexui : Ut quid ergo ita sæculum deperis , in
 quo nec semestrem vitam tibi certò promittere potes ?
 Quid , si statim post exitum moriaris ? Hac animadver-
 sione perculsus , in Religione permansit . En ! Thiaræ
 affectatur , quam diù vivere speras ? Quid si brevi desi-
 nas esse ? Quò decus , quò corpus , quò profusæ divitiæ ,
 quò anima abibunt ? Age , optimè vir ; si Religionem
 vis ingredi ; si Eremum petere ; si ad Sarmatas proficisci
 probo . Si Episcopalem Thronum scandere cupis : non
 probo . Cadere potes , & brevi ; & fortè , undè per sæ-
 cula æterna exire non possis . Quam differunt inter se ,
 tempus , & ævum ! Quæ finem habent , non modica
 sunt , sed nulla ; si comparentur æternis . Ergo , non tu
 queras Episcopatum ; sed ille te : ne sis Insularum vena-
 tor ; sed præda .

Ità magnus Basilius (ut inquit Gregorius Nazianze-
 nus in oratione de ipsius laudibus) *non hanc potestatem*
furatus, nec eam per vim petitus, nec honorem prosecutus;
sed ab honore quæsitus dicitur : & Petrus Damianus de
 S. Severo , qui Columbæ judicio coactus fuit Episcopa-
 tum subire : ^c *Conqueritur, ait, intra se Severus, nil sibi* ^{c. 14.}
profuisse refugium : verumtamen adhuc suspicatur dece-
ptam errore columbam . Quam procul ab Insulis animo
 aberat , qui adeò manifesto miraculo ad eas ferebatur ,
 & vix tandem , vel illi fidit , aut cessit ! Verùm , contra-
 riis votis curritur ad Ecclesiasticas curas (exclamat Ber-
 nardus) ^f *tamquam sine curis jam quisque victurus sit ,* ^{f. epist. 24.}
cum ad curas pervenerit : & qui nondum curas experti
sunt , videntes alios , qui jam humeros submiserunt huic
sarci-

134 DE CONSOLATIONE

sarcina, non solum non gemere tamquam sub onere, sed insuper appetere plus onerari: non deterrentur periculis, quæ cupiditate ceca non vident. Quæ ista insania est? Ubi timor Dei? Ubi mortis memoria? Ubi gehenna metus, & terribilis expectatio illa iudicii? Quò ascendis miser, ut ab altiori gradu sit casus gravior? non cum tanta alacritate currerent ad honores, si sentirent & onera. Gravari profecto metuerent; nec cum tanto labore, & periculo dignitates affectarent. Affectant autem, quia sola attenditur gloria, non pœna: quam ipse spirituale, mysticumque martyrium appello. Sanctus autem Anselmus in

2 c. 3. *illud Apostoli ad Hæbreos. Nec quisquam sumit sibi honorem, sed qui vocatur à Deo tamquam Aaron, sic ait: percutiuntur hac sententia, qui honores Ecclesiasticos, ad quos divinitus non vocantur, arripere cupiunt: qui enim se ingerit, & propriam gloriam querit, non sumit sibi honorem, si Pontifex, aut Prælati in Ecclesia factus fuerit; sed gratia Dei rapinam faciens, jus alienum usurpat: & ideo non accipit benedictionem, sed maledictionem.*

Miraberis fortè, quod tantum avertat ab iis, qui præferri contendunt; & parum erit, nisi etiam contra me irascaris, avertentem animum tuum ab eo bono, quod impensissimè deperit. At imitare, irascere, quantum velis; dummodo per me à periculo erutus, salvus fias. Defunctus olim, quidam, cui alius oblatas infulas respuere, persuaserat; huic in oratione lætus apparuit.

h lib. de vita, & Regem. scopatus: nam scito, quia nunc essem de numero damnatorum, si fuisset de numero Episcoporum. Ita refert Cæsarius. Ergo, ne irascaris; sed gratulare; meoque tam salubri consilio utere, dum utique potes, & debes.

CA-

CAPUT XXXVI.

Ad electos in Episcopos.

E Lecti ritè in Episcopos illi sunt, qui vocantur tanquam Aaron, Episcoporum figura. Qui ambiunt non dicuntur electi; sed eligentes. Verùm ad primos Episcopos Christus ait; *non vos me elegistis; sed ego elegi vos*; probè significans, nemini hujusmodi Præfecturam esse tradendam, qui eam ambiat, sed quæsito, & electo. Non enim homini consulendum est, sed Ecclesiæ. Huic autem, qui sic eligitur, ait scriptura: *Fili accedens ad servitutem Dei, præpara animam tuam ad tentationem*. Nulla prorsus major Dei servitus, quam in salutem animarum eidem cooperari, & nusquam meliùs, quàm in Cathedra Episcopali: at nusquam etiam tentatio crudelior, & immanior; ut hætenus vidimus. Quid ergo faciat Episcopus, non *ultroneus*, sed quæsitus; & ritè electus? dignitati præferat humilitatem; periculosum onus refugiat; & id pro viribus agat; ut cum prædictis Bernardo, Thoma Aquinate, Bernardino, & aliis Sanctissimis Viris liber abire sinatur: sin minus, ut invitus, & coactus cum Ambrosio, Gregorio, & mille aliis summis Præsulibus, tamquam victima ad aras, trahatur ad Thronum. Si effugiat; poterit gloriari cum illo relato à Thoma Cantipratano, qui rejecto Episcopatu, & pridem vita functus, oranti Amico sic ait: ^{a lib. 1} *quod in vita* ^{exëpt.} *semper timui, nunc scio: scilicet, quod si Episcopatus Ca-* ^{cap 29} *thedram ascendissem in damnationis periculum incidissem.* Si verò effugere non valuerit, caput Imperio Dei, ejusque

136 DE CONSOLATIONE

que Vicarii submittat, trahique sinat ad spirituale martyrium, victima obedientiæ; non utique præsumptionis; & qui elegit ad onus tam grande, grandes quoque vires suppedabit, ut ferri possit.

Hæc autem cunctis electis, & utcumque in posterum eligendis, suadeo. Primum, ut exercitia, quæ dicuntur spiritualia, seriò perficiant; eoque tempore tanti muneris pondus æstiment, suasque vires perpendant; & Deum enixè præcentur, ut si possibile sit, transeat ab eis Calix iste: sed tamen ita, ut illius voluntas fiat, non ipsorum. Sanctus Gerardus Carmelita, nobilis Venerus, primus Ungarorum Episcopus, cum Insulas effugere non potuisset; ad eas, non decem dierum; sed septenni abditissima exercitatione, se antea in Eremitio disposuit; & subindè infulatus, Martyr vixit, & Martyr occubuit.

Ne autem ab hujus operis argumento nimium exire videar, alia, quæ ab hujusmodi candidatis exigerem, compendio dicam. Attentè perlegant auctores illos, qui de Præsulibus agunt; præsertim verò Divi Gregorii opus de Cura pastoralis; Dionysii Cartusiani de Regimine Episcoporum; stimulum Pastorum; Alexandri Sperelli, Eugubini Præfulis *Episcopum*, ubi egregiè, fusèque boni Antistitis partes describit. Ita quoque Manuale Episcoporum Januensis, & alios Tractatus hujusmodi; ne prius ad praxim accedant, quàm tanti ministerii notitiam theoricè prælibaverint. Ignorantia muneris multos decipit; & ubi de animarum salute agitur, si errare contingat, longè turpissimum est dicere: *non putaram*: Hoc martyrium respuit inermes, aut decipit; nec rarò vincit: Cathaphractus exigit, probèque munitos;

nitos ; ne cadant victima dæmonis , qui pro Christo hostia sunt infolata . Magnum ipsorum erit solatium , prævidisse ; ac etiam quantum possibile fuerit , hujus agonis insidias , pericula , & pœnas , opportunè cavisse . Nec minùs utile dixerim , in propriæ Diœcesis Theatrum dignè ingredi , & virtutum , non tam fama , quàm exercitio auspicari martyrium . In vulgus enim plurimùm valet opinio , eaque prima , sed fortiùs mala , quam bona .

CAPUT XXXVII.

Ad Episcopos actu curam Animarum habentes .

Hoc meum qualecumque opus de consolatione , ad vos præcipuè dirigitur , qui in agone positi , certamen habetis adversùs Inferni , & mundi Phalanges ; seu potiùs ipsæ vos imperunt , dilacerant , & Martyres gloriosos efficiunt . Fratres mei dilectissimi , quos omnes majores agnosco , & ut præcellentissimos Dominos veneror ; ego minor natu , & vile mancipium , vos Apostolicis Jacobi verbis hortari præsumo , aut veriùs consolari : *Omne gaudium existimate , cum in varias tentationes incideritis ; scientes , quod probatio fidei vestræ patientiam operatur ; patientia autem opus perfectum habet .* Ad grande opus vocati estis ; ingens onus portatis ; & quamquam Christi oves pascitis , ut oves nihilominus inter Lupos missi estis . Operari oportet ; ferre onus ; pati morsus ; dilacerari . ^{a s. ad} *Equidem cum Paulo repletus sum consolatione , superabundo gaudio in omni tribulatione vestra ; quoniam merces vestra copiosa est in Cælis .* Mea mater , Hispaniæ Decus , Theresia , propè mortem , post

*Corin.
cap. 7.*

138 DE CONSOLATIONE

tot exanthlatos labores ; post tot , & tantas ærumnas , infirmitates , calamitates , & persecutiones ; audacter dicebat : *se de his omnibus plenam mercedem recepisse fas-suram ; si per ea , vel unius Virtutis actus Deo gratus fieret , qui sinè illis minimè fieret .* Eja , Nobilissimi Commilitones , non unus virtutis actus ; sed plurimi vestro labore à nonnullis vestris subditis exercentur ; & (quod majus est) multa mala , vestro zelo , & vigilantia desinunt esse ; aut non incipiunt , & minimè fiunt , quæ aliàs certissimè fierent . Facile credo , vestra ope unam , vel alteram animam , & fortè plures , nunc in Cælo reperiri , quæ sinè vestro auxilio periissent . Oh ! quam gloriosum est , ab Inferni faucibus animas eruisse , & inter beata Sanctorum Agmina æternum victuras collocasse ! Non istæ reddent odium pro gratia ; sed optimis benefactoribus perquam gratissimæ , Deo preces pro eorum salute profundent ; per quos salutem se noverint consecutas . Si fas est dicere , pie credo , vix posse damnari , qui alios salvos facit ; juvante Domino cooperatorem suum ; & intercedentibus , qui per eum salvati sunt , pro ministro salutis suæ . Non vos pigeat , vel per acerbissimas pœnas ab Inferni pœnis unicam saltem animam liberare ; quin potiùs charitas urgeat , per immane , sed breve martyrium , unicam saltem animam æternæ felicitati donare . *Gaudete , & exultate , quoniam merces vestra copiosa est in Cælis .* Desinent pœnæ ; cessabit martyrium : merces verò , & gloria , & felicitas æternum durabunt . Temporale , quod cruciat ; æternum est , quod delectat . Malorum , quæ apud Indos perpessus fui , vix modo recordor . Ita eorum , quæ apud Græcos , & , quæ apud Brutios ; quinimò , & quæ hic hætenus utcunque sum passus :

sus : omnia per somnium mihi accidisse videntur ; & mi-
 ror , aliquandò ea ita sensitse , quæ nunc profectò deri-
 deo : & certè me pœnitet , nugas , ineptias , adversitates
 tanti æstimasse , quas contempsisse debueram . Quid
 tandem , aut delectabile , aut utile , aut honestum eri-
 puere ? Nec victus defuit ; nec operimentum ; nec sa-
 nitas . Si cuncta prosperè , si ad votum omnia cessissent ;
 non ita valerem . Si breve tempus grandis tormenti
 delet memoriam , quid faciet æternitas ? Si post annum
 vix recordamur malorum , quæ nos priùs dirè afflixer-
 unt : quid faciet in æterna beatitudine sæculum ? Quid
 centum , quid mille sæcula ? Veteris Testamenti , &
 Ecclesiæ primitivæ martyres , antiquarum pressurarum
 penè obliti ; nunc gaudent sine fine , & *gaudium eorum*
nemo tollet ab eis . Si æmulari non audemus ; saltem imi-
 temur , Ambrosios , Chrysostomos , Gregorios , aut
 etiam Ignatios , animosè provocantes bestias ad devo-
 randum . Virgo Blandina , cum tentaretur , & torque-
 retur , aiebat : *Christiana sum , Christiana sum* . Nos
 ergo , vel Fœmina doceat , in nostro spiritali martyrio
 strenuè respondere : *Episcopi sumus , Episcopi sumus* ; hoc
 est *Martyres ex officio* : & libentissimè patiamur . Me-
 mentote Christi Jesu , eumque imitamini ; *qui proposito*
sibi gaudia , sustinuit crucem , confusione contempta . Di-
 camus cum Paulo . ^b *In omnibus tribulationem patimur ;* ^{b ad}
sed non angustiamur : aporiamur , sed non destituimur ; ^{Chorib.}
persecutionem patimur , sed non derelinquimur ; deicimur ,
sed non perimus : semper mortificationem Jesu in corpore
nostro circumferentes , ut & vita Jesu manifestetur in
corporibus nostris : Semper enim nos , qui vivimus , in
mortem tradimur propter Jesum . Quid melius ? Quid
S 2
jucun-

140 DE CONSOLATIONE

jucundius? Quale solatium, hæc omnia perpeti propter Jesum? idcirco ibant *Apostoli gaudentes à conspectu concilii; quoniam digni habiti sunt pro nomine Jesu contumeliam pati*. Mei ergo Commilitones, in angustiis, in afflictionibus, in agonibus, in martyrio vestro gaudere:

ci. Pe-
ni s.

nam, cum apparuerit Princeps Pastorum, percipietis immarcescibilem gloriæ coronam. Inclita mater magni Præfulis Ancyranæ Clementis invictissimi martyris, his verbis identidem repetitis, longè melius, quam Leonum medullis, filii animum ad pertinacissimum viginti octo annorum roboravit agonem: *Negocium (Gnate) pro quo contendimus vita aterna est*. Hoc pabulo vos etiam saginate cor vestrum, ut in Episcopali martyrio firmius perseveret, passim repetentes: *Negocium, pro quo contendimus, vita aterna est*.

CAPUT XXXVIII.

Ad Episcopos Titulares.

Qui Episcopi Titulares dicuntur, aut spirituale animarum gubernium non habent, aut illud extra proprias Ecclesias de S. Sedis Apostolicæ imperio exercent. De his eadem est ratio, ac de aliis, de quibus hætenus egi. Ad primos ergò nunc meus sermo convertitur. Fratres nostri vos estis eodem charactere insigniti; quos Summus Pontifex, Ecclesiæ Caput, in suæ sollicitudinis partes assumpsit, vel Romæ in Congregationibus dirigendas; vel apud Reges, Principes, & Respublicas in Nunciaturis repræsentandas. Nec vobis puto deesse martyrium; sed alterius generis esse arbi-

arbitror : cum non proveniat ex immediata Episcopali animarum cura , sed à negociis , & quidem arduis , & gravibus , quæ ad Ecclesiæ commune bonum vos geritis . De his nihil mihi occurrit dicendum ; sed dignitatem vestram , quæcumque illa sit , veneratus , obtestor : ut fratres vestros Episcopos in agone positos juvare , velitis ; ut misereamini pressurarum eorum ; ut vestro suffragio characterem vestrum in vestris Coepiscopis honoretis ; ut vestro favore illorum gradum stare faciat ; nè adversantium impetu fortè labatur . Fas est , & decet , vos meminisse Fratrum vestrorum eisque stipendia (ubi opus fuerit) auctoritatis vestræ impartiri . Supremus in Ecclesia Dei Episcopalis character clariùs fulgebit in vobis , si etiam in aliis refulserit .

CAPUT XXXIX.

Ad Populum Paraneis .

Vestri Pastores , Agricolaë , Magistri , Duces , Principes , & Parentes Episcopi sunt ; eòque majori æstimatione digni , quantò spiritualia temporalibus longè præcellunt . Non est Pecudis , vexare , lacerare Pastores : non est Vineæ , Agricolas felle potare : non est Discipulorum , verberare Magistros : non est Militum , Ducem persequi : non est Subditorum , insurgere in Principes : postremò , non est Filiorum , temerare Parentes . Ad hos omnes in vobis exigitur amor , obsequium , sequela , docilitas , patientia , simplicitas . Secùs agentes , non tam eos , quàm vos ipsos offenditis : per hæc omnia discurrete , & clarè intelligetis , vestro malo vos perperam cum eis agere .

Obe-

142 DE CONSOLATIONE

^a *Obedite Præpositis vestris, & subiacete eis: ipsi enim pervigilant, quasi rationem pro animabus vestris reddituri; ut cum gaudio, hoc faciant, & non gementes: hoc enim non expedit vobis. Ita præcipit vobis Apostolus: perpendite vim, rationemque præcepti; & inobedientiæ præjudicium vestrum fore, non præpositorum, agnoscite.*

Christus Jesus, quem adoratis, Episcopis ait: *qui vos audit, me audit: & qui vos spernit, me spernit*. Nil efficacius dici potuit ab æternæ veritatis oraculo ad incutiendum vobis timorem, obsequium, & obedientiam erga Prælatos! *Deum audit, qui eos audit: Deum spernit, qui eos spernit*. Quid clarius? Quid horribilius? Et tamen, quid certius? Qui negat; Acatholicus est, & planè infidelis; Vos Divinissimæ Eucharistiæ Sacramentum humillimè cernui adoratis; quia Christus dixit: *hoc est corpus meum*: ut quid ergò vocem Præsulis obsequentissimè non audiat, cum idem Christus affirmet: *qui vos audit, me audit*? Nùm in uno verax est; in altero mendax? blasphemum est, id asserere. Certissimum itidem est, eum, qui sperneret sanctissimum Eucharistiæ Sacramentum, Christum spernere: at non minus de fide est, Christum spernere, si Præsulem spernat. Inexcusabiles eritis, si excusationibus vestris omnem aditum, mòx præclusero.

Prælato vestro vos fortè obijciatis, aut nobilitatis, scientiæ, aut prudentiæ, aut urbanitatis defectum; aut etiam zelum indiscretum, livorem, intentionem obliquam; aut si quid est aliud, quod eum reddat odibilem. Ita sit: vos tamen excusare nō possum, nisi obsequamini, nisi revereamini. Qui ait: *qui vos audit, me audit: qui vos sper-*

spernit, me spernit; absolutè locutus est; nullà exceptionem admittit. Crevit in Sylvis Arbor ignobilis; excisa, jacuit in luto; vetustate contabuit: non ita tamen, ut non posset ex ea Crucifixus effingi. Exponitur hic adorationi Fidelium: quis renuat, obtendens ligni dedecus contemptibile? Non materies adoranda; sed forma. Idem, & in Prælato contingit: Non ejus sanguis, non genus, non singularium excellentia talentorum; sed vox audienda, jussa præstanda, auctoritas nunquam spernenda. Ut in Crucifixo consideratur effigies; in Prælato loquela. Ibi Christi repræsentatur Imago; hic utique vox. Ibi videtur, hic auditur. Utroque idem est, vel sono, vel forma; nusquam spernendus; ubique adorandus; tam in cruce lignea, plumbea, ferrea, argentea, vel aurea; quàm in Præsule ignobili, indocto, inurbano, imprudenti, livido, & palàm vitioso; vel è contra, undique meritissimo: quod apertissimis verbis ipsemet Christus asseruit, dum cunctis districtè præcepit, dicens: *super cathedram Moysi sederunt Scribæ, & Pharisei: quaecunque dixerint vobis servate, & facite: secundum opera eorum nolite facere.* Nulla præfectura efficit homines impeccabiles: & Dei assistentia, non operibus, sed voci promittitur. Cuicumque sedenti super cathedram Moysi (quæ modò est Christi) sive Scriba sit, sive Phariseus, sub pœna damnationis æternæ parendum est; non irascendum, non insultandum, non obloquendum; non denique gravandum, odio, perfidiâ, persecutione, martyrium.

144 DE CONSOLATIONE

CAPUT XL.

Ad Principes, & Magistratus Paraneſis.

D Ignitati vestræ verba facturus, ab obsequio exordior, quo vos ex animo veneror. Non aliquid dicam, ut descendatis; sed utique, ut steteris in gradu vestro. Si altius ascenderitis; violento ascensui casus imminet. Spirituale gubernium sublimioris ordinis esse, quam temporale; celsitudo animæ supra corpus facile probat: nec quisquam negabit; æterna prævalere caducis. Ex his clarè deducitur, utramque jurisdictionem sphaeram habere diversam: & cum ea, *quæ à Deo sunt, ordinata sint*; planè liquet, sphaeram alteram alteri subesse; ut in Cœlis vidimus. Probè igitur intelligentia vestra per totam sphaeram, licet amplissimam, proprii motus; hoc est, regiminis, & imperii, diffundet effectus; si ultra eam, minime protulerit. *Non sunt miscenda sacra profanis*. Certè, Magistratus, Gubernatores Urbium, & Provinciarum; Principes, Respublicæ, Reges Imperator, nimis multum præstabunt, si cuncta persolvant, quæ ab eis exigit proprii muneris, perquam amplissima, & sublimissima ratio. Non est auctoritatis profanæ, sacra tractare; de Clero Regulari, vel non Regulari; de Ecclesiis, de claustris, de rebus, de redditibus, jam Deo attributis disponere. Deus ipse, *in cujus manu sunt omnium potestates, & omnium jura Regnorum*, discrevit terminos utriusque dominii, cum ait: *reddite ergo, quæ sunt Cæsaris, Cæsari: & quæ sunt Dei, Deo*. *Nolite transire fines vestros*: ad vos pertinent, quæ cor-

corpus respiciunt; ad Episcopos, quæ animam, quatenus ad æternam felicitatem per Dei cultum, & obsequium, præmiis, privilegiis, defensione, coercitione, aliisque mediis opportunè dirigitur. Hoc fides catholica docet: qui aliter credit, hæreseos Anglicanæ sectator est; vel eam imitatur, si aliter agat. *Episcopi non quarunt, quæ sua sunt; sed quæ Jesu Christi*: Cui prorsus injuriam faciunt, qui eis obstitunt. Non est facile dictu, quantum in Indiis Orientalibus (ut ipse vidi) Principes Ethnici Archiepiscopatus Angamalenſis revereantur Episcopos, jurisdictionem, immunitatem, & libertatem Ecclesiasticam. Turpe foret, minus apud nos deferri à Catholicis. *Nolite Spiritui Sancto resistere, qui regit Ecclesiam Dei*; nec velitis, minori zelo Episcopos eam rueri, quam vos vestra jura defendatis; aut proferatis. Nusquam legitur, temporale dominium detrimenta sensisse ab Ecclesia; sed passim in commentariis habetur, magna rerulisse incrementa. Quod magis miror, est reperiri etiam aliquando in inferiori Magistratu, & gubernio adversus Ecclesiam, nescio quid æmulationis, ac zeli; ut se cohibere vix possint, quin eam directè, vel indirectè, clàm, aut palàm divexare contendunt. Jura speciosè confundunt; auctoritatem Ecclesiasticam majorem ostentant; utrumque Clerum subiicere fatagunt; Episcopale Tribunal contemnunt; ejus Ministros deterrent; privilegiatos derident; & quam non habent auctoritatem, astu extorquent, cum Ecclesiæ, Præsulive dedecore. Itaque propriam sphaeram transgressi, alienam rapiunt; eam prorsus confusione, quæ fieret, si Cælum inferius, movere superius auderet. Non tamen errare putant se; sed Episcopos, si contranitan-

146 DE CONSOLATIONE

tur : quorum postea sententias , si & ipsi Episcopi fieri possent (mutarâ cum munere mente) utique sequerentur . Oh , si ab habentibus jurisdictionem , quod natura docet observaretur ! Nimirum , nulli facere , quod tibi fieri nolis : quàm rectè cuncta procederent ! Penset quisque , quid faceret , si ea occasione Episcopus esset ; ne quid agat , quod tunc nollit ab alio agi .

Humiliate capita vestra Deo , qui regitis Orbem ; qui qualecumque habetis dominium , revereamini Unctos Domini ; quia hæc est gloria major imperio ; si Ecclesiæ serviat Imperium . Quæ superius ad populum dicta sunt , etiam vos tangunt : Oves estis de Grege Christi , non Pastores : Vineæ Domini Sabaoth ; non Agricola : Discipuli in Schola Christi , non Magistri : Milites in acie spirituali ; non Duces : Ecclesiæ Subditi , non Prælati : Episcoporum Filij ; non Patres . Ergo vestri muneris est , Præfulum non augere martyrium ; sed minuire , solari , & juvare .

C A P U T X L I .

Ad Clerum Paraneſis .

OMnes Ecclesiasticorum cœtus hic alloquor . Inter vos ille ordo resplendat , qui fulget in Cœlo inter Angelicas Hierarchias . In unaquaq; Diœcesi Hierarcha Episcopus est , cui vos omnes subesse debetis . Ab eo in vos lumen effunditur , & per vos Populo communicatur , verbo , exemplo , directione , vigilantia , prædicatione , sacramentis . Illi ius cooperatores estis , & coadjutores . Non ergo vos de cet , ei , vel minimum ad-

adversari, cujus ministerio fungimini, & adjutorio in pluribus indigetis. Ornamentum Religionis est (regularibus ex animo loquor) non detrimentum, erga sacrum Antistitem, obsequium, reverentia, devotio. Recor- demini, quomodo in hoc se gesserint Institutores vestri, & eos imitamini. Qui humilitatem profitemini; vix alibi eam æquius exercere potestis, quam ubi ab Episcopali charactere meritò exigitur. Nullus vestrum superbiæ notam, & execrabilis æmulationis effugiet, qui cum Episcopo contendere velit; qui eum deprimere studeat; qui adversus eum loquatur. Ita fiet reliquo Clero, & Populo scandalum, qui positus est in exemplum. Ars pessima est, ut saltè æstimatione ascendas, Thronum contemptu reprimere, à quo aliquando tandem justè opprimaris. Hoc Deo placere non potest. Id profectò placebit, si martyrem Præfulem, oratione, consilio, auxilio, & exemplo vestro juveritis. Hinc honor, & laus apud homines; hinc apud Episcopum gratitudo; hinc apud Deum præmium, & gloria in vos redundabunt. Sed religiosa pietas, hac exhortatione non indiget, & per se prona virtuti, & Episcoporum summa dilectione devicta.

▲ *Epist*
152,

^a *Insolentia Clericorum, cujus mater est negligentia Prælatorum; ubique terrarum turbat, & molestat Ecclesias: scripsit Bernardus ad Innocentium. Secularis Clerus potiori jure (verius dixerim) omni jure proprio Antistiti subesse debet; ut capiti subsunt reliqua membra; unde vita, unde motus in ea descendunt. Ut in pluribus Diocæsis observavi, putridum membrum est Clericus, qui à suo Episcopo contumaci rebellionem se jungitur. Ejus vita, ipsius motus sunt contra naturalem mystici corporis dispositionem, quæ tota in ordine sita est. Vide acum*

148 DE CONSOLATIONE

nauticam; semper inquieta movetur, nisi polum respiciat, ad quem virtute magnetis naturaliter ordinatur. Ita Clericus (quicumque ille sit) semper anxius, semper turbidus, à suarum passionum tempestate jactabitur; nisi præfixum illi à Deo sydus humili subjectione semper intueatur. Si turbas excitet; si plurium conjurationem arte nexuerit; si Magnatum favore tumescat; si Potentum patrocinio fulciatur; si pecunia, si viribus; si denique ingenio polleat: quid tandem adversus Christum Domini consequetur? Non certè plus, quam Dominus ipse, aut volverit, aut permiserit. Inferat Præsuli damna; id Vulpes, & Lupi Pastoribus faciunt. Ab eo somnum excutiat: id culices vilissimi præstant. Honorem inficiat: id saragit Blatero, & fæmina prorsus infamis. Vitam eripiat: eripere potest, non modò aspis, & vipera; sed & fungus. Malefacere, proprium est Dæmonis. Ergò, & similiter, qui mala molitur adversus Episcopum, aut Dæmon est; aut non est Dæmone melior. Adversus hunc Dæmonem plures habet Episcopus Angelos tutelares: hi occultos cuniculos, quos minas vocant, aperiunt; hi machinas rumpunt; hi dolos eludunt; hi cabalas, seu technas dissolvunt. Ne timeas Præsul, *Angelis suis Deus mandavit de te; ut custodiant te in omnibus viis tuis; ut insidiatores tui cadant in foveam, quam fecerunt; ut eripiant te ab omni periculo, non corpore, sed Spiritu Martyrem gloriosum.*

Nemo sit in ordine Ecclesiastico ab suo Hierarcha divisus; idem sentiat; idem velit. Obsequatur; non jubeat. Sequatur; non ducat. Capiti adhæreat, sed infra, non supra; quod Monstrum esset. Ab eo nullis rationibus divellatur. *Probet spiritus; an ex Deo sint. A*

Deo

• *Deo non est, qui Dominationi resistit; qui ab ea separat; alienat; abducit. Aliorum quæstus, promissa, lænocinia, blandimenta, non te decipiant; ut charitatem lædas; ut superiorem offendas; ut ab ejus pectore, vanis, ambitiosis, speciosis rationibus avellaris. Audi, & amplectere Sancti Eucherii ad Valerium prudens consilium. Ad damnum propriæ salutis alienis non ducamur erroribus. Quid nobis in illo Judicio proderit multitudo, ubi singuli judicabuntur? Obsecro te delictum alienum semper, ut opprobrium respice; numquam ut exemplum. (Quid prodest tibi, si universum mundum lucreris, animæ vero tuæ detrimentum patiaris? Id age, quod egisse pro Pastore, non contra Pastorem, te in morte non pœnitebit. Hinc solus emigrabis, nullo amico, nullo socio, nullo collega stipatus. Mala duntaxat, vel bona opera feres; de quibus coram æterno Judice rationem reddes, Episcopo (si præmortuus fuerit) adstante, qui ejus vices hic, à te fortèspretas, exercuit. Vir probus, docilis est, non agit perperam, contentiones refugit; superiorem veretur, & in eo, non hominem, sed Deum considerat præidentem. Scit, unamquamque rem duas ansas habere; portabilem unam, importabilem alteram (ut Epitectus dicebat) eamque capit à prima, non à secunda. Præceptum exequitur, intentionem, non respicit, quæ omnino videri non potest: & si fortè se malam apertè manifestat; exemplo Davidis à Saulo missi ad pugnandum contra Philistæos, ut periret; ingenti virtute obedire non renuit; non imitetur impetantis malitiam, sed boni subditi præster obsequium.*

Episcopus in præcipiendo habet assistentiam juris, quam ei subiectus in reluctando non habet. In dubio
illi

150 DE CONSOLATIONE

illi favet præsumptio, non huic; cujus est jussa non judicare, sed exequi; nisi certa sit injustitia: licet semper liberum sit appellare, aut majores adire. Sacerdos obedientiam in solemnî sua ordinatione promisit; disquisitionem in obediendo non reservavit. Actum de quiete, de salute subditorum; cum dicere audent, *se in hoc, vel in illo mandato ad obedientiam non teneri; vel illud à superiore præcipi minimè posse*. Indè bellum, quod justum utrinque non erit; & fas est putare, ibi justitiam adesse, ubi potestas, & auctoritas adest. Præsul proculdubio, Deum repræsentat; non ita subditus: qui subesse, non præesse debet; nec illi se parem facere; cui si par esset, sub ejus non esset imperio. Sciat autem quicumque cervicosus, & refractarius, neminem adhuc Sanctorum albo fuisse adscriptum, qui Prælato restiterit; qui exequi ejus jussa renuerit; quinimò semper illius salutem fuisse dubiam. Sibi ergo nocet; non Præfidi, cui tot nectit coronas, quot ei præbet occasiones merendi.

Non ita, Filii; non ita; sed mementote Christi Domini, *qui factus obediens usque ad mortem, nomen illud promeruit, quod est super omne nomen; ut in nomine Jesu omne genuflectatur, Cælestium, Terrestrium, & Infernorum*. Tantæ obedientiæ sequimini exemplum; ut meritum consequamini. Gloriosum erit obsequium, non verbis tantum; sed & opere præstitum; cujus certissimè nunquam vos pænitebit; & vestro obsequio grande solatium eritis martyri Episcopo.

CAPUT XLII.

*Ad Sanctæ Sedis Apostolicæ qualescunque Ministros,
paraneſis.*

Nihil omninò est, quod magis levare possit, atque solari Episcoporum martyrium, quàm vestra pietas, Apostolicæ sedis viribus freta, si non contra eos (quod Deus avertat) sed utiquè pro eis steterit. Legite, precor, & seriò perpendite, quæ fusè pertractat Doctissimus Alexander Sperellus de hoc argumento in suo *Episcopo*, sub alio quidè titulo; sed reverà in hunc finem. Fuerat ipse aliquando Romanæ Curia Prælatuſ, ac etiam Neapoli Nuncius Apostolicus; adeoque suo met exemplo, & experimento probavit, ut minister, & ut Episcopus, quæ ibi appositè digerit. Quia verò ea legere non omnibus vacat; hic quædam ex iisdem summarie, ac latine delibo; vix quidquam de proprio subtexens.

^a *Ministri Apostolici, si proprio muneri, & suæ conscientia, Christianæque charitati satisfacere velint, nec* ^{a lib. 2. c. 15.} *minimùm quid ledere debent jurisdictionem Episcopalem; quinimò eam pro viribus juvare, ac tueri. Sanctus Gregorius lib. 9. qu. 35. cap. pervenit, reprehendens Sicilia defensorem; hoc est, Nuncium Apostolicum, qui causas ad Forum Episcopale spectantes in prima instantia judicare præsumpserat; sic ait: (nam si sua unicuique Episcopo jurisdictione non servetur, quid aliud agitur, nisi ut per nos, per quos Ecclesiasticus custodiri debuit ordo, confundatur)? Ad Sardinia verò defensorem, qui clericos contra Episcopo-*

scopum tuebatur, ita rescribit lib.7. ep.66. indic.2. (Ad eundem Episcopum reverenter accede, & sicut causa meritum cognoveris; apud eum, non defensor culpæ; sed potius intercessor existe.) Subdit autem, ubi gravamen ejus officium exigeret: (sed ita servandum est; ut uniuscuiusque Episcopi reverentia, & Clericorum disciplina per defensionis tuæ experientiam minimè solvatur.) Qui Episcopalem auctoritatem minuere audet; Pastoralem baculum frangit. Ligare manus Episcopi, est, Gregem Lupis relinquare; vitia promovere; errores excolere; sacrum characterem, quinimò universalem Ecclesiam, cujus salus ab Episcopis pendet, turpi notâ inurere; schisma quoddam inducere, subditosque refractarios, & contumeliosos in Episcopum reddere.

Ecclesiasticum Regimen Fretum est inquietissimum, procellosum; scopulis, vorticibus, anfractibus, syrtibus plenum: quid ergò, si Naclero auferatur de manibus clauus, aut durus fiat, & difficile mobilis? Quid, si pro libitu, & juxta sibi datam à Domino sapientiam, sui que maris notitiam, vela expandere nequeat, remosque movere? Vel in minima tempestate certissimè naufragus erit. Id autem in Episcoporum Principis, cujus præcipui Ministri vos estis, præjudicium redundat. Ita D. Gregorius lib.7. Ep.30. ad Eulogium Patriarcham Alexandrinum) nec honorem esse reputo, in quo fratres meos honorem suum perdere cognosco; meus namque honor est, honor universalis Ecclesiæ; meus honor est fratrum meorum solidus vigor. Tunc ego verè honoratus sum, cum singulis quibusque honor debitus non negatur. Idem, & clariùs repetit lib.7. ep. 14. indic.2. indiscretos cohibens reorum Defensores contra eorum Episcopos (Ne (inquit) opinionem malè agentium,

ex indiscretæ defensionis ansa in nos ullo modo transferamus .) Hæc , non modò Gregorii , sed cujusque Pontificis est certissima , expressaque mens , quam sequi , & exequi boni , prudentes , rectique sanctæ Sedis Apostolica Ministri tenentur: nè , si secus fiat , id eorum culpâ Summo Præsuli dici possit , quod D. Bernardus Epistola 177. Innocentio II. in persona Alberonis Archiepiscopi Trevirensis objecit : (vires , quas mihi subtrahitis , vobis minuitis ; & contemptus meus , & dejectio mea redundat in vos .)

Si velint Episcopi suo muneri satisfacere ; concubinatus rescindere debent ; usuras auferre ; abusus eradicare ; cohibere potentes ; coercere populum ; clerum in officio continere ; nocentes plectere . Hæc autem sinè strepitu , sinè clamore , absque obtreptione , absque recurso fieri minime possunt . Cùm ergò recursus , obtreptiones , clamores , strepitumque auditis ; Episcopos , de quibus auditis , defendite ; quia proprio muneri satisfaciunt : quod certè præstare amplius non poterunt , si vos resistatis . Excitate dormientes ; nè vigilantes dormire audeant . Laborantes juvate ; nè redigatis ad ocium . Succurrite pugnantibus ; nè , aut cedere , aut fugere compellatis . Videte , nè vobis unquam conveniat illa Isajæ comminatio cap. 5. (Væ qui dicitis malum bonum , & bonum malum .) Non vulgi , non procerum , non malignantium vos irruens turbo , vel levis aura decipiat ; nam (ut Antonino Pio Justinus Martyr audactèr objecit) tantùm valent Principes opinionem veritati præferentes ; quantum Prædones in solitudine . Sanctus Carolus Borromæus nunquam disciplinam Ecclesiasticam in urbe maxima , & nobilissima reformasset , nec ea bona in eo Archiepiscopatu invexisset , nisi Roma favisset , nisi repulisset infinitas , gravissimasque calum-

154 DE CONSOLATIONE

calumnias, & querelas, à Gubernatoribus, à Magistratu, à Clero, à Religionibus, à Populo in ipsum eò delatas. Nullus alius prestare quid simile, vel in modica Civitate unquam poterit; nisi, & ipsum quoque Roma foveat; eique faveat, nisi malignantes, & sycophantas, qui eum lacessunt, opportunè refellat. Ille Cardinalis erat; Pontificis Nepos, genere Princeps, famâ celebris, divitiis locuples, cognationibus potens: & tamèn vix agere potuit; nec adversante Româ prorsus egisset; quæ, ipsa favente, ac juvante, peregit. Quid ergo faciet; quid aliquandò perficiet Episcopus, tot, tantisque adminiculis destitutus; ni Roma faveat; si Roma restiterit? Plerumque plùs laboris in reformatione minima urbis, quàm in maxima reperitur; non tam facilè advertente, aut coeunte maxima multitudine, ut minima. Sed advertat; sed coeat, fre-mat, exclamet, accuset; id non faciet, nisi in Episcopum vigilantem, in Præsulem operantem, in similem Carolo. In alium quemcunque fortasse tacebit,

Ne quaeso velitis, quemlibet Episcopum, aut egregium Criminalistam, aut exactissimum humanarum legum; immò ipsarum apicum observantem: præsertim, ubi potentum mine; versipellium astus; testium periuria; ministro-rum, aut metus, aut fallacia, etiam notissimi criminis, & perniciosissimi, utcumque in actis veritatem abscondunt. Perpendite, quæ ipse Sperellus, omnium æstimatione doctissimus, loco citato §.2. vobis considerata proponit; & videte, quàm excusandi sint Episcopi, qui potiùs veritatem facti, quàm probationem, tot artibus elusam, attendunt: & Deum, & scripturarum sacrarum testimonia, & propria conscientie regulas consulunt. Nùm omnes Episcopi Americani, & Indi, & omnes alii ab urbe longè re-moti,

moti, & hi dumtaxat optimi sunt; de quibus ad vos nulla, seu rara, vel accusatio, vel appellatio defertur? Quoties idem Præsul, sede, auctoritate Apostolica permutata, in una, æquus, probus, & sanctus; in alia verò longè alius! Videte, ne sit aeris, aut climatis; non personæ diversitas: & utrobique (immò, & ubique) dignissimum ordinem, sacratissimum Characterem vestra protectione, vestra defensione dignemini; nè alicui vestrum dici possit, quod Sanctus Gregorius libr. 9. Epistola 32. cuidam suo ministro in hæc verba rescripsit: (Nuntiatum est nobis, quia quosdam Clericos, qui à Reverendissimo Fratre nostro Joanne Episcopo, exigente culpa, in penitentiam missi sunt, nesciente illo, tua exinde auctoritate ejeceris: quod si verum est; rem te omninò inhonestam, & non leviter increpandam fecisse cognoscas. Eisdem ergò clericos Episcopo suo sine mora restitue, & hoc de cætero cave committere; quia si neglexeris, nostros te noveris non mediocriter motus incurrere.) Vestri Principis Fratres, vos ejus præcipui Ministri, pro vestri Principis dignitate, honore, defendite; quantum fas est, in eorum martyrio, vestra pietate, auxilioque vestro solamini.

CAPUT XLIII.

Ad Eminentissimos Sanctæ Romanæ Ecclesiæ Cardinales pia Episcoporum Vota.

Optimi Patres, Eminentia vestrae sublimitatem reveritus, vix loqui audeo. Nihilominus, Episcopalis Characteris Sanctiss. Ordo fari compellit; nè dum undique validissimis adversitatibus impetitur, po-

156 DE CONSOLATIONE

tentissimo vestri favoris clypeo destituatur. Sfortia Pal-
lavicinus, quondam ingeniorum, & sacrae Purpuræ de-
cus, hoc de sua, qua præditus erat, dignitate, falsus
est mihi: *Certò credas (mi Præsul) Cardinalatus non est
beneficium simplex; sed valdè curatum.* Quid igitur de
ipso Episcopatu sentiendum est; cum quilibet Episco-
pus Parochus sit Parochorum: quorum nomen officio
conveniens meritò a cura desumitur! Cardinales ergò,
& Episcopi sunt magni Curati; sed hi, ut potentiâ, &
dignitate minores, ita sunt pænâ majores: qui propte-
rea vestra indigent auctoritate defendi, ac fulciri: præ-
sertim cum eorum cura non modò pastoralis; sed & bel-
lica, & militaris existat. Quot Diœceses, tot Acies
habet universalis Ecclesia; quarum Duces Episcopi
sunt; & hi semper in procinctu positi, quantò fortius
dimicant, tantò acrius impugnantur; & utinam dum-
taxat ab hostibus! *at multò periculosius à propriis mi-*
litibus, & à populo, pro quo pugnant. Ah! quotiès
audiunt suas tubas, & timpana classicum in se personare!
Quotiès vident adversum se subjectarum Acierum
expandi Vexilla! Quotiès experiuntur contra se sub-
ditorum arma torqueri! Hinc Episcoporum crudelius
martyrium; quod nempè aggravat civile bellum, & in-
testinum, plerumque impiâ conspiratione succensum.
Id variis tropis, & figuris hætenus declaravi; & quale
potui, solatium exhibui: majus tamen est, quod à ve-
stra pietate: non expetatur; sed exhibetur. Favor ve-
ster, & auxilium compescit perduellium audaciam;
temeritatem retundit; astus eludit; conatus elidit. Au-
ctoritas vestra Episcopalem ordinem in statione confir-
mat; undè rebelles eos cadere: aut extrudere curat.

Nil

Nil magis fatagunt, quàm dolis, ac technis eos red-
dere æquitati vestræ, si reos non possunt: saltem ut-
cumque suspectos: noverunt enim eorum firmitatem à
vestro Senatus consulto pendere: quod si maligna ipso-
rum industria deceperit, eam faciliè ruituram existi-
mant. Quid ni cadant singularum Ecclesiarum Præfe-
cti; si eos Universali Ecclesiæ sacer, supremusque ve-
ster Senatus, aut pugnantes non juverit; aut non defen-
derit impugnatos? *Hoc habet præcipuum Apostolica
Sedes, ut non pigeat revocare, quod à se fortè deprahen-
derit fraude elicitum, non veritate promeritum. Res
planè æquitate, & laude digna; ut de mendacio nemo lu-
cretur; præsertim apud Sanctam, & summam Sedem.* <sup>a epist.
130.</sup>
Ita Bernardus.

Tercius maximus Constantinus, imperiali clamyde se
Præfulem contexturum asseruit; si quandò fortè offen-
disset peccantem. Vestra Purpura, Eminentissimi Prin-
cipes, æquiùs innocentes Episcopos iusta defensione
perornet; reos autem ita ulciscatur, ut Character Epi-
scopalis eà se tegi cognoscat: quod planè fiet, si stre-
nuè tueamini insontes: fontes verò tam cautè plectatis;
ut in sacratissimum ordinem ultionis nota nullo modo
redundet. Si qua fortè videatis exuberare incusantium
animositatem; compescite: si mendaces reperiantur:
ne sinatis impunè peccare; quandoquidem, si vera di-
xissent, utique multarentur Episcopi. Pessima, ini-
quissima, perniciosissima impunitas, quæ à bonis etiam
Episcopis quietem adimit; dum eos nequissimorum ho-
minum calumniis exponit! Id suis temporibus fieri de-
plorabant, gloriosus Ecclesiasticæ immunitatis assertor,
Divus Thomas Cantuariensis; & disciplinæ itidem Ec-
cle-

158 DE CONSOLATIONE

clesiasticæ, fortis æmulator Bernardus Claravallensis. Hac nostra, tamen ætate zelus vester, & æquitas omnem aditum huic malo præclufit; quod sua contagione robur Episcopalis auctoritatis enervat. Si tamèn vigilanti veftra erupiffe aliquandò compererit; magnæ prorfus utilitatis erit, fi obftruxerit alueos, cuniculos, aut rimulas, ex quibus irrepferit; & fycophantas ita mulctaverit, ut eorum pœna cunctos ab infana temeritate cohibeat. Hoc auxilio Præfulum fama fervabitur, Populique fubjecti ab omni audaciæ contagio fofpites erunt. ^a *Integritas enim Præfidentium* (ut ait Sacrum Concilium Tridentinum) *ſalus eſt ſubditorum*. Non autem fufficit integritas vitæ, niſi etiam cuſtodiatur integritas nominis. *Lucere debent Epifcopi, ut lucernæ poſitæ ſuper candelabrum*: quod autem aliquandò non luceant, non ipſorum culpa; ſed plerumque vitium eſt malignantium; qui, aut nebulas offundunt, aut ventos excitant; ut lumen reſtinguant. Veſtrorum Syderum benignus influxus eam pariat, & foveat in ordine Epifcopali ſerenitatem; ut quiete fulgeat, ſubjectiſque populis tranquillè præluceat: vix majus Epifcopi poſſunt optare ſolatium.

^a ſeſſ. 6.
c. 1. de
Reſcr.

^b epif.
308.

Pro eis demùm loquatur Bernardus, & quæ de Metenſi Eccleſia ſcripſit, hîc de omnibus dicta proponam ^b. *Ad hoc vos Deus in ſublinitate poſuit; ut tantò majori Eccleſiæ ſuæ utilitati vivatis, quantò in ea Eminentiori auctoritate præeſſis. Alioquin deponet ille Pater familias Potentes de ſede, qui pro accepta poteſtate inventi fuerint ſuis utilitatibus deſuiſſe. Quanta ſuſtineat ſponſa Chriſti damna in Epifcopis, & ſi nos ampliùs horremus, qui patimur; tamen & Vos arbitror non latere. En quanti Lu-*
pi

pi Ovília Christi, tùm insidiis, tùm manifestis assultibus quotidie voluntur irrumpere, & disperdere Oves Christi sanguine congregatas ! Idque, non ab heri, & nudius tertius ; sed ex quo Lupi esse caperunt, non cessant Dominicum gregem, quibus possunt viribus, infestare. Ego itaque, quod in me est, demonstro Lupos, instigo Canes. Jam, quid intersit vestra, vos videritis : meum non est, docere Doctores.

CAPUT XLIV.

Ad Sanctissimum Romanum Pontificem, Episcoporum Episcopum humilis supplicatio.

ET Tu aliquando conversus : confirma fratres tuos : ita Petro Christus mandavit, Prædecessori tuo, Romano Proto-Pontifici ; nec ipsi tantum mandavit ; sed etiam Successoribus suis ; cum id ei, ut Pastori, non ut personæ singulari, præceperit : & ergo Tibi quoque jussum est, *converti aliquandò, & confirmare Fratres tuos* : Consuetudo antiquissima Romanorum Pontificum semper fuit, Episcopos vocare *Fratres* ; sive, quod eodem supremo, & sacratissimo Charactere à communi omnium Parente sint insigniti ; sive quod Bonus ille Pastor, qui animam suam dedit pro ovibus suis, earundem ovium Pastores, illos (eligendo) genuerit. Undecunque provenierit, eos tu, Sanctissime Pater, hac nobilissima nuncupatione dignaris ; utque dignare-
ris fortè idem Christus effecit, cum tibi, in Petro, *ut aliquando conversus, Fratres*, hoc est Episcopos, *confirmares*, præcepit. Aliquandò igitur, cum (scilicet)
opus

160 DE CONSOLATIONE

opus fuerit, in opportunitate, magis autem in necessitate, *converti* debes, dignatione, seposita quodammodo Majestate, ac intermissa parumper cæterorum cura; & *Fratres tuos* Episcopos *confirmare*; quod est, sub sarcina labantes firmare, sistere; nè ruant adversitatum impulsu; roborare ut fortius in agone contendant; confovere jam fessos, eosque de manu potentum ervere; in martyrio solari.

Non Tibi opus est hac paraphrasi, Benignissime Pater, qui totum penè tempus tui Summi Pontificatus in hoc impendis, ut protegas, ut defendas, ut tuearis, ut foveris Episcopos, quos Fratres, non modò nuncupas, sed agnoscis, sed amas, sed juvas. Verùm successores tuos, non equidem moneo, sed prævenio; ut cum primùm ascenderint Petri Cathedram, hoc sciant à Christo eis præcipuè mandatum, quod *aliquandò converti, confirmant fratres suos* Episcopos; in suis Ecclesiis vim patientes, angustiatos, afflictos, longo, diro, pertinaci martyrio expositos. Quot quot Universalis Ecclesia per orbem universum complectitur oves, sacro Baptismate in Caulas Christi regenitas, & congregatas, Romanus Pontifex pascere debet: id tamèn per se solum præstare minimè potest; nec unus adesse Americanis Gregibus, Afris, Asianis, & in extremis Europæ, quinimò, & in Italiæ finibus, longè degentibus. Idcirco Episcopos eligit, quibus singulorum Gregum curam committat; & à quibus statis temporibus concrediti muneris exigit rationem: ut autem fideles habeat, non quoscunque, sed *Fratres* deputat, eàdem Christi charitate progenitos; utque boni Pastoris partes adimpleant, eos fovere, tueri, confirmare, confortare, ac solari debet, nè à Lupis, ac furibus,

ribus, cæterisque insidiatoribus, ac vastatoribus eorum Greges diripiantur, dispergantur, vorentur, & ipsos cedere; vel in spiritali afflictionis martyrio deficere fortè contingat.

Patriarchalis Caulæ Constantinopolitanæ strenuus Pastor Chrisostomus, à Fera pessima Imperiali procùl abactus à Grege, hoc unum fatetur in suis quammaximis calamitatibus habuisse solatium; quod à Pontifice Romano, Innocentio amaretur, & omni studio, ac pro viribus juvaretur: ad quem propterea hæc inter alia rescribit: ^{a Tom.} *corpus quidem nostrum uno, eodemque loco tene-* ^{5. Ep.} *tur, & stabilitum est: animus autem charitatis ala in universo Orbe circumvolitat. Proinde, licet tanta itineris intercapedine separati simus; à pietate tamen vestra non absumus; quotidie vobis præsentem sumus: Animi enim oculis videmus vestram illam fortitudinem, & sinceram affectionem, constantiamque non mutabilem; & quod vos consolari nos plurimum, & perpetuò cupiatis (deinde) Nam quantum in vestra pietate situm fuit, jam res omnes sedata, & emendata, & sublimata omnia scandala fuissent; gauderentque Ecclesia tranquillâ, & sincerâ pace, & essent planè secunda omnia; neque contemptæ leges, neque violatæ Patrum constitutiones forent (denique concludit) & idcirco iterum, atque iterum, & sepiùs vestram oro diligentiam; ut quantò major est tempestas, tantò majus adhibeatur studium. Expecto quidem futurum, ut aliquanto ampliùs corrigantur (de suis persecutoribus loquitur) Quod si minus fiet; vos vestram coronam paratam apud misericordem Deum habetis; & hi, qui injuriâ afficiuntur, consolationem ex incremento charitatis vestra non minorem accipient. Nam, & nos tertium nunc*

162 DE CONSOLATIONE

annum in exilio versamur, expositi pesti, fami, bello, continuis obsidionibus, solitudini indicibili, quotidiana morti, & Isauricis gladiis: & non mediocriter nos consolantur solida vestra fides, & charitas, quæ se in me, tam tenui, & simplice oblectant. Hic noster murus, hæc securitas, hic portus absque fluctibus, hic multorum bonorum thesaurus, hæc, lætitiæ, mirificæque voluptatis causa est. Quid amplius dici poterat de solatio, quo martyres Episcopi à Proto-Episcopo afficiuntur, cum ab eo fulciri, foveri, ac juvari se in tēpore senserint! Quod autem magis exigit Summi Pontificis ad Fratres opportunam conversionē, ut ab eo confirmentur; id potissimum est, quod omnes Episcopi ejus oves existunt; nec alium, præter ipsum habent Pastorem. Quemadmodum ergo cæteræ oves à suis Pastoribus immediatam, & specialem exigunt vigilantiam; ita Episcopi à Romano Pontifice; qui tales oves longè præ aliis æstimabiles, non minori studio curare debet, quam quilibet Episcopus suas: & sicut is non opilionum, aliorumque mercenariorum curæ, ac industriæ illas omninò dimittit; sed ipsemet propriâ pastoralis sollicitudine ducit ad pascua, & reducit; arcet insidias, prohibet injurias; medetur, & sanat: ita Pontifex oves illas, quæ alium Pastorem non agnoscunt, specialiori attentione, diligentia, & affectu ipsemet in omnibus complecti tenetur; præsertim, cum in eas ferarum, latronum, Dæmonumque odium, rabies, astus præcipuè ferantur; nec eas vel minimum lædere possint, quin & alias quoque oves illis commissas perdant, & macent; quanquam non sine Pastoribus; tamen, illis utique læsis, palantes. Impossibile igitur est, summum Ecclesiæ Pontificem pascere ovile Dominicum, quin Fratrum suorum

rum exactissimam curam gerat ; cum eorum bona , vel mala in sibi commissos Christi Greges opus sit redundare : sicut enim (ut ait Boetius de consolat. Philos.) *contingentes in Populos, Rectorum quodammodo beatitudo transfunditur* ; ita etiam infelicitatem transfundi necessè est . Hac ergo de causa , qui omnia novit , Christus Dei sapientia , Petro , & Petri Successoribus imperavit , *ut aliquando conversi confirment Fratres suos : & nos , qui sumus in eis designati , Fratres, Pastores , & oves ; hac , tam necessaria confirmatione in ardua , & inquietissima nostra pastoralis cura , in nostro spirituali martyrio , juvari , solarique deposcimus ;* ^{b Paul. ad Hebr. c. 4.} *ut habeamus Pontificem , qui possit compati infirmitatibus nostris .* Id petiit Divus Bernardus pro Episcopo Belvacensi ab Innocentio II. illis verbis : ^{c Epist. 278.} *Fovendus est devotus Juvenis favore paterno ; & zelus bonus , quem pro sua Ecclesiagerit , non modò approbandus ; sed & juvandus . Sic se ipso in dies devotior , ferventior , fortior fiet , cum vexationes , & tribulationes , quæ illi Ecclesia nunquam desunt à malis hominibus , manu indeficientis auxilii vestri sibi senserit è regione levari .* Quod tunc pro uno Episcopo poposcit Bernardus ; nunc ferè pro cunctis necessitas postulat .

Episcoporum ad Deum Oratio .

IN persona omnium Episcoporum loquar ad te Dominum meum , ego pulvis , & cinis , in amaritudine animæ meæ . Quid est hoc , sapientissime Deus ? Tu nos constituisti ovium tuarum Pastores , & cum Nobis earum curam demandas : ecce ego (inquis) *mitto vos sicut oves in medio luporum* ? Quid est hoc ? Pastores eligis ad

164 DE CONSOLATIONE

ovium custodiam ; & custodiendis ovibus eos assimilas ? Tu nos misisti custodiri Gregem tuum ; & in medio luporum nos fore denuncias ? Ergo mittis Pastores tuos , sicut oves , non sicut Pastores : & neque ad oves ; sed utique ut oves in medio luporum . Sunt omnia plena misteriiis . Da Sancte Spiritus , ex eis unum sapere , & intelligere . Pastores vis oves esse , qui ad similitudinem Christi primi Pastoris , *tanquam oves ad occisionem ducamur* , ut Dei victima , & Martyres : quia optimè nosti , pastorale officium martyrium esse . *In medio Luporum nos mittis* , ut manifestè sciremus , raras nos oves in ovilibus reperituros ; sed plurimos lupos , in quorum comparatione illæ , non pauca , sed nullæ putentur . Ergone lupos ipsi pascemus , non oves ? Ità profectò , sed ut nostro pabulo faciamus de lupis oves , pasturi aliquandò , non greges luporum ; sed ovium : Id autem tunc fit ; cum patientiâ nostrâ , exemplo , & doctrinâ efferos animos mitescere docemus , ferinos mores deponere , vitia exuere , induere virtutes : Humanus enim animus naturam cum affectibus mutat , non in substantia , sed utique in mente . Ut autem , Tu Domine , in solis lupis eos omnes intelligis , qui oves tuas quoquomodo perdere possunt , & in Pastores insurgere : ità in ipsis lupis , non feras , sed homines feros designas quocunque vitio irracionales , & inhumanos . Ab his *astimati sumus sicut oves occisionis* : ab aliis verò , qui , mutatis moribus , effecti sunt agni , ut Pastores agnoscimur , & vox nostra blandè percipitur . Hos pascere facile possumus : alios autem de lupis in oves convertere , non est nostræ , sed tuæ solius virtutis , & gratiæ ; cui nequiores cedere nolunt , & pertinaces in malo , semper crudeliorès velut oves nos insectantur , &

per-

persequuntur. *Convertere Domine, & eripe animas nostras; salvos nos fac propter misericordiam tuam.* Intuere martyrium nostrum; & libera nos, gregesque nostros à feritate luporum, inimicorum nostrorum: seu potius, tuorum: mali enim sunt, Pastoresque *percutere volunt, ut dispergantur oves:* aut certè illos percutere, torquere non poterunt; quin hæ dispergantur. Qui nos ergo *tantumquam oves in medio luporum mittis;* ne (quæso) dimittas: & da nobis tandem aliquando, ut gratiâ tuâ convertamus lupos in oves; & quos vitia lupos permanere coegerint, aut abige, aut cohibe. Oh! quot semper, & circumstant gregem, & reperiuntur in grege! Nec desunt, qui, ut nos, gregemque decipiant, ad nos *veniunt in vestimentis ovium; intrinsecus autem sunt lupi rapaces.* Lupi sunt omnes mali, & Episcoporum Tyranni; quin etiam, & tormenta, quibus Episcopos damnant, pro illorum diversitate vitiorum. Audi nos, piissime Domine; audi, & exaudi: ^{a Psal.} *quoniam iniqui insurrexerunt super nos, & synagoga Potentium quæsierunt animas nostras; & non proposuerunt te in conspectu suo: & Tu, Domine Deus; miserator, & misericors, patiens, & multa misericordia, & verax; respice in nos, & miserere nostri: da imperium tuum Pueris tuis, & salvos fac Filios Ancillæ tuæ, Deiparæ Virginis, ac Matris nostræ Mariæ. Fac nobiscum signum in bonum; ut videant, qui oderunt nos, & confundantur: quoniam tu Domine, adiuvisisti nos. ET CONSOLATUS ES NOS.*

F I N I S.

Auctor ei, qui legit.



Ualiter hoc opus elucubraverim, vix ipse intelligo. Tentando illud cæpi; & num procedere posset, verebar. Senecta; librorum, temporis, ingenii, memoriæ inopia; & copia sollicitudinum, vel jam cæptum è manibus passim eripuerè, vel ereptum resumì non rarò prohibuere: ita ut quandòque oblivisci contigerit. Etiam levis cura me occupat; quieti potius, quam negotio genitus; nec finit imbecillis animus rerum agendarum ordinem probè disponere, ut cuique sit locus; nè simul confundi; sed per gradus expediri queant. Accedit quoque, in senio mens immatura, qua nil grave concipere; minus verò eniti possum, minimis assuetus. Qua igitur ego dignitati officio; tam ipsa mihi: nam longè impar minorem obruit, non ornat: Sic tamèn obrutus, per intervalla, & quasi furtim ad opus regressus, illud tandèm absolvi, & absolvisse, ac tam brevi, miratus, præcoccem librum summorum Theologorum ingeniis, audactè exposui; quatenus eorum iudicio rejectus, aut probatus, seù igni traderetur, seù prælo. Merebatur ignem, sed nimia Censorum Pietas informem ita exornavit, ut dignum fecerit prælo evulgari. Quod igitur in eo lector minùs rectè, ac probè dictum inveneris; Auctoris ineptiæ tribuas, & parcas: quod verò scitè, ac sanctè exaratum repereris, Deo primum, dein censoribus referas, & utrosque collauda.

Animis ipse scripsi; non oculis, aut auribus: adeòque
non

non pulchris coloribus, non dulci sono, ac suavi, sed rationibus opus implevi, quibus Episcopi mens in omni præssura lætari possit, & gaudere; captura ex solatio vires; nè in agone deficiat. Certè aliquid mihi debent nobilissimi Præsules, quod eos utcumque solari præsumpserim; unum repto: parcant bona fide audenti; & suis precibus ita juvent, ut & ipse de agone ad coronam tutè perveniam.

Non poterant pœnarum genera exponi, quin earum causas, ac Ministros perstringerem, ex quibus habent nosci, & distingui. Neminem tamèn lædere intendi; sed etiam, eos, qui se propriæ conscientix testimonio senserint lēsos, acri, sed opportuna perstrictione sanare (ipsorum scilicet, malam voluntatem; qua nullus morbus perniciosior) ut, depositā omni malitiā, sani sint in dilectione; præsertim erga Pastores, qui pro eorum salute se impendunt, ac super impendunt; parati etiam mori pro eis, Christi præcepto. Quod igitur ex charitate procedit, nullus iniquæ origini adscribat; nec proprio vitio fontem inficiat de vena ingenuæ intentionis manantem. Tergere velim: portare, laticèque salubri sospitatem largiri: non quemquam notis inficere; non avertere sitientem; non ægritudinem fastidienti stomacho afferre.

Quamquam verò apud homines id testari non verear: apud Deum, qui cordis latebras clarè intuetur minimè audeo, eum propterea sæpius obsecrans, ut quidquid in opere, aut in animo erratum est, benignissimè parcat: & ni cedat labor in suam laudē; in Præsulum consolationem; in ovium utilitatē; in mei salutem; opus elaboratum potenti manu disperdat, incendat, absumat, ac de omnium memoria, æternā oblivione revellat.

Hoc

Hoc tandem monendum censeo, quod quemadmodum captus amore alicujus pulcherrimæ Virginis, in eum vehementer irascitur, qui ab illius amplexibus impudicum amatorem, difficultatum, periculorum, pœnarum metu, arcere conatur: ita quoque Præsulatus fulgore captus, ejus, & scripta, & dicta ingenti odio insectabitur, quem noverit improbare tantæ ambitum dignitatis; eamque tot spinis septam ostendere, ut impossibile videatur, illam absque sanguinis effusione complecti. Sed utinam hic *saperet, & intelligeret; & novissima prævideret!* Quantum in me est; nullam ibi, ab eo, vel à quovis alio, pœnam formido; ubi spero de Episcoporum consolatione solatium.

Authoris Protestatio.

Ubi fortè in hoc Opere cujusquam virtutes, & merita celebro, qui ab Ecclesia inter Sanctos, aut Beatos non sit adscriptus; auctoritate privatà id facio, quæ nullam prorsus publicam parit fidem; eam ipse penès Relatores, à quibus audiui, omninò relinquens; ut Decretis religiosè paream Sacræ Universalis Inquisitionis Romanæ; anno 1625. 1631. 1633. sub Urbano VIII. emanatis.

LAUS DEO.



VAI 1532652

